

MESYUARAT PERTAMA, PENGGAJAL KELIMA
PARLIMEN KEEMPAT BELAS
2022

HARI SELASA : 1 MAC 2022

**JAWAPAN-JAWAPAN BAGI PERTANYAAN-PERTANYAAN JAWAB
LISAN YANG TIDAK DIJAWAB DI DALAM DEWAN
(SOALAN NO. 9 HINGGA NO. 95)**

**[SOALAN NO. 2 DIJAWAB BERSEKALI
DENGAN SOALAN NO. 24, 70, 76 DAN 83]]**

[SOALAN NO. 3 DIJAWAB BERSEKALI DENGAN SOALAN NO 28]

NOTA : [RUJUK PENYATA RASMI HARIAN (HANSARD)]

PEMBERITAHUAN PERTANYAAN JAWAB LISAN DEWAN
RAKYAT MESYUARAT PERTAMA, PENGGAL KELIMA
PARLIMEN KEEMPAT BELAS 2022

PERTANYAAN : LISAN

DARIPADA : DATO' SRI HASAN BIN ARIFIN [ROMPIN]

TARIKH : 1 MAC 2022 (SELASA)

SOALAN

DATO' SRI HASAN BIN ARIFIN [ROMPIN] minta MENTERI PERUSAHAAN PERLADANGAN DAN KOMODITI menyatakan kenaikan harga minyak sawit mentah memberi kesan kepada Kerajaan untuk menampung subsidi bahan-bahan tersebut. Adakah Kementerian berhasrat untuk mengkaji semula kaedah pembahagian subsidi supaya ia lebih tersasar seperti golongan B40. Memberi kad subsidi dalam bentuk tunai dijangka adalah lebih berkesan khususnya kepada mereka yang hanya layak sahaja mendapatkannya.

JAWAPAN

Tuan Yang Di-Pertua,

- Untuk rekod, **paras harga MSM tertinggi** terakhir yang pernah direkodkan adalah pada **24 Februari 2022 iaitu RM 6,845.50** satu tan dan ini sudah semestinya membebaskan kerajaan daripada tanggungan subsidi.
- Sehubungan itu, peningkatan harga MSM ini telah menyebabkan rantai harga produk berasaskan sawit turut meningkat, termasuklah harga minyak masak di dalam kemasan botol 1 hingga 5 kilogram dan polibeg 1 kilogram untuk pengguna yang menyebabkan bebanan subsidi yang ditanggung oleh kerajaan turut meningkat. Kementerian Perusahaan Perladangan dan Komoditi

(KPPK) pada masa ini sedang mengadakan perbincangan dengan Kementerian Perdagangan Dalam Negeri dan Hal Ehwal Pengguna (KPDNHEP) yang bertanggungjawab mentadbir urus subsidi minyak masak bagi menambahbaik kaedah pemberian subsidi supaya lebih khusus kepada golongan sasaran B40. Beberapa cadangan sedang dikaji seperti :

- i. Mekanisma pembiayaan subsidi minyak masak melalui hasil kutipan Levi Keuntungan Luar Biasa (*Windfall Proft Levy*). KPPK/KPDNHEP memohon peruntukan khas daripada Kementerian Kewangan bagi hasil kutipan Levi Keuntungan Luar Biasa (*Windfall Proft Levy*) untuk menampung kos subsidi minyak masak apabila harga minyak sawit meningkat.
 - ii. Harga runcit minyak masak kemasan 1kg polibeg dinaikkan daripada RM2.50 kini kepada harga yang lebih bersesuaian untuk mengurangkan salah laku dan ketirisan. Peningkatan harga runcit minyak masak 1kg polibeg (yang tidak pernah berubah sejak tahun 1996) juga akan dapat mengurangkan bebanan subsidi yang ditanggung Kerajaan melalui pelaksanaan Skim Penstabilan Harga Minyak Masak (COSS).
- Kementerian juga berpandangan mekanisme pemberian subsidi minyak masak boleh dipelbagaikan supaya lebih efektif, sebagai contoh melalui kad subsidi yang dilihat mampu mencapai golongan sasar (B40) dengan lebih baik untuk menikmati manfaat ini. **Walau bagaimanapun, keputusan akhir kaedah pembahagian subsidi perlu disepakati oleh KPDNHEP dan KPPK.**

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SERI UTAMA HAJI MUKHRIZ BIN
TUN DR. MAHATHIR [JERLUN]**

TARIKH : 1 MAC 2022 (SELASA)

SOALAN

Minta **PERDANA MENTERI** menyatakan bagaimana RM101.27 bilion yang diperlukan untuk menjayakan 7 Aktiviti Pertumbuhan Ekonomi Utama (KEGA) yang digariskan di bawah Tindakan Pembangunan Bumiputera 2030 akan dibiayai. Jika pihak swasta yang diharap menanggung kos ini, apakah jaminan yang Kerajaan tawarkan kepada mereka bagi memastikan TPB2030 berjaya.

JAWAPAN

**DI JAWAB OLEH YB DATUK DR. ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Dipertua,

1. Tindakan Pembangunan 2030 (TPB2030) yang dilancarkan oleh YAB Perdana Menteri pada 6 Disember 2021 merupakan pelan tindakan 10 tahun yang dipacu oleh pihak swasta.
2. Daripada RM101.27 bilion dana yang diperlukan bagi menjayakan program pembangunan serta inisiatif yang digariskan di bawah Tindakan Pembangunan 2030, sebanyak 90% atau RM91.14 bilion pembiayaan akan ditanggung oleh pihak swasta atau pemilik program pembangunan, manakala baki sehingga 10% lagi dibiayai melalui dana kerajaan, tertakluk kepada ketersediaan peruntukan (*availability of funds*).
3. Bagi memastikan pelaksanaan Tindakan Pembangunan 2030 mencapai sasaran yang ditetapkan, TERAJU sebagai agensi yang telah dimandatkan oleh Majlis Kemakmuran Bumiputera (MKB) selaku agensi penyelarasan Tindakan Pembangunan 2030 akan bekerjasama dengan kementerian melalui Unit Pemerkasaan Agenda Bumiputera (UPAB) di setiap kementerian dan di setiap negeri bagi memudahkan, memantau dan seterusnya melaporkan pencapaian pelaksanaan kesemua program-program Pembangunan di bawah Tindakan Pembangunan 2030 secara berkala kepada Majlis Kemakmuran Bersama.
4. Sebagai pemudahcara, antara bantuan yang diberikan oleh kerajaan dalam mendukung projek-projek ini termasuklah pembangunan modal insan yang melibatkan latihan reskilling dan upskilling kepada pekerja-pekerja syarikat swasta tersebut.
5. Selain daripada itu, pihak kerajaan melalui agensi-agensi juga akan membantu syarikat-syarikat swasta mendapatkan akses kepada pasaran (domestik dan antarabangsa).

6. Bagi projek-projek yang melibatkan proses perolehan, Kementerian dan TERAJU akan membantu syarikat-syarikat swasta dalam memudahcara dan mempercepatkan proses-proses yang berkaitan. Ini merangkumi dan tidak terhad kepada pemerolehan teknologi baharu, infrastruktur, aset, perlesenan serta pemilikan tanah.

7. Pelaksanaan Tindakan Pembangunan 2030 merupakan salah satu pengukuhan strategi dan ketahanan Bumiputera bukan sahaja bagi mendepani cabaran COVID-19, malah penting bagi melonjakkan penglibatan Bumiputera dalam arus pertumbuhan ekonomi dan menyediakan tahap sosioekonomi yang seimbang, saksama dan terangkum untuk 10 tahun yang mendatang. Tindakan Pembangunan 2030 dijayarkan dengan matlamat dan sasaran Rancangan Malaysia Kedua Belas (RMKe-12) bagi mengembalikan semula momentum pertumbuhan ekonomi dan memacu Malaysia ke arah negara maju dengan penglibatan Bumiputera yang lebih berkesan dan bermakna.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN CHE ALIAS BIN HAMID [KEMAMAN]

TARIKH : 01 MAC 2022 (SELASA)

SOALAN

TUAN CHE ALIAS BIN HAMID [KEMAMAN] minta **PERDANA MENTERI** menyatakan dakwaan sesetengah peneroka FELDA yang tidak mengalami peningkatan pendapatan selari dengan harga minyak sawit yang tinggi.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Secara keseluruhannya, purata pendapatan bersih peneroka FELDA yang terlibat dalam tanaman kelapa sawit meningkat kira-kira 33% peratus daripada RM3,173 sebulan pada tahun 2020 kepada RM4,297 sebulan pada tahun 2021.
2. Peningkatan purata pendapatan bulanan ini berikutan kenaikan harga minyak sawit mentah yang meningkat ke kira-kira RM4,400 setan pada tahun 2021, berbanding dengan kira-kira RM2,800 setan pada tahun 2020.

3. Di samping itu, pelaksanaan beberapa inisiatif oleh FELDA seperti pelarasan pinjaman peneroka turut menyumbang kepada peningkatan pendapatan bersih peneroka.

4. Walaubagaimanapun, jumlah peningkatan pendapatan peneroka tidak seragam di semua kawasan FELDA berikutan faktor-faktor berikut :

- (i) Wabak Covid-19 yang melanda dan berlakunya arahan Perintah Kawalan Pergerakan Diperketatkan (PKPD) di beberapa tanah rancangan mengakibatkan aktiviti operasi ladang terpaksa dihentikan sementara waktu. Sebagai contoh, rancangan FELDA di Wilayah Terengganu yang terkesan termasuklah:
 - a. FELDA Selasih dan FELDA Tenang Besut bagi tempoh 22 Mei hingga 4 Jun 2021; dan
 - b. FELDA Neram 2 di kawasan Parlimen Kemaman, DUN Air Putih bagi tempoh 21 Julai hingga 3 Ogos tahun lepas.
- (ii) Selain itu, terdapat beberapa rancangan yang mengalami tempoh PKPD yang berlanjutan sehingga melebihi 14 hari. Ada juga terdapat tanah rancangan yang dikenakan arahan PKPD buat kali kedua dan seterusnya; dan
- (iii) Arahan larangan kemasukan pekerja asing mulai Mac 2020 ekoran daripada pandemik Covid-19 telah mengakibatkan masalah kekurangan pekerja yang serius terutamanya penuai buah. Ini mengakibatkan pusingan menuai terpaksa dikurangkan dan terdapat banyak kes buah yang sudah masak dan tidak dituai.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN TAN KOK WAI (CHERAS)

TARIKH : 01 MAC 2022 (SELASA)

SOALAN

TUAN TAN KOK WAI (CHERAS) minta **MENTERI WILAYAH PERSEKUTUAN** menyatakan jumlah tanah runtuh yang telah berlaku di Kuala Lumpur semasa musim hujan sepanjang tahun 2021 dan terutamanya antara 18 ke 19 Disember 2021.

JAWAPAN

Tuan Yang di-Pertua,

Untuk makluman Ahli Yang Berhormat, berikutan kejadian hujan yang berterusan di Kuala Lumpur pada hujung tahun 2021 yang lalu, ia telah menyebabkan berlaku tanah runtuh di kawasan-kawasan yang bercerun curam. Sehingga 19 Januari 2022, Dewan Bandaraya Kuala Lumpur (DBKL) telah merekodkan sebanyak **108 aduan** berhubung tanah runtuh di sekitar Kuala Lumpur iaitu tanah runtuh yang berlaku di atas **tanah-tanah milik DBKL, Ketua Pengarah Tanah dan Galian (KPTG) dan juga di atas tanah pemilikan persendirian.**

Pihak DBKL telah mengambil langkah awalan dengan memasang kanvas, membersihkan sisa runtuhan, meletakkan penghadang serta pita keselamatan bagi kesemua kawasan runtuhan.

Pihak DBKL telah melantik perunding kerujuteraan awam dan struktur yang berprestasi dan reputasi yang baik iaitu Tetuan IKRAM Sdn.Bhd. Skop kerja perunding IKRAM adalah menjalankan pemeriksaan dan kajian di tapak bencana untuk menyediakan cadangan rekabentuk bagi memastikan kestabilan cerun.

Daripada 108 lokasi tanah runtuh, sebanyak 52 lokasi telah dan sedang diambil tindakan pembaikan sementara dan kekal oleh DBKL. Manakala yang selebihnya melibatkan kawasan persendirian, DBKL telah mengeluarkan arahan kepada pemilik untuk membaiki cerun yang runtuh selaras dengan peruntukan Akta Jalan, Parit dan Bangunan 1974 (Akta 133).

Antara kawasan bencana yang berlaku di kawasan tanah persendirian dimana kerja-kerja awalan yang telah dilaksanakan oleh DBKL adalah seperti berikut:

1. Sungai Penchala (Kampung Palimbayan)
 - Kerja-kerja pembersihan di kawasan runtuhan telah siap.

SOALAN NO : 12

- Kerja-kerja pembinaan parit induk dan pembaikan kerja-kerja Jalan Palimbayan akan disiapkan pada bulan Mei 2022.

2. Kondominium Bangsar Indah

- kerja-kerja pembersihan dan formasi cerun telah siap untuk kerja-kerja pembaikan kekal dilaksanakan berdasarkan kepada cadangan teknikal daripada perunding IKRAM SDN.BHD yang dilantik oleh DBKL.

3. Kerja-kerja di Jalan Setiakasih Damansara

- Kerja-kerja membersihkan sisa-sisa runtuh *'Retaining Wall'* dan kerja-kerja baikpulih kerosakan parit induk telah siap dibina. Memandangkan cerun tersebut berada di dalam lot pemilik kerja-kerja baikpulih cerun perlu dilaksanakan oleh pemilik.

4. Kondominium Sri Duta

- kerja-kerja awalan dilaksanakan oleh DBKL seperti kerja-kerja pembersihan.
- Manakala kerja-kerja pembaikan sementara telah dilaksanakan oleh pihak pemaju.
- Untuk pembaikan kekal, pihak pemaju telah diminta untuk melantik perunding bebas memberi cadangan teknikal kekal supaya struktur bangunan stabil dan selamat diduduki.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : YB TUAN SABRI BIN AZIT [JERAJ]

TARIKH : 01 MAC 2022 (SELASA)

SOALAN

Minta **PERDANA MENTERI** menyatakan berapa jumlah peruntukan yang telah dibelanjakan oleh Kerajaan dalam pemberian bantuan menggunakan peruntukan Kumpulan Wang Amanah Bantuan Bencana Negara (KWABBN) bagi Monsun Timur Laut (MTL) 2021/2022.

JAWAPAN

**DIJAWAB OLEH YB DATUK DR ABD LATIFF AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Kerajaan Persekutuan pada 29 Disember 2021 telah mengumumkan beberapa bantuan dan kemudahan di bawah inisiatif Bantuan Keluarga Malaysia dengan nilai keseluruhan sebanyak RM1.4 bilion. Pengumuman ini menzahirkan keprihatinan Kerajaan Persekutuan terhadap mangsa yang terjejas akibat bencana banjir di dalam tempoh Monsun Timur Laut (MTL) 2021/2022.

2. Bantuan-bantuan Keluarga Malaysia yang menggunakan peruntukan Kumpulan Wang Amanah Bantuan Bencana Negara (KWABBN) adalah seperti berikut:

- a) Bantuan Wang Ihsan sebanyak RM1,000 kepada setiap Ketua Isi Rumah (KIR) yang terjejas dengan banjir sama ada yang berpindah atau tidak berpindah ke pusat pemindahan sementara (PPS);

- b) Bantuan Ihsan Pengurusan Kematian sebanyak RM10,000 kepada waris mangsa yang meninggal dunia;
- c) Bantuan Barangan Keperluan Asas (BBKA) sebanyak RM2,500 kepada setiap KIR yang rumahnya dinaiki air; dan
- d) Bantuan Pembaikan Rumah dengan Nilai Maksimum RM5,000.

3. Setakat 22 Februari 2022, Agensi Pengurusan Bencana Negara (NADMA) telah menyalurkan peruntukan sebanyak RM262.8 juta kepada Kerajaan Negeri dan Unit Penyelarasan Pelaksanaan (ICU) bagi tujuan pengagihan bantuan-bantuan seperti yang disebut di atas. Proses pengagihan bantuan masih giat dijalankan dengan kerjasama erat antara NADMA, Kerajaan Negeri dan ICU. Pertambahan peruntukan akan disalurkan dari semasa ke semasa berdasarkan keperluan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : YB TUAN CHONG CHIENG JEN (STAMPIN)

TARIKH : 01 MAC 2022 (SELASA)

SOALAN

TUAN CHONG CHIENG JEN [STAMPIN] minta **MENTERI KANAN KERJA RAYA** menyatakan apakah status projek naik taraf lampu isyarat di Jalan Samarahan-Kuching yang seharusnya dijadualkan siap bina dalam bulan Januari 2022. Apakah sebab kelewatan pelaksanaan projek dan apakah tindakan yang telah diambilkan oleh Kerajaan untuk mempercepatkan projek tersebut.

JAWAPAN

Tuan Yang Di-Pertua,

Untuk makluman Ahli Yang Berhormat, hasil semakan Kementerian ini bahawa projek naik taraf lampu isyarat di Jalan Samarahan-Kuching yang dibangkitkan oleh YB Stampin adalah di Jalan Negeri. Kementerian ini hanya bertanggungjawab di dalam pemantauan dan penyenggaraan Jalan Persekutuan sahaja manakala bagi penyenggaraan Jalan Negeri ia adalah di bawah tanggungjawab Kerajaan Negeri.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI HAJI AHMAD BIN HAJI MASLAN
[PONTIAN]**

TARIKH : 1 MAC 2022 (SELASA)

SOALAN

DATUK SERI HAJI AHMAD BIN HAJI MASLAN [PONTIAN] minta **PERDANA MENTERI** menyatakan kelayakan untuk menjadi Ahli SPR, terma-terma perlantikan seperti imbuhan dan tempoh serta pembaikan kaedah mengundi dan tahap kecekapan SPR menangani pendidikan demokrasi kepada pengundi muda dan automatik yang bertambah pada setiap bulan.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

(a) Kelayakan dan Terma Pelantikan Ahli SPR

1. Untuk makluman Ahli Yang Berhormat, pelantikan anggota Suruhanjaya Pilihan Raya Malaysia adalah melalui Perkara 114(1) dan (2) Perlembagaan Persekutuan yang memenuhi keperluan sepertimana yang dinyatakan dalam Perkara 114(3) dan (4) Perlembagaan Persekutuan seperti berikut:
 - (i) Anggota SPR yang dilantik belum mencapai umur enam puluh enam tahun; dan
 - (ii) Anggota SPR yang dilantik tidak boleh bankrap, melibatkan diri dalam apa-apa jawatan/pekerjaan berbayar di luar tugas jawatannya atau menjadi ahli mana-mana satu Majlis Parlimen atau Dewan Undangan sesuatu Negeri.
2. Bagi tujuan pelantikan, setiap anggota SPR akan menerima saraan seperti gaji atau elaun tetap selaras dengan Jadual kepada Seksyen 2, Akta Suruhanjaya Pilihan Raya 1957 [Akta 31].

(b) Pembaikan Kaedah Mengundi

3. Untuk makluman Ahli Yang Berhormat, SPR telah melaksanakan beberapa penambahbaikan bagi memastikan perjalanan pilihan raya di negara ini lebih efisien, adil dan telus. Di antara penambahbaikan yang telah dilaksanakan oleh SPR adalah seperti berikut:

- (i) **Mewujudkan saluran khusus kepada pengundi 60 tahun ke atas dan orang kurang upaya (OKU).** Ini bagi memberikan keselesaan dan kemudahan kepada golongan tersebut untuk mengundi;
- (ii) **Menambah pusat mengundi baharu** bagi mengelakkan kesesakan di pusat mengundi dan saluran;
- (iii) **Memanjangkan tempoh masa mengundi dari jam 8.00 pagi hingga jam 6.00 petang** berbanding 8.00 pagi hingga 5.30 petang pada pelaksanaan PRU atau PRK selepas PRU Ke-14. Pemanjangan tempoh masa ini dapat memberi masa yang mencukupi kepada pemilih untuk membuang undi dengan mengambil kira pertambahan pemilih akibat pelaksanaan Undi 18 secara automatik.
- (iv) **Memansuhkan syarat undi pos luar negara.** Syarat-syarat kelayakan pengundi pos Kategori 1B (Luar Negara) yang dilaksanakan sebelum ini **telah dimansuhkan** bagi memberi kemudahan kepada semua pemilih berdaftar di luar negara untuk mengundi. Syarat-syarat yang telah dimansuhkan adalah seperti berikut:
 - Bermastautin di luar negara kecuali di Wilayah Selatan Thailand (Narathiwat, Pattani, Yala, Songkhla dan Satun), Singapura, Brunei dan Kalimantan, Indonesia; dan
 - Pernah berada di Malaysia atau kembali ke Malaysia tidak kurang daripada 30 hari dalam tempoh lima (5) tahun sebelum tarikh pembubaran Dewan Negeri yang sedang berkuat kuasa.

(c) Menangani Pendidikan Demokrasi kepada Pengundi

4. Untuk makluman Ahli Yang Berhormat, Suruhanjaya Pilihan Raya Malaysia (SPR) melalui Akademi Pilihan Raya (APR) telah menjalinkan kerjasama strategik dengan beberapa kementerian untuk melaksanakan **Program Pendidikan Pengundi (Voter Education –**

VE) yang bertujuan untuk memberi kefahaman terhadap proses pilihan raya yang dijalankan di Malaysia dan **mempersiap siaga golongan belia** agar menjadi warganegara yang bertanggungjawab dengan melibatkan diri dalam pilihan raya.

5. Antara kementerian yang terlibat adalah Kementerian Belia dan Sukan, Kementerian Pengajian Tinggi, Kementerian Pendidikan Malaysia, Kementerian Kesihatan Malaysia, Kementerian Sumber Manusia, Kementerian Pembangunan Luar Bandar, Kementerian Komunikasi dan Multimedia Malaysia dan lain-lain agensi serta badan-badan bukan kerajaan yang mempunyai kaitan dengan belia.
6. Selain itu, bagi menyebarkan luas penyampaian maklumat pilihan raya kepada golongan belia, APR telah melaksanakan **Program APR Associate Trainer** atau lebih dikenali dengan nama **AAT**. Melalui program AAT ini, APR dapat melatih lebih ramai penceramah dan jurulatih yang mampu untuk bersama-sama dengan APR menyampaikan maklumat tentang proses pilihan raya di Malaysia kepada pelajar sekolah dan golongan belia dalam institusi pendidikan di seluruh negara. Setakat ini, seramai **273 peserta telah mengikuti latihan intensif** oleh APR dan seterusnya **dilantik sebagai AAT**.
7. APR juga mengambil inisiatif perkongsian secara maya dalam media sosial bagi memberikan penerangan yang lebih mudah dan ringkas mengenai proses pilihan raya melalui platform Facebook, Youtube, Instagram, Twitter dan Tiktok yang pada ketika ini merupakan *trend* belia dan anak muda.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

DARIPADA : TUAN OSCAR LING CHAI YEW [SIBU]

TARIKH : 1 MAC 2022 (SELASA)

SOALAN

TUAN OSCAR LING CHAI YEW [SIBU] minta **MENTERI ALAM SEKITAR DAN AIR** menyatakan berapa banyak dana yang telah diperuntukkan kepada Sibu sejak lima tahun yang lalu kerana banjir selalu berlaku di bandar Sibu untuk penyelenggaraan dan memperbaiki parit-parit dan sungai-sungai di Sibu. Senaraikan jumlah mengikut tahun 2018-2022.

JAWAPAN

Tan Sri Yang Di-Pertua,

1. KASA menyalurkan peruntukan kepada Kerajaan Negeri bagi melaksanakan kerja-kerja untuk mengurangkan risiko banjir melalui Program Pemuliharaan Sungai Untuk Mengurangkan Risiko Banjir Pelbagai Negeri. Fokus diberikan kepada kerja-kerja pembersihan dan mengoptimumkan kapasiti sungai sebagai langkah mitigasi jangka pendek dan sederhana bagi mengurangkan risiko banjir.

Kerja-Kerja Penyelenggaraan dan Memperbaiki Parit Dan Sungai

2. Bagi Bandar Sibu, Kerajaan telah menyalurkan peruntukan berjumlah RM1.58 juta untuk kerja-kerja penyelenggaraan dan memperbaiki sungai dalam tempoh 2018 hingga 2021 dengan pecahan seperti berikut:

TAHUN	BILANGAN KERJA	KOS (RM)
2018	30	947,174
2019	8	237,682
2020	9	335,770
2021	1	66,214
JUMLAH		1,586,841

3. Manakala di bawah *Rolling Plan* 1 tahun 2022 RMKe-12, peruntukan berjumlah RM490 ribu telah diluluskan bagi kawasan Sibu di bawah Projek Pemuliharaan Sungai Untuk Mengurangkan Risiko Banjir. Projek ini melibatkan 5 kerja .

Rancangan Tebatan Banjir (RTB) Sibu

4. Bagi perancangan jangka panjang, Projek Rancangan Tebatan Banjir (RTB) Sibu, Lembangan Batang Rajang telah dijalankan bagi penyelesaian secara holistik untuk mengurangkan masalah banjir di Bandar Sibu. Projek RTB Sibu Fasa 1 telah siap dilaksanakan di dalam Rancangan Malaysia Ke-9 dengan kos projek berjumlah RM138 juta. RTB Sibu Fasa 2 juga telah siap dilaksanakan di dalam Rancangan Malaysia Ke-10 dengan kos projek berjumlah RM70 juta.

5. Pada RMKe-11, peruntukan dengan siling berjumlah RM100 ribu telah diluluskan bagi pelaksanaan projek RTB Sibu Fasa 3 dan kini sedang dalam peringkat pembinaan. Kemajuan fizikal terkini adalah 46.31%, dan tertakluk kepada ketidaktentuan keadaan semasa yang boleh merencatkan pencapaian kemajuannya, projek tersebut dijangkakan siap menjelang Ogos 2022.

6. Bagi memastikan kesinambungan projek RTB Sibu ini tidak terhenti sehingga ke Fasa 3 sahaja dan atas dasar ingin membantu rakyat yang terkesan teruk akibat masalah banjir yang semakin mendesak dewasa ini, kerajaan Sarawak di bawah RMKe-12 telah meluluskan peruntukan sebanyak RM120 juta bagi pelaksanaan Fasa 4, manakala Fasa 5 masih dalam pertimbangan Kerajaan Persekutuan untuk kelulusan di dalam RMKe-12 dengan permohonan sebanyak RM275 juta.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : DATO' SYED ABU HUSSIN BIN HAFIZ SYED
ABDUL FASAL [BUKIT GANTANG]**

TARIKH : 1 MAC 2022 (SELASA)

SOALAN

DATO' SYED ABU HUSSIN BIN HAFIZ SYED ABDUL FASAL [BUKIT GANTANG] minta **MENTERI ALAM SEKITAR DAN AIR** menyatakan langkah-langkah yang sedang diambil oleh Kementerian bagi mengatasi masalah banjir yang sering berlaku di Mukim Matang, Mukim Sungai Tinggi, Mukim Trong, Mukim Bukit Gantang dan Mukim Taiping dalam tempoh Rancangan Malaysia Ke-12 dan status kemajuan projek pembinaan pam air di Pekan Kuala Sepetang dan Kampung Matang Road. Apakah perancangan strategik Kementerian bersama Pejabat Daerah dan Tanah Larut Matang dan Selama serta Majlis Perbandaran Taiping bagi mengatasi masalah banjir di Kurnia Jaya.

JAWAPAN

Tan Sri Yang Di-Pertua,

1. Bagi mengatasi masalah banjir, KASA melalui Jabatan Pengairan dan Saliran (JPS) Daerah Larut, Matang & Selama (LMS), Perak telah menjalankan kerja-kerja penyelenggaraan berkala sungai utama dan anak-anak sungai di kawasan yang sering berlakunya banjir. Fokus diberikan kepada kerja-kerja pelebaran dan mendalamkan sungai serta pembinaan ban banjir. Penyelenggaraan berkala ini dijalankan sepanjang tahun bermula dari tahun 2015 sehingga kini. Pada tahun 2021, JPS Daerah Larut, Matang dan Selama (LMS) telah menerima peruntukan daripada Kerajaan Persekutuan untuk menjalankan kerja-kerja penyelenggaraan di dalam kawasan Parlimen Bukit Gantang dan kerja-kerja ini telah siap

sepenuhnya serta berjaya mengurangkan masalah banjir berjumlah enam belas (16) projek dengan kos RM 504,948.00.

2. Di samping itu, Pihak JPS Daerah LMS juga telah menjalinkan kerjasama pintar bersama Menteri Besar Incorporated (MB Inc.) dan Pejabat Daerah dan Tanah Larut, Matang & Selama bagi menyelenggara sungai-sungai di Negeri Perak dengan mengorek sungai mengikut garis panduan yang telah ditetapkan dan hasil korekan sungai tersebut akan dibawa keluar bagi tujuan komersial. Kerjasama pintar tersebut mendapat kelulusan Majlis Mesyuarat Kerajaan (MMK) Negeri Perak pada tahun 2015. Dengan adanya kerjasama pintar ini dapat menjimatkan kos perbelanjaan pihak kerajaan sekaligus dapat mengurangkan masalah banjir. Pada tahun 2021, terdapat 34 kelulusan telah diberikan kepada pihak (MB Inc.) oleh JPS bagi mengorek sungai-sungai di dalam Daerah Larut, Matang dan Selama.

3. Bagi penyelesaian jangka panjang, KASA melalui JPS kini sedang melaksanakan Rancangan Tebatan Banjir Sungai Trong. Projek ini dalam peringkat rekabentuk dan dijangka siap pada Jun 2022. Selain itu, JPS juga sedang menjalankan kerja-kerja ukur kejuruteraan dan penyiasatan tapak untuk merekabentuk struktur dan komponen mekanikal bagi projek pembinaan rumah pam di Pekan Kuala Sepetang. Projek ini akan ditender sekitar bulan Jun 2022 dan dijangka siap pada 2024 dengan anggaran kos projek RM 1.6 juta.

4. Selain daripada itu, KASA juga telah memperuntukan sejumlah RM150,000.00 melibatkan 5 kerja-kerja bagi Daerah Larut, Matang dan Selama dibawah RMKe-12 bagi Projek Pemuliharaan Sungai Untuk Mengurangkan Risiko Banjir di bawah butiran 15200.

5. JPS juga telah mengenalpasti Bekas lombong di Kampung Kurnia Jaya berhampiran Sungai Rantin, Mukim Kamunting sebagai kolam takungan banjir bagi menakung sementara limpahan air sungai berdekatan untuk mengelakkan berlakunya kejadian banjir di Kg. Kurnia Jaya. Perkara ini telah dicadangkan pada November 2021 kepada Pejabat Tanah Larut, Matang dan Selama untuk kelulusan menggunakan bekas lombong tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN HASSAN BIN ABDUL KARIM
[PASIR GUDANG]**

TARIKH : 01 MAC 2022 (SELASA)

SOALAN

TUAN HASSAN BIN ABDUL KARIM [PASIR GUDANG] minta **KEMENTERIAN PERDAGANGAN ANTARABANGSA DAN INDUSTRI** menyatakan apakah pelaburan-pelaburan terbaru yang berjaya dibawa ke kawasan perindustrian di Pasir Gudang.

JAWAPAN

Tuan Yang di-Pertua,

Bagi tahun 2021, jumlah pelaburan yang telah diluluskan di bawah seliaan MIDA di Johor adalah sebanyak RM8.0 billion yang terdiri daripada 327 buah projek iaitu 135 buah projek dalam sektor perkilangan dan 192 buah projek dalam sektor perkhidmatan yang menjana sebanyak 10,835 peluang pekerjaan. Daripada jumlah tersebut, RM3.9 bilion atau 48.75% adalah merupakan pelaburan langsung asing dan RM4.1 bilion atau 51.25% merupakan pelaburan tempatan. Projek utama yang diluluskan di negeri Johor adalah dalam subsektor barangan logam asas, kimia dan barangan kimia, perkhidmatan sokongan, barangan getah, elektrik dan elektronik, mesin dan peralatan, serta hotel dan pelancongan.

Bagi kawasan Pasir Gudang, jumlah pelaburan yang telah diluluskan dari Januari sehingga Disember 2021 adalah sebanyak RM754 juta yang terdiri daripada 25 buah projek iaitu 9 buah projek dalam sektor perkilangan dan 16 buah projek dalam sektor perkhidmatan serta telah menjana sebanyak 612 peluang pekerjaan. Daripada jumlah tersebut,

SOALAN NO : 18

RM708.7 juta atau 94.0% merupakan pelaburan tempatan dan RM45.5 juta atau 6.0% adalah merupakan pelaburan langsung asing. Projek-projek utama yang diluluskan di Pasir Gudang adalah dalam subsektor perkhidmatan sokongan, perabot dan peralatan, perkilangan makanan, kayu dan barangan kayu, barangan petroleum dan petrokimia serta kimia dan barangan kimia.

Strategi promosi untuk menarik pelabur yang dilaksanakan oleh MIDA adalah berdasarkan kepada kekuatan dan kesesuaian ekosistem di sesebuah negeri. Malah, MIDA selaku agensi pelaburan utama negara juga sentiasa bekerjasama secara strategik dengan Kerajaan Negeri, Koridor Ekonomi dan agensi-agensi berkaitan dalam melipat gandakan usaha-usaha mempromosi dan menarik pelaburan terutamanya dalam industri yang disasarkan.

Bagi negeri Johor, MIDA sentiasa bekerjasama erat dengan Bahagian Perancang Ekonomi Negeri Johor (BPENJ), Invest Johor dan agensi serta jabatan berkaitan dalam mempromosikan peluang pelaburan yang terdapat di negeri Johor.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SRI AZALINA OTHMAN SAID
[PENGERANG]**

TARIKH : 01 MAC 2022 (SELASA)

SOALAN

DATO' SRI AZALINA OTHMAN SAID [PENERANG] minta **KEMENTERIAN PERDAGANGAN ANTARABANGSA DAN INDUSTRI** menyatakan apakah hasil Kementerian dalam **penelitian laporan** penuh dakwaan oleh Amerika Syarikat (AS) bahawa Top Glove Corp Bhd menggunakan buruh paksa dalam operasinya dan **jumlah kerugian** akibat sekatan dan rampasan pihak berkuasa AS ke atas produk Top Glove.

JAWAPAN

Tuan Yang Di Pertua,

Pada 15 Julai 2020, Jabatan Kastam dan Perlindungan Sempadan Amerika Syarikat (*US Customs & Border Protection* atau CBP) telah mengeluarkan Perintah *Withhold Release Order* atau WRO ke atas syarikat Top Glove Corporation Bhd. atas dakwaan amalan buruh paksa dalam proses pengeluaran, termasuk ikatan hutang pekerja, kerja lebih masa yang melampau, melanggar syarat persekitaran dan kemudahan tempat kerja dan penginapan serta penahanan dokumen pengenalan diri.

Walaupun bagaimanapun, sekatan WRO tersebut telah dibatalkan pada 10 September 2021 setelah CBP berpuas hati dengan bukti dan tindakan yang telah diambil oleh syarikat Top Glove termasuk pembayaran pampasan kepada pekerja dan memperbaiki kemudahan tempat kerja serta penginapan pekerja.

SOALAN NO : 19

Menurut maklumat yang diperoleh daripada *Malaysian Rubber Glove Manufacturers Association* (MARGMA), kerugian yang dianggarkan dialami oleh syarikat Top Glove dalam tempoh WRO yang dikenakan oleh US CBP adalah sebanyak RM3.6 billion.

Bagi memastikan sektor perindustrian mematuhi garis panduan, undang-undang dan amalan perburuhan yang ditetapkan, samada di peringkat domestik mahupun antarabangsa, MITI sentiasa bekerjasama dengan Kementerian dan agensi kerajaan yang lain dalam memantau dan mengkaji semula dasar negara berkaitan isu buruh.

MITI sentiasa komited dalam usaha meningkatkan kesedaran dan pematuhan dasar semasa termasuk berkaitan hak asasi manusia dalam kalangan pemain industri negara dan pelabur asing. Terbaharu, MITI telah mengadakan sesi libat urus pada 18 Februari 2022 bersama Kedutaan Amerika Syarikat dan ahli-ahli *Malaysian Rubber Glove Manufacturers Association* (MARGMA) untuk meneliti dan membincangkan tindakan yang perlu diambil oleh pemain industri bagi memastikan sekatan WRO terhadap syarikat sarung tangan getah Malaysia dapat dibatalkan dan dielakkan pada masa hadapan.

MITI akan terus bekerjasama dengan pihak berkepentingan khususnya pihak industri dalam menerapkan nilai etika dan pematuhan peraturan bagi mengelakkan amalan buruh paksa dan meningkatkan kesedaran mengenai amalan pekerja yang baik oleh industri.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN HAJI MOHAMMAD BIN SABU
(KOTA RAJA)**

TARIKH : 1 MAC 2022 (SELASA)

SOALAN

TUAN HAJI MOHAMAD BIN SABU (KOTA RAJA) minta **MENTERI LUAR NEGERI** menyatakan apakah ada usaha-usaha daripada pihak Malaysia untuk mempengaruhi Persidangan Negara-Negara Islam (OIC) bagi memperjuangkan hak rakyat Palestin untuk kembali ke tanah air mereka sebagaimana yang dijamin oleh Pertubuhan Bangsa Bangsa Bersatu (PBB).

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Kota Raja atas pertanyaan yang dikemukakan.

Tuan Yang di-Pertua,

2. Seperti mana Yang Berhormat sedia maklum, Malaysia sentiasa terlibat secara aktif dan proaktif terhadap usaha bagi mengangkat perjuangan Palestin di pelbagai peringkat dan platform antarabangsa.

3. Penlibatan aktif Malaysia di OIC dalam mempengaruhi keputusan Organisasi tersebut mengenai isu Palestin bukanlah suatu yang baharu. Malaysia merupakan ahli anggota kepada semua Kumpulan Perhubungan (*Contact Group*) mengenai Palestin di OIC, iaitu Jawatankuasa Enam OIC Mengenai Palestin dan Kumpulan Perhubungan dalam Mempertahankan Perjuangan Palestin dan Al-Quds Al-Sharif. Melalui dua platform sedia ada ini, Malaysia sentiasa mengambil peranan utama dan lantang dalam mengetengahkan pendirian negara terhadap permasalahan yang dihadapi oleh Palestin dan seterusnya memastikan agenda Palestin kekal segar dalam perhatian masyarakat antarabangsa.

4. Untuk makluman Dewan yang mulia ini, pada 16 Mei 2021, OIC telah mengadakan Mesyuarat Tergepar Secara Maya di Peringkat Menteri-Menteri Luar Negeri mengenai 'Pencerobohan oleh Israel di Wilayah Palestin yang Dijajah, Khususnya terhadap Al-Quds Al-Shareef'.

5. Semasa mesyuarat tergepar tersebut, Malaysia telah mengemukakan 6 (enam) usul utama kepada OIC sebagai usaha penyelesaian terhadap konflik Palestin dan Israel. Sebagai hasil mesyuarat, kesemua negara anggota OIC telah bersetuju untuk menerima pakai satu resolusi OIC yang turut mengambilkira 6 (enam) usul Malaysia, yang antara lainnya, mendesak komuniti

antarabangsa untuk menyumbang secara maksimum kepada Penyelesaian Dua Negara terhadap konflik Palestin dan Israel.

6. Tindakan lanjut dari resolusi yang diterima pakai tersebut telah berjaya mendesak Perhimpunan Agung PBB (UNGA) mengadakan Mesyuarat Tergempar pada 20 Mei 2021 untuk membincangkan serangan yang dilakukan oleh Israel di Palestin. Mesyuarat ini telah mendapat perhatian meluas dan secara tidak langsung, menzahirkan sokongan padu dan kebersamaan masyarakat antarabangsa kepada Palestin.

7. Lanjutan daripada resolusi OIC tersebut juga, Majlis Hak Asasi Manusia (MHAM) telah bersidang dan menerima pakai satu resolusi mengenai "Situasi Hak Asasi Manusia di Wilayah Palestin yang Diduduki, termasuk Baitulmaqdis Timur", pada 27 Mei 2021. Resolusi tersebut antara lainnya telah memutuskan supaya MHAM menubuhkan sebuah suruhaniaya siasatan dengan mandat untuk menyiasat dakwaan mengenai pelanggaran undang-undang hak asasi manusia dan kemanusiaan yang berlaku di wilayah terbabit.

Tuan Yang di-Pertua,

8. Langkah-langkah yang diambil Malaysia seperti saya sebutkan secara ringkas tadi, adalah sebahagian rangkuman usaha terkini Malaysia bagi menganqkat periuangan Palestin dan menqgesa masyarakat antarabangsa termasuk OIC dan PBB untuk menggembelng tenaga dan sumber dalam mencari penyelesaian berkekaln terhadap konflik Palestin dan Israel.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

**DARIPADA : TUAN HAJI WAN HASSAN BIN MOHD
RAMLI [DUNGUN]**

TARIKH : 01 MAC 2022 (SELASA)

SOALAN

minta **PERDANA MENTERI** menyatakan sama ada Kerajaan berhasrat mewajibkan penggunaan Bahasa Melayu dalam semua acara melibatkan Kementerian dan agensi Kerajaan di dalam negara pada waktu ini dalam usaha memartabatkan Bahasa Kebangsaan.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan yang Dipertua,

1. Perkara 152 Perlembagaan Persekutuan memperuntukkan bahasa kebangsaan di Malaysia ialah bahasa Melayu. Kedudukan bahasa Melayu sebagai bahasa kebangsaan tidak menafikan kedudukan dan hak bahasa lain. Akta Bahasa Kebangsaan 1963/67 (Akta 32) juga memperuntukkan bahawa Bahasa Kebangsaan hendaklah digunakan bagi maksud rasmi.

2. Dalam usaha memastikan penggunaan bahasa kebangsaan sewajarnya dalam perkhidmatan awam, Kerajaan telah memperkenalkan

Pekeliling Perkhidmatan Bilangan 1 Tahun 2020 - Pemerkasaan Penggunaan Bahasa Kebangsaan Dalam Perkhidmatan Awam dengan tujuan untuk memperkasakan penggunaan Bahasa Kebangsaan bagi urusan rasmi dalam perkhidmatan awam.

3. Dalam hal ini, semua urusan dan perjalanan pentadbiran perlulah dijalankan dalam bahasa kebangsaan, termasuklah perkhidmatan kaunter, pengiklanan kekosongan jawatan Perkhidmatan Awam, maklum balas aduan dan isu dalam media massa, surat dalam negara, dokumen perjanjian dalam negara, urusan melibatkan kehadiran warganegara, dan penganjuran majlis rasmi melibatkan kehadiran warganegara Malaysia. Namun, Bahasa Inggeris digunakan bersekali dengan bahasa kebangsaan apabila terdapat majlis rasmi yang melibatkan kehadiran bukan warganegara Malaysia.

4. Dalam penganjuran acara melibatkan Kementerian dan agensi Kerajaan di dalam negara pada waktu ini, Ketua Jabatan dan pegawai awam perlulah mematuhi pekeliling ini dan memastikan penggunaan bahasa kebangsaan yang baik dan betul dalam semua urusan rasmi ke arah memartabatkan Bahasa Kebangsaan.

5. Antara usaha memartabatkan bahasa kebangsaan yang boleh dilaksanakan termasuklah pembangunan modal Insan Berteraskan Bahasa Kebangsaan seperti pentauliahan dan pelantikan Munsyi Muda Bahasa, pengauditan Bahasa Kebangsaan dan pengiktirafan dan penghargaan kepada pegawai dan agensi kerajaan yang komited memperkasakan bahasa kebangsaan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN NGA KOR MING [TELUK INTAN]

TARIKH : 01 MAC 2022 (SELASA)

SOALAN

TUAN NGA KOR MING [TELUK INTAN] minta **KEMENTERIAN PERDAGANGAN ANTARABANGSA DAN INDUSTRI** menyatakan: -

(a) jumlah dana sebenar pelabur asing yang masuk melabur dalam negara kita mengikut tahun dari 2019 hingga 2021; dan

(b) apakah langkah-langkah yang sedang diambil oleh Kerajaan untuk mengatasi masalah yang dinyatakan dalam laporan UNCTAD yang mana kedudukan negara dalam menarik pelaburan asing sudah merosot dari tangga kedua jatuh ke tangga kelima di ASEAN selepas Singapura, Indonesia, Vietnam dan Filipina.

JAWAPAN

Tuan Yang di-Pertua,

Pada tahun 2019, jumlah pelaburan asing yang diluluskan dalam ekonomi adalah sebanyak RM146.8 bilion. Bagi tahun 2020 pula, jumlah yang telah diluluskan pula adalah sebanyak RM118.2 bilion. Manakala, bagi tempoh Januari sehingga September 2021, jumlah pelaburan asing yang diluluskan adalah sebanyak RM208.1 bilion. Secara keseluruhan, sektor perkilangan adalah penyumbang terbesar kepada nilai pelaburan yang diluluskan iaitu sebanyak RM204.7 bilion, diikuti sektor perkhidmatan dengan pelaburan sebanyak RM23.3 bilion dan sektor utama dengan pelaburan sebanyak RM8.4 bilion.

Manakala, jumlah pelaburan asing dalam sektor perkilangan yang telah direalisasikan bagi tempoh tahun 2019 ialah RM38.5 bilion. Bagi tahun 2020, jumlah pelaburan yang telah direalisasikan pula adalah RM10.8 bilion. Seterusnya, bagi tempoh Januari hingga September 2021, jumlah tersebut adalah sebanyak RM55 bilion. Secara umumnya, projek-projek perkilangan yang diluluskan akan mengambil masa 18 hingga 24 bulan untuk dilaksanakan.

Kerajaan mengambil maklum lanskap FDI akan kekal mencabar dan kompetitif seperti yang dilaporkan oleh Pertubuhan Bangsa-Bangsa Bersatu Mengenai Perdagangan dan Pembangunan (*United Nations Conference on Trade and Development-UNCTAD*). Kerajaan tidak meremehkan laporan-laporan ini malahan telah mengambil tindakan yang agresif dan berterusan, bukan sekadar untuk mengawal penyusutan tetapi berusaha untuk mencerdaskan pelaburan asing negara. Usaha ini juga bertujuan untuk mencapai tahap pemulihan ekonomi negara.

Seperti yang kita dapat lihat, hasil daripada tindakan ini, Malaysia terus merekodkan pencapaian yang memberangsangkan. Jumlah pelaburan asing yang diluluskan dari tahun 2019 sehingga September 2021 telah meningkat secara beransur-ansur, serta jumlah pelaburan asing pada tahun 2021 telah mencapai tahap tertinggi baharu. Kedudukan Malaysia yang strategik serta persekitaran perniagaan yang kondusif menyebabkan Malaysia terus dilihat sebagai sebuah negara yang

kompetitif dan berdaya saing, menarik minat dan menyakinkan pelabur untuk memilih Malaysia sebagai destinasi pelaburan mereka.

Dalam perkembangan terkini, kenyataan ini telah dizahirkan melalui pengiktirafan dari institusi terkemuka *Milken Institute Global Opportunity Index 2022* yang menobatkan Malaysia sebagai destinasi pelaburan yang paling menarik di kalangan negara Asia Selatan Timur (*southeast Asia*) bagi pelabur asing.

Malaysia akan lebih selektif dan menyasarkan untuk menarik pelaburan yang berkualiti dan berimpak tinggi dan tidak lagi menerima pelaburan yang mempunyai elemen *low end assembly-type operations and labour-intensive projects*. Kerajaan sedar akan keperluan dan kepentingan untuk membangunkan sektor industri yang berteraskan teknologi tinggi dan mempunyai nilai tambah terhadap ekosistem industri di negara ini sebagai usaha untuk terus mengekalkan reputasi Malaysia sebagai sebuah negara perindustrian yang kompetitif bagi menarik pelaburan dari syarikat ternama global.

Antara langkah yang dilaksanakan oleh Kerajaan untuk menarik pelaburan asing adalah seperti berikut:-

- i. Menawarkan pakej pengecualian cukai istimewa di bawah PENJANA bagi menggalakkan syarikat asing memindah (*relocate*) operasinya ke Malaysia atau menjalankan pelaburan baru dalam sektor perkilangan dan perkhidmatan dan menjadikan negara ini sebagai pusat rangkaian bekalan antarabangsa;
- ii. Menubuhkan Unit Penyelarasan dan Kemajuan Projek (PACU) di bawah Lembaga Pembangunan Pelaburan Malaysia (MIDA) untuk mempercepatkan proses kelulusan dari pelbagai agensi dan pelaksanaan projek pelaburan. Operasi PACU adalah disokong secara automasi digital melalui sistem *Implementation Tracking and Monitoring System* (ITMS). ITMS bukan saja dapat memantau projek secara *real-time*, malah sistem interaktif ini membolehkan para pelabur melaporkan status semasa secara terus selain dapat berhubung secara langsung dengan pegawai PACU bagi tujuan fasilitasi dan khidmat sokongan secara live menerusi sistem tersebut;

- iii. Mempertingkatkan aktiviti penggalakan pelaburan bagi memastikan kedudukan Malaysia kekal kompetitif sebagai destinasi pelaburan pilihan melalui aktiviti-aktiviti berikut:-
- a. Pelaksanaan Misi Perdagangan dan Pelaburan ke luar negara. Bagi tempoh Januari sehingga Oktober 2021, MITI bersama MIDA dan Perbadanan Pembangunan Perdagangan Luar Malaysia (MATRADE) telah melaksanakan Misi Perdagangan dan Pelaburan ke Jepun, Republik Korea, Arab Saudi, Emiriah Arab Bersatu, Qatar, Republik Austria, Republik Turki, Jerman, Perancis dan United Kingdom. Misi ini telah berjaya mendapatkan komitmen pelaburan yang tinggi iaitu sebanyak RM50.07 bilion dan berpotensi menjana lebih daripada 30,083 peluang pekerjaan;
 - b. Penganjuran webinar dengan kolaborasi bersama dewan perniagaan, bank dan komuniti perniagaan antarabangsa seperti American Malaysian Chamber of Commerce (AMCHAM), Malaysian-German Chamber of Commerce and Industry (MGCC), British Malaysian Chamber of Commerce Berhad (BMCC), Malaysian French Chamber of Commerce and Industry (MFCCI), EU-Malaysia Chamber of Commerce and Industry (EUROCHAM), China Enterprises Chamber of Commerce in Malaysia (CECCM), Deloitte, KPMG, HSBC, Standard Chartered dan UOB Bank;
 - c. Menandatangani perjanjian persefahaman (MoU) dengan pelbagai pihak berkepentingan seperti dewan perniagaan antarabangsa, institusi kewangan, agensi promosi pelaburan, syarikat multinasional, dan pemaju tanah;
 - d. Pelaksanaan E-Misi Pelaburan Khusus (*E-Specific Project Mission*) oleh MIDA bersama pelabur berpotensi di luar dan dalam negara secara maya;

SOALAN NO : 22

- e. Menjalankan *media blitz* bagi mempromosikan Malaysia melalui media antarabangsa termasuk Bloomberg dan The Economist; dan
- iv. Penubuhan Pusat Sehenti (*One Stop Centre-OSC*) pada 2 Oktober 2020 di MIDA untuk menilai permohonan oleh pelawat perniagaan yang layak untuk memasuki Malaysia untuk tujuan perdagangan dan pelaburan. Inisiatif ini dikendalikan oleh MIDA dengan kerjasama dari Jabatan Imigresen, Kementerian Kesihatan (KKM) dan MITI. Setakat 4 Februari 2022, OSC telah meluluskan jumlah 5,043 Short Term Business Travellers (STBTs) dengan nilai pelaburan sebanyak RM167.82 bilion.
- v. Memperkenalkan Dasar Pelaburan Baharu Negara Berteraskan Aspirasi Pelaburan Nasional (*National Investment Aspirations-NIA*). Pembaharuan kepada agenda pelaburan ini melibatkan lima (5) teras utama, iaitu, meningkatkan *economic complexity*; mewujudkan pekerjaan bernilai tinggi; memperluaskan rangkaian domestik; membangunkan kluster baharu dan sedia ada; serta mempertingkatkan keterangkuman. NIA akan memberi fokus kepada sektor yang mempunyai potensi ekonomi yang signifikan dan lestari dalam jangka masa panjang, dengan penekanan yang lebih terhadap elemen alam sekitar, sosial dan tadbir urus (*Environment, Social and Governance – ESG*);
- vi. NIA akan diintegrasikan ke dalam semua strategi pembangunan Negara khususnya dalam penyediaan Rancangan Malaysia Ke-12 (RMK-12) dan Pelan Induk Perindustrian Baharu (NIMP) serta dilihat selari dengan aspirasi Wawasan Kemakmuran Bersama 2030; dan
- vii. Melancarkan Pejabat Pelaburan Digital (DIO) pada 23 April 2021 untuk melibatkan Malaysia dalam kepesatan kemajuan teknologi digital. Peranan DIO adalah sejajar dengan Rangka Tindakan MyDIGITAL untuk menarik pelaburan bernilai RM70 bilion dalam sektor digital sehingga tahun 2025;

SOALAN NO : 22

Secara kesimpulannya, Kerajaan akan terus berusaha bagi menarik pelaburan langsung asing yang berkualiti tinggi ke Malaysia, antara lain, bagi mewujudkan peluang pekerjaan, membangunkan tenaga kerja yang mahir dan memupuk pertumbuhan syarikat-syarikat tempatan. Usaha ini dapat mempercepatkan pemulihan, meningkatkan pertumbuhan ekonomi negara, memberi manfaat yang signifikan kepada rakyat serta memastikan Malaysia kekal sebagai destinasi pilihan pelabur.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK ZAKARIA BIN MOHD EDRIS@TUBAU
[LIBARAN]**

TARIKH : 01 MAC 2022 (SELASA)

SOALAN

DATUK ZAKARIA BIN MOHD EDRIS@TUBAU [LIBARAN] minta **KEMENTERIAN PERDAGANGAN ANTARABANGSA DAN INDUSTRI** menyatakan **inisiatif** yang dilaksanakan oleh Kementerian dalam mempromosikan Bajet 2022 dan RMK-12 kepada rakan-rakan perdagangan sedunia di alaf pasca COVID-19 serta cabaran ekonomi global yang dinamik.

JAWAPAN

Tuan Yang Dipertua,

Bajet 2022 dengan belanja keseluruhan sebanyak RM332.1 bilion merupakan bajet tertinggi berbanding tahun sebelumnya. Bertemakan Keluarga Malaysia, Makmur Sejahtera, Bajet 2022 disokong oleh Rancangan Malaysia Kedua Belas (RMKe-12) dan diyakini akan dapat mencerdaskan ekonomi negara dan merancakkan semula kegiatan perniagaan pasca pandemik COVID-19.

Bajet 2022 dan RMKe-12 penting dalam meyakinkan komuniti perniagaan antarabangsa dan domestik terhadap asas utama dan daya saing ekonomi Malaysia. Dalam Bajet 2022, pelbagai insentif ditawarkan termasuk bantuan dalam bentuk pengecualian cukai, geran padanan, pinjaman mudah, memudahcara kemasukan pelabur serta pelaksanaan peraturan tangkas (*agile regulation*). Kesemuanya bertujuan untuk mengukuhkan daya tahan industri tempatan, menyegerakan integrasi ke dalam rangkaian bekalan global serta membina ekosistem perniagaan yang mampan seiring dengan trend mega semasa dunia. Di bawah RMKe-12 pula, strategi-strategi yang digariskan di bawah fokus pertumbuhan ekonomi adalah untuk melonjakkan industri berimpak tinggi seperti elektrik dan elektronik, perkhidmatan global, aeroangkasa dan Halal.

MITI dan Agensi telah melaksanakan pelbagai program untuk mempromosikan inisiatif yang digariskan di bawah Bajet 2022 dan RMKe-12 kepada rakan perdagangan sedunia bagi memastikan kerjasama erat dan hubungan yang baik serta memacu ekonomi negara. Antara program adalah:

- i. menganjurkan Misi Perdagangan dan Pelaburan;
- ii. meratifikasi perjanjian perdagangan seperti *Regional Comprehensive Economic Partnership* (RCEP) yang akan berkuatkuasa pada 18 Mac 2022 dan melaksanakan usaha meratifikasi *Comprehensive and Progressive Agreement for Trans-Pacific Partnership* (CPTPP);

SOALAN NO : 23

- iii. menubuhkan *Business Traveller Centre* (BTC) di Lapangan Terbang Antarabangsa Kuala Lumpur (KLIA) dan Laluan Kedua Malaysia-Singapura (Linkedua) di Johor di bawah Inisiatif Pusat Setempat (*One Stop Centre*) untuk memudahkan kemasukan pelawat perniagaan;
- iv. menubuhkan Pejabat Pelaburan Digital (*Digital Investment Office*) untuk menyegerakan dan menyelaraskan proses permohonan pelaburan digital;
- v. menjalankan E-Misi Pelaburan Khusus (*E-Specific Project Mission*) bersama pelabur berpotensi di luar dan dalam negara secara maya untuk menarik lebih banyak pelaburan ke Malaysia;
- vi. menandatangani Perjanjian Persefahaman (MoU) dengan pelbagai pihak berkepentingan seperti dewan perniagaan antarabangsa, institusi kewangan, agensi promosi pelaburan, syarikat multinasional dan pemaju hartanah untuk menarik pelaburan berkualiti;
- vii. menganjurkan webinar secara kolaborasi bersama dewan perniagaan, bank antarabangsa dan firma khidmat runding kewangan antarabangsa;
- viii. menjalankan kempen media (*media blitz*) bagi tujuan mempromosikan Malaysia melalui media antarabangsa termasuk Bloomberg dan The Economist; dan
- ix. menyediakan *e-newsletter* yang diterbitkan secara bulanan serta terbitan lain bagi menyebarkan maklumat mengenai ekosistem pelaburan dan peluang perniagaan di Malaysia kepada pemain industri tempatan dan antarabangsa.

Antara inisiatif Bajet 2022 dan RMKe-12 yang berkaitan secara langsung dengan MITI dan Agensi adalah:

- i. Pakej Insentif di bawah Dasar Pembangunan Industri Kenderaan Elektrik;

SOALAN NO : 23

- ii. Dasar *Industry4WRD* bagi menggalakkan syarikat tempatan, khususnya syarikat perusahaan kecil dan sederhana (PKS) untuk mengaplikasi teknologi Industri 4.0 di dalam operasi syarikat;
- iii. Geran Automasi Pintar yang bertujuan menyegerakan automasi dan digitalisasi dalam aktiviti perkilangan dan perkhidmatan, di kalangan PKS;
- iv. Dana Khas Pelaburan Strategik untuk menarik pelaburan strategik oleh syarikat multinasional;
- v. Program Pembangunan Syarikat Peringkat Pertengahan (*Mid-Tier Companies Development Programme*) untuk memperkukuhkan daya saing dan operasi syarikat menembusi pasaran serantau dan global;
- vi. Dana Eksport Perkhidmatan (*Services Export Fund – SEF*) yang merupakan geran bayaran balik untuk meningkatkan daya saing eksport perkhidmatan Malaysia;
- vii. Skim *Digital Ecosystem Acceleration* (DESAC) yang menawarkan galakan cukai kepada syarikat penyedia teknologi digital dan penyedia infrastruktur digital; dan
- viii. Penambahbaikan prestasi daya saing negara melalui Amalan Baik Peraturan.

Kesemua inisiatif ini turut disinergikan dengan dasar utama terkini diterajui MITI seperti Aspirasi Pelaburan Nasional, Pelan Tindakan Perdagangan Nasional (*National Trade Blueprint*) dan Pelan Induk Perindustrian Baharu yang mana kesemua dokumen dasar ini turut memberikan keutamaan ke atas komponen alam sekitar, sosial dan tadbir urus. Ini adalah seiring dengan aspirasi Kerajaan dan trend semasa global ke arah karbon sifar bersih. Dalam masa yang sama, MITI dan Agensi juga akan terus aktif meningkatkan keterlibatan syarikat Malaysia di luar negara melalui kerjasama strategik di dalam pelbagai platform perdagangan termasuk platform digital yang semakin relevan dengan norma baharu pascaCOVID-19.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN AHMAD FADHLI BIN SHAARI
[PASIR MAS]**

TARIKH : 1 MAC 2022 (SELASA)

SOALAN :

Minta **PERDANA MENTERI** menyatakan menyatakan status Pindaan Akta Mahkamah Syariah (Bidang Kuasa Jenayah) 1965 atau Akta 355.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI (HAL EHWAL ISLAM)**

Tuan Yang di-Pertua,

1. Kerajaan amat komited untuk menggubal Rang Undang-Undang Mahkamah Syariah (Bidang Kuasa Jenayah) (Pindaan) ("RUU 355").
2. Sepanjang tahun 2020 dan 2021 Kerajaan melalui Jawatankuasa Teknikal Undang-Undang Syarak dan Sivil ("Jawatankuasa Teknikal") yang ditubuhkan oleh Majlis Raja-Raja di bawah Majlis Kebangsaan Bagi Hal Ehwal Ugama Islam (MKI) telah mengadakan beberapa siri mesyuarat bagi membincangkan RUU 355 dengan melihat dari pelbagai aspek khususnya aspek perlembagaan, undang-undang dan hukum Syarak agar RUU 355 tersebut lebih komprehensif dan seterusnya dapat memperkasa bidang kuasa jenayah mahkamah Syariah.
3. RUU 355 tersebut telah dibentangkan kepada negeri-negeri

dalam Persidangan Penyelarasan Undang-Undang Syarak dan Sivil ke-27 pada 11 dan 12 Oktober 2021 yang lepas. Input dan pandangan yang diperoleh daripada negeri-negeri dalam persidangan tersebut akan dibincangkan dan dimuktamadkan dalam mesyuarat Jawatankuasa Teknikal.

4. Setelah penggubalan RUU 355 dimuktamadkan kelak, taklimat atau penerangan berhubung dengan RUU 355 tersebut akan diberikan kepada semua ahli Parlimen sebelum dibentangkan dalam Dewan yang Mulia ini.

5. Dalam pada masa yang sama, Kerajaan juga sedang dalam usaha untuk memberikan penerangan kepada orang ramai berkenaan dengan tujuan sebenar Akta 355 ini dipinda. Ini bagi mengelakkan berlaku salah faham dan timbul polemik yang tidak berkesudahan berhubung dengan perkara tersebut apabila dibentangkan di Parlimen kelak.

6. Selain itu, aspek pemeraksanaan Mahkamah Syariah bukan sahaja tertumpu terhadap isu bidang kuasa atau had hukuman di bawah Akta Mahkamah Syariah (Bidang Kuasa Jenayah) [Akta 355], akan tetapi ia meliputi pelbagai aspek yang lebih penting seperti peningkatan tahap kompetensi Hakim, Pendakwa Syarie dan Pegawai Penguatkuasa Agama, penambahbaikan aspek tadbir urus dan prasarana, penggubalan dan pindaan undang-undang syariah sedia ada dan penyeragaman dan penyelarasan undang-undang syariah.

7. Bagi maksud tersebut, Kerajaan telah menubuhkan semula Jawatankuasa Memperkasakan Mahkamah Syariah (JKMMS) yang berperanan untuk mengkaji secara holistik cadangan yang boleh meningkatkan status dan kedudukan mahkamah syariah termasuklah dari segi kemudahan infrastruktur, peningkatan kompetensi pegawai dan kedudukan serta status pegawai-pegawai Mahkamah Syariah.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : TUAN AHMAD FAHMI BIN MOHAMED FADZIL
[LEMBAH PANTAI]**

TARIKH : 01 MAC 2022 (SELASA)

SOALAN

TUAN AHMAD FAHMI BIN MOHAMED FADZIL [LEMBAH PANTAI]
minta **PERDANA MENTERI** menyatakan apakah langkah-langkah Kerajaan bagi melaksana transformasi atau reformasi institusi penguatkuasaan seperti Suruhanjaya Pencegahan Rasuah Malaysia dengan antara lain meletakkannya di bawah Parlimen.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, sejak tahun 2009 lagi Suruhanjaya Pencegahan Rasuah Malaysia (SPRM) telah di pantau oleh lima (5) panel bebas iaitu Lembaga Penasihat Pencegahan Rasuah (LPPR), Jawatankuasa Khas Mengenai Rasuah (JKMR), Jawatankuasa Aduan (JKA), Panel Perundingan dan Pencegahan Rasuah (PPPR) dan Panel Penilaian Operasi (PPO).

Pelan Antirasuah Nasional (NACP) 2019-2023 telah mengariskan tindakan menyeluruh dan bersepadu dalam memerangi masalah rasuah, integriti dan tadbir urus dalam negara. Pelan ini turut mensasarkan objektif dalam memperkukuhkan agensi penguatkuasaan undang-undang. Antara inisiatif tersebut ialah memperkasakan Suruhanjaya Pencegahan Rasuah Malaysia (SPRM) khususnya dalam urusan pelantikan Ketua Pesuruhjaya dan penubuhan Suruhanjaya Perkhidmatan Pencegahan Rasuah (SPPR) yang mana beberapa cadangan ini akan turut melibatkan pindaan ke atas Perlembagaan Persekutuan.

Tindakan ke arah pelaksanaan inisiatif ini masih berjalan dengan beberapa sesi libat urus bersama pihak-pihak berkepentingan seperti Jabatan Peguam Negara (AGC), Kementerian Kewangan (MOF), Jabatan Perkhidmatan Awam (JPA) dan lain-lain masih giat dijalankan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI PANGLIMA HAJAH AZIZAH BINTI
DATUK SERI PANGLIMA HAJI MOHD DUN
[BEAUFORT]**

TARIKH : 1 MAC 2022 (SELASA)

SOALAN

**DATUK SERI PANGLIMA HAJAH AZIZAH BINTI DATUK SERI
PANGLIMA HAJI MOHD DUN [BEAUFORT]** minta **PERDANA MENTERI**
menyatakan adakah SPR bercadang untuk mengemas kini daftar pengundi
yang kini menetap di daerah atau negeri lain bagi mengurangkan jumlah
pengundi luar.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, Suruhanjaya Pilihan Raya Malaysia (SPR) melaksanakan urusan pendaftaran pemilih baharu pendaftaran pertukaran bahagian pilihan raya berdasarkan alamat mastautin warganegara atau pemilih seperti dalam rekod Jabatan Pendaftaran Negara. SPR tidak diperuntukkan kuasa untuk memindahkan mana-mana pemilih berdaftar melainkan pemilih berdaftar memohon pertukaran bahagian pilihan dengan SPR.
2. Berdasarkan Peraturan 25(2) Peraturan-Peraturan Pilihan Raya (Pendaftaran Pemilih) 2002, SPR diperuntukkan kuasa untuk mengemaskini daftar pemilih iaitu mengeluarkan nama pemilih yang disahkan telah meninggal dunia atau hilang taraf kewarganegaraan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN AHMAD JOHNIE BIN ZAWAWI [IGAN]

TARIKH : 1 MAC 2022 (SELASA)

SOALAN

TUAN AHMAD JOHNIE BIN ZAWAWI [IGAN] minta **PERDANA MENTERI** menyatakan adakah tuntutan mengenai 50 peratus Cukai Persekutuan yang dikutip di Sarawak dikembalikan ke Sarawak dan menaikkan royalti minyak turut dibincangkan di dalam Majlis Khas mengenai Perjanjian Malaysia 1963 (MKMA63).

**JAWAPAN: YB DATUK SERI PANGLIMA DR. MAXIMUS JOHNTY
ONGKILI MENTERI DI JABATAN PERDANA MENTERI
(HAL EHWAL SABAH DAN SARAWAK)**

Tuan Yang di-Pertua,

Untuk makluman Ahli Yang Berhormat, tiada rujukan sama ada di dalam Inter-Governmental Committee (IGC) mahupun di dalam dokumen Perjanjian Malaysia 1963 (MA63) berkenaan isu tuntutan 50 peratus Cukai Persekutuan yang dikutip di Sarawak. Berbeza dengan negeri Sabah yang secara khusus menyebut berkenaan 40 peratus hasil dipulangkan kepada negeri Sabah seperti dalam Perlembagaan Persekutuan (Perkara 112D).

Walau bagaimanapun, di bawah Majlis Khas MA63, Jawatankuasa Perundingan Bersama (*Joint-Consultative Committee – JCC*) yang diterajui oleh Kementerian Kewangan telah ditubuhkan khusus di Sabah bagi Majlis Khas MA63 membincangkan tuntutan kewangan oleh Kerajaan Negeri Sabah dan Kerajaan Negeri Sarawak. Pada masa ini, JCC sedang menumpukan perbincangan mengenai Kajian Semula Pemberian Khas di bawah Perkara 112D, Perlembagaan Persekutuan. Sekiranya terdapat keperluan, lain-lain tuntutan berkaitan kewangan seperti royalti minyak boleh dibincangkan dalam jawatankuasa yang sama pada masa hadapan.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN NGA KOR MING (TELUK INTAN)

TARIKH : 1 MAC 2022 (SELASA)

SOALAN

TUAN NGA KOR MING (TELUK INTAN) meminta **MENTERI KANAN PERTAHANAN** menyatakan secara terperinci terhadap masalah pembinaan Kapal Perang LCS (*Littoral Combat Ship*) yang telah menelan belanja RM9 bilion tapi masih tidak kesampaian :-

- (a) berapa jumlah duit telah dibayar kepada kontraktor untuk membina 6 buah kapal perang LCS (*Littoral Combat Ship*) sejak projek ini bermula pada 2013; dan
- (b) apakah tindakan Kerajaan untuk memastikan 6 kapal perang tentera laut ini siap dibina dan diserahkan mengikut jadual waktu asal pada tahun 2023. Adakah Kerajaan menjalankan tender terbuka dalam projek pertahanan bernilai RM9 bilion ini.

JAWAPAN

Tuan Yang di-Pertua,

Kementerian Pertahanan telah menyatakan beberapa kali sebelum ini bahawa tidak dinafikan sememangnya terdapat masalah dalam perolehan *Littoral Combat Ship* (LCS). Walau bagaimanapun, ini bukanlah masalah baru yang timbul kerana ia turut diakui oleh kepimpinan Kementerian Pertahanan yang terdahulu.

Perolehan LCS dilaksanakan secara rundingan terus dan sehingga kini Kementerian Pertahanan telah melaksanakan pembayaran sebanyak RM6.08 bilion berdasarkan jadual pembayaran di dalam kontrak yang telah ditandatangani antara Kementerian Pertahanan dan syarikat Boustead Naval Shipyard Sdn Bhd (BNS). Namun begitu, perolehan ini telah mengalami kelewatan bermula tahun 2019.

Kelewatan perolehan ini adalah kerana pihak *Original Equipment Manufacturer* (OEM) telah memberhentikan kerja disebabkan masalah kewangan yang dihadapi pihak syarikat dan menyebabkan pembayaran kepada OEM tidak dilaksanakan mengikut jadual yang ditetapkan. Oleh yang demikian, perancangan asal untuk kapal siap pada tahun 2023 tidak dapat direalisasikan.

Sehubungan itu, pihak Kementerian memberikan penelitian khusus demi memastikan pembinaan LCS ini dapat diteruskan bagi mengukuhkan lagi sistem pertahanan dan keselamatan perairan negara. Oleh yang demikian, Kementerian sedang meneliti semula perancangan perolehan bersama dengan Agensi Pusat serta akan mengemukakan pelan pemulihannya sebelum diangkat semula ke Jemaah Menteri untuk pertimbangan sewajarnya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI HAJI MOHD. SALIM
SHARIF [JEMPOL]**

TARIKH : 1 MAC 2022 (SELASA)

SOALAN

DATUK SERI HAJI MOHD. SALIM SHARIF [JEMPOL] minta **MENTERI PERUSAHAAN PERLADANGAN DAN KOMODITI** menyatakan sebarang usaha yang telah dilaksanakan atau sedang dirangka bagi meningkatkan Paras Harga Pengaktifan (PHP) Insentif Pengeluaran Getah (IPG) kepada RM3.50 sekilogram.

JAWAPAN

Tuan Yang Di-Pertua,

Sepertimana sedia maklum, Kerajaan telah melaksanakan Insentif Pengeluaran Getah (IPG) sejak tahun 2015 bagi menjamin kebajikan pekebun kecil getah ketika krisis kejatuhan harga getah di samping memastikan pengeluaran getah domestik yang berterusan.

Bagi menilai keberkesanan pelaksanaan IPG di dalam mencapai objektif yang disasarkan, Kerajaan telah melaksanakan Kajian Impak Pelaksanaan IPG bagi Tempoh Lima (5) Tahun Pertama (2015-2020) menerusi jururunding yang dilantik. Kajian tersebut telah selesai dilaksanakan pada penghujung tahun 2021 dan beberapa cadangan penambahbaikan telah dikemukakan.

Cadangan meningkatkan Paras Harga Pengaktifan (PHP) IPG dan hasil kajian tersebut sedang disemak dengan lebih terperinci dengan mengambilkira beberapa faktor utama seperti:

- i. PHP berasaskan kepada produktiviti. Bayaran IPG bersandarkan kepada tahap produktiviti getah yang dihasilkan oleh pekebun kecil dijangka akan memotivasikan mereka untuk terus menoreh dan seterusnya dapat membantu meningkatkan pengeluaran getah negara secara berterusan (*sustainable*).
- ii. Penawaran dan permintaan getah Malaysia. Pengenalan harga lantai RM3.50 sekilogram dijangka akan mewujudkan ketidakseimbangan pasaran dan hanya menguntungkan pihak-pihak tertentu sahaja. Harga lantai ini antara lainya menyediakan ruang kepada aktiviti penyeludupan getah dari luar negara memandangkan harga getah tempatan lebih tinggi berbanding harga antarabangsa.
- iii. Kesan ke atas harga dan kualiti getah di pasaran tempatan. Kuasa pasaran adalah ditentukan oleh penawaran dan permintaan yang tidak terikat atau diganggu oleh pihak ketiga. Gangguan tersebut akan menyebabkan ketidakseimbangan pasaran serta akan mempengaruhi

harga pasaran. Tindakan ini akan mendorong sesetengah pihak untuk memanipulasi harga pasaran dan menyebabkan harga berada di paras nilai yang tidak sepatutnya. Ini akan hanya menguntungkan pihak tersebut terhadap insentif yang disediakan oleh Kerajaan.

Walaupun, bagi membantu meningkatkan pendapatan pekebun kecil dan memenuhi keperluan industri hiliran berasaskan lateks, Kerajaan sedang melaksanakan program Insentif Pengeluaran Lateks (IPL). IPL ini sebagai galakan kepada pekebun kecil beralih kepada menghasilkan susu getah (lateks) daripada getah sekerap (*cuplump*).

Setiap pekebun kecil getah yang menyertai program ini akan menerima insentif tunai sebanyak RM1.00 bagi setiap kilogram getah kering yang dihasilkan. Sebagai usaha menggalakkan amalan pertanian yang baik (GAP) di sektor kebun kecil seterusnya meningkatkan produktiviti, peserta IPL akan turut menerima bantuan dalam bentuk input pertanian seperti baja dan racun yang berjumlah RM850.00 bagi setiap hektar secara sekali beri (*one-off*).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : TUAN LIM LIP ENG [KEPONG]

TARIKH : 01 MAC 2022 (SELASA)

SOALAN:

Minta **PERDANA MENTERI** menyatakan jabatan-jabatan Kerajaan manakah yang menyediakan air botol jenama 'Evian' percuma semasa mesyuarat dijalankan. Sekiranya air Evian tersebut ditaja oleh pihak swasta, siapakah nama penaja itu dan agendanya.

JAWAPAN

**YB DATUK DR. HJ. ABDUL LATIFF BIN AHMAD,
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Untuk makluman Ahli Yang Berhormat, penyediaan pakej makanan dan minuman dalam penganjuran sesebuah majlis rasmi oleh mana-mana Kementerian termasuk jabatan-jabatan Kerajaan adalah tertakluk di bawah Pekeliling Perbendaharaan W.P 5.1 (Peraturan Mengenai Keraian Rasmi). Keraian rasmi ini termasuklah mesyuarat yang diadakan selaras dengan peruntukan perbelanjaan yang telah ditetapkan seperti yang dijelaskan dalam pekeling berkenaan.
2. Selain daripada itu, Pegawai Pengawal Kementerian atau Jabatan Persekutuan mempunyai tanggungjawab untuk membuat perancangan yang rapi bagi mengadakan sesuatu majlis rasmi berdasarkan peruntukan belanja mengurus tahunan yang diluluskan bagi Kementerian atau jabatan masing-masing.
3. Kerajaan juga memastikan perbelanjaan dibuat dengan cekap serta mematuhi semua tatacara kewangan semasa yang berkuatkuasa termasuklah mematuhi Pekeliling Perbendaharaan W.P 5.1. Ini termasuklah penyediaan pakej makanan dan minuman bagi mesyuarat rasmi yang diadakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' RAMLI BIN DATO' MOHD NOR
[CAMERON HIGHLANDS]**

TARIKH : 1 MAC 2022 (SELASA)

SOALAN

DATO' RAMLI BIN DATO' MOHD NOR [CAMERON HIGHLANDS] minta **MENTERI PERUSAHAAN PERLADANGAN DAN KOMODITI** menyatakan apakah status program Getah Untuk Pribumi (GUP) dan adakah program tersebut masih diteruskan untuk tahun 2022.

JAWAPAN

Tuan Yang Di-Pertua,

Projek Getah Untuk Pribumi (GUP) adalah salah satu inisiatif Kementerian Perusahaan Perladangan dan Komoditi menerusi Lembaga Getah Malaysia (LGM) yang telah dimulakan pada tahun 2012 dan tamat pada tahun 2021. Untuk makluman, projek GUP ini bertujuan mewujudkan satu model rujukan dan panduan bagi masyarakat Orang Asli di Semenanjung Malaysia dan Pribumi di Sabah dan Sarawak yang ingin menanam dan mengusahakan tanaman getah di tanah mereka.

Peserta projek yang dibimbing mendapat bantuan input pertanian, maklumat dan pengetahuan teknologi tanaman getah dalam bentuk latihan serta tunjuk ajar secara in-situ dan berterusan. Mereka menjadi model kepada pekebun kecil lain di samping boleh melihat dan dijadikan contoh amalan teknologi yang diamalkan di kebun-kebun projek.

Ini termasuk jenis bahan tanaman serta klon yang baik dan bermutu tinggi, bagaimana menyelenggara tanaman getah dengan baik, menoreh dengan sistem torehan yang betul seterusnya memasar dan mendapat pendapatan yang berpatutan. Inisiatif GUP ini merupakan satu konsep membawa pengetahuan dan teknologi kepada penerima.

Selain itu, projek GUP fasa 1 ini telah melibatkan sebanyak 26 buah kampung serta 511 orang pekebun kecil getah di kalangan orang asli dan pribumi di kawasan seluas 573.97 hektar di lapan buah negeri iaitu Perak, Negeri Sembilan, Melaka, Johor, Pahang, Kelantan, Sabah dan Sarawak. Tanaman getah di kebun-kebun projek telah mula dibuka toreh seawal tahun 2017 dan kini semua peserta sedang menikmati hasil usaha mereka.

Meskipun Projek GUP adalah bersifat “one-off”, projek ini akan disambung dan dipanggil Projek GUP Fasa 2 untuk selama 6 tahun lagi (2022 - 2027) melibatkan peruntukan dalaman LGM sebanyak **RM12 juta**.

Pada tahun 2022, beberapa kawasan akan dikenalpasti untuk pelaksanaan projek ini. Sehingga kini, sebanyak 10 lokasi telah dikenalpasti melibatkan kawasan seluas 220.91 hektar. Lokasi tersebut sedang dalam penilaian kesesuaian seperti status tanah, kesesuaian ditanam getah dan sebagainya.

Di samping itu, satu lokasi telah diluluskan iaitu di Kampong Orang Asli (KOA) Machang, Gua Musang, Kelantan melibatkan 52 orang peserta dan kawasan seluas 51.8 hektar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

DARIPADA : PUAN YEO BEE YIN [BAKRI]

TARIKH : 1 MAC 2022 (SELASA)

SOALAN

PUAN YEO BEE YIN [BAKRI] minta **MENTERI ALAM SEKITAR DAN AIR** menyatakan status terkini pindaan Akta Kualiti Alam Sekeliling dan *Environmental Quality Monitoring Program (EQMP)*.

JAWAPAN

Tan Sri Yang Di-Pertua,

1. Kementerian Alam Sekitar dan Air (KASA) sedang melaksanakan pindaan Akta Kualiti Alam Sekeliling 1974 (AKAS 1974) secara berfasa. Pindaan pada Fasa 1 melibatkan elemen kompaun, penalti dan standard bagi memastikan tindakan tegas dapat diambil ke atas pelaku dan pesalah yang menyebabkan pencemaran alam sekitar. Pindaan bagi Fasa 1 ini telah selesai disemak dan sedang menunggu semakan serta kelulusan daripada Jabatan Peguam Negara.

2. Manakala bagi pindaan Fasa 2 yang akan memperkasakan AKAS 1974 secara keseluruhan, pindaan Fasa 2 masih sedang diperhalusi dan diteliti bersama pakar undang-undang alam sekitar. Berdasarkan penelitian Kementerian, draf pindaan Fasa 2 memerlukan tempoh masa yang lebih panjang kerana akan melibatkan sesi libat urus bersama pihak berkepentingan khususnya agensi kerajaan, pertubuhan bukan kerajaan, pihak industri dan pemegang taruh yang berkaitan.

Tan Sri Yang Di-Pertua,

3. Untuk makluman Yang Berhormat, berkenaan Program Pengawasan Kualiti Alam Sekitar (*Environmental Quality Monitoring Program* - EQMP), KASA melalui Jabatan Alam Sekitar (JAS) masih lagi memperhalusi cadangan penambahbaikan terutamanya bagi perkara yang melibatkan aspek teknikal, implikasi kewangan dan perundangan. Penambahbaikan EQMP ini mengambil masa kerana sekiranya penambahbaikan ini dilaksanakan, pindaan perjanjian atau mengadakan perjanjian tambahan kepada perjanjian sedia ada perlu dilaksanakan.

4. Untuk makluman, rundingan bersama syarikat konsesi sedang dijalankan bagi memastikan nilai tambah yang akan diperolehi adalah memenuhi kehendak Kerajaan termasuk selaras dengan perkembangan teknologi terkini. Kementerian berharap supaya penambahbaikan EQMP dapat memperkukuhkan perkhidmatan pengawasan oleh syarikat konsesi dan sepadan dengan jumlah peruntukan sedia ada.

5. Sehingga kini, pelaksanaan EQMP adalah berjalan mengikut perjanjian konsesi sedia ada. Kementerian akan memastikan pelaksanaan program ini adalah berdasarkan perjanjian yang dipersetujui dan akan memastikan pemerkasaan EQMP ini nanti akan memberikan nilai tambah (*value for money*) kepada Kerajaan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : TUAN ABDUL LATIFF BIN ABDUL
RAHMAN [KUALA KRAI]**

TARIKH : 01 MAC 2022 (SELASA)

SOALAN

minta **PERDANA MENTERI** menyatakan apakah inisiatif atau pendekatan yang diambil oleh Suruhanjaya Perkhidmatan Awam Malaysia (SPA) untuk meningkatkan jumlah pengambilan calon Orang Kurang Upaya (OKU) sejajar dengan Dasar Satu Peratus Peluang Pekerjaan OKU Dalam Perkhidmatan Awam.

JAWAPAN

**DI JAWAB OLEH YB DATUK DR. ABD LATIFF BIN AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Untuk makluman Ahli Yang Berhormat, Ahli Suruhanjaya daripada kalangan OKU telah dilantik menganggotai SPA.
2. SPA telah menjalinkan kerjasama pintar dengan Jabatan Kebajikan Masyarakat (JKM) melalui perkongsian maklumat calon OKU yang berdaftar dengan JKM dalam pembangunan Sistem Pendaftaran Pekerjaan SPA (SPA9). Melalui inisiatif ini, calon OKU berdaftar yang memohon pekerjaan melalui Sistem SPA9 akan dikategorikan secara automatik sebagai calon OKU, sekaligus dapat menikmati pelbagai kelonggaran dalam urusan tapisan pengambilan SPA.
3. Antara kelonggaran yang telah diberikan kepada calon OKU adalah SPA menetapkan **tapisan yang minimum** kepada mana-mana calon OKU yang memenuhi syarat skim perkhidmatan. Bagi jawatan gred 29 dan 41, tapisan minimum ditetapkan kepada mana-mana calon OKU yang menepati bidang keutamaan yang diperlukan oleh Ketua Perkhidmatan dalam suatu urusan pengambilan.
4. Pengecualian menduduki Peperiksaan Memasuki Perkhidmatan Awam (PSEE) juga diberikan kepada calon OKU sebagai langkah meningkatkan akses dan penyertaan OKU dalam perkhidmatan awam selain dapat meminimumkan persaingan calon OKU dengan calon lain.
5. Selain itu, SPA turut memberikan kelonggaran syarat dasar *One Step Lower* kepada calon OKU bagi membolehkan calon OKU memohon jawatan yang lebih rendah daripada kelayakan akademik yang dimiliki. Kelonggaran ini membuka lebih luas peluang jawatan khususnya dalam Kumpulan Pelaksana (gred 19 dan 11).

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI PANGLIMA MADIUS TANGAU
[TUARAN]**

TARIKH : 1 MAC 2022 (SELASA)

SOALAN

DATUK SERI PANGLIMA MADIUS TANGAU [TUARAN] minta **PERDANA MENTERI** menyatakan sejauh manakah pencapaian Memorandum Persefahaman (MOU) di antara Perdana Menteri dengan Pakatan Harapan setakat ini.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman, Kerajaan Bersama Pakatan Harapan telah menandatangani Memorandum Persefahaman Transformasi dan Kestabilan Politik pada 13 September 2021 yang lalu. Kerajaan komited untuk mengkaji, menilai, merangka serta melaksanakan perkara-perkara yang telah digariskan untuk dilaksanakan sepanjang tempoh memorandum persefahaman ini.

2. Sehingga kini antara perkara yang telah dilaksanakan adalah:

(i) Pemerkasaan Pelan Covid-19

- a) Majlis Pemulihan Negara dianggotai oleh 50 peratus pakar-pakar daripada sector awam dan swasta sebagai penasihat, 25 peratus Ahli Parlimen Kerajaan dan 25 peratus Ahli Parlimen Pembangkang;
- b) Kerajaan telah membentangkan kenaikan had siling Kumpulan Wang COVID-19 (KWC-19) dari RM65 bilion kepada RM110 bilion dan diluluskan secara sebulat suara di Parlimen;
- c) Di bawah Bajet 2022, Kerajaan juga telah memperuntukkan sebanyak RM2 bilion peruntukan di bawah KWC-19 khusus bagi meningkatkan dan menyegerakan usaha menyaring kes COVID-19;
- d) Bantuan tunai kepada rakyat juga ditambah baik melalui Bantuan Keluarga Malaysia (BKM) dengan nilai maksimum yang diterima oleh isi rumah yang layak ditambah baik dari

RM1,800 di bawah Bantuan Sara Hidup (BSH) kepada RM2,500 di bawah BKM;

- e) Melalui Bajet 2022 juga, Kerajaan di bawah inisiatif Jamin Kerja Keluarga Malaysia (atau JaminKerja) akan menjamin penyediaan 600 ribu peluang pekerjaan dengan peruntukan berjumlah 4.8 bilion ringgit;
- f) Program Imunisasi COVID-19 Kebangsaan (PICK) juga diperkasakan dengan peruntukan sebanyak RM2 bilion termasuk keperluan pelaksanaan vaksin kanak-kanak berusia 5 tahun dan ke atas; dan
- g) Di bawah SemarakNiaga, Kerajaan juga menyediakan peruntukan sebanyak RM40 bilion meliputi bantuan Pinjaman Mudah Kredit Mikro, Pinjaman Mudah PKS, pembiayaan alternatif serta jaminan melalui Syarikat Jaminan Pembiayaan Perniagaan (SJPP). Kesemua kemudahan yang disediakan turut diberikan tempoh moratorium tertentu.

(ii) Pindaan Perlembagaan berkaitan Perjanjian Malaysia 1963

- (a) Kerajaan telah melaksanakan pindaan kepada Perlembagaan berkaitan Perjanjian Malaysia 1963. Pindaan ini merangkumi peruntukan-peruntukan berikut:
 - 1. Fasal (2) Perkara 1 Perlembagaan Persekutuan;
 - 2. tafsiran “the Federation” di bawah Fasal (2) Perkara 160 Perlembagaan Persekutuan;
 - 3. tafsiran baharu “Malaysia Day” di bawah Fasal (2) Perkara 160 Perlembagaan Persekutuan; dan
 - 4. Fasal (6) dan (7) Perkara 161A Perlembagaan Persekutuan.
- b) Cadangan pindaan ini telah melalui beberapa siri Sesi Libat Urus dengan pihak berkepentingan di Semenanjung Malaysia, Negeri Sabah dan Sarawak

- c) RUU Pindaan Perlembagaan ini telah dibentangkan di Dewan Rakyat pada 14 Disember 2021 dan mendapat sokongan 2/3 iaitu seramai 199 orang.
- d) Pindaan Perlembagaan juga telah dibentangkan di Dewan Negara pada 23 Disember 2021 dan mendapat sokongan 49 Senator.
- e) Seterusnya pindaan ini telah diperkenan oleh Yang di-Pertuan Agong dan diwartakan pada 19 Januari 2022. Akta ini mulai berkuatkuasa pada 11 Februari 2022 setelah mendapat perkenan Yang di-Pertuan Agong.

iii. Transformasi Pentadbiran yang merangkumi empat (4) perkara penting iaitu :

- a) Pelaksanaan Pindaan Perlembagaan Undi 18 dan Pendaftaran Pemilih secara Automatik
 - 1. Yang di-Pertuan Agong telah berkenan untuk menguatkuasakan pindaan kepada Perkara 119 Perlembagaan Persekutuan berhubung pelaksanaan kelayakan umur mengundi 18 tahun dan pendaftaran pemilih secara automatik pada 15 Disember 2021.
 - 2. Seterusnya, Peraturan-Peraturan Pilihan Raya (Pendaftaran Pemilih) (Pindaan) 2021 dan Peraturan-Peraturan Pilihan Raya (Penjalanan Pilihan Raya) (Pindaan) 2021 telah diwartakan pada 30 November 2021 dan telah dibentangkan di Dewan Rakyat pada 8 Disember 2021 bagi membolehkan prosedur baharu pendaftaran pemilih dilaksanakan mulai 15 Disember 2021.
- b) Cadangan Pindaan Perlembagaan untuk pengecualian Duli Yang Maha Mulia Raja-Raja Melayu dan pasangan, Pewaris dan pasangan serta Yang di-Pertua Negeri dan

pasangan daripada didaftarkan sebagai pemilih secara automatik supaya kekal berkecuali.

- a. Cadangan pindaan Perlembagaan ini merangkumi Perkara 119A dan akan dibentangkan semasa sesi Parlimen bulan Mac 2022 ini.
- c) Cadangan Pindaan Perlembagaan peruntukan Anti Lompat Parti
- a. Satu kertas kajian awal telah disediakan yang merangkumi Persoalan dasar dan parameter serta perbandingan perlembagaan negeri dan luar negara telah disediakan.
 - b. Satu Kaji Selidik di kalangan 7,461 orang awam dan 110 Ahli Parlimen berkaitan peruntukan lompat parti telah dilaksanakan.
 - c. Satu Jawatankuasa Teknikal CSA bagi mengkaji peruntukan anti lompat Parti telah ditubuhkan yang merangkumi wakil dari Kerajaan dan Pembangkang
 - d. Satu bengkel telah diadakan bersama wakil-wakil ini bagi tujuan penetapan dasar pada 25 Januari 2022.
 - e. Sesi libat urus telah diadakan dengan Ahli Parlimen Dewan Rakyat (Kerajaan) dan Dewan Negara pada 8 Februari 2022.
 - f. Sesi libat urus telah diadakan dengan Ahli Parlimen Dewan Rakyat (pembangkang).
 - g. Pindaan perlembagaan bagi peruntukan Anti Lompat Parti akan dibentangkan pada sesi Parlimen bulan Mac 2022 ini.

- d) Cadangan Pindaan Perlembagaan peruntukan Pengehadan Tempoh Perdana Menteri kepada tidak melebihi 10 tahun.
- a. Satu kertas kajian awal telah disediakan yang merangkumi Persoalan dasar dan parameter serta perbandingan luar negara telah disediakan.
 - b. Satu Kaji Selidik di kalangan 1,240 orang awam berkaitan Pengehadan Tempoh Jawatan Perdana Menteri tidak Melebihi 10 tahun.
 - c. Satu Jawatankuasa Teknikal CSA bagi mengkaji peruntukan Pengehadan Tempoh Jawatan Perdana Menteri tidak Melebihi 10 tahun telah ditubuhkan yang merangkumi wakil dari Kerajaan dan Pembangkang.
 - d. Satu bengkel telah diadakan bersama wakil-wakil ini bagi tujuan penetapan dasar pada 25 Januari 2022.
 - e. Sesi libat urus telah diadakan dengan Ahli Parlimen Dewan Rakyat (Kerajaan) dan Dewan Negara pada 8 Februari 2022.
 - f. Sesi libat urus telah diadakan dengan Ahli Parlimen Dewan Rakyat (pembangkang).
 - g. Pindaan perlembagaan bagi peruntukan Pengehadan Tempoh Jawatan Perdana Menteri tidak Melebihi 10 tahun akan dibentangkan pada sesi Parlimen bulan Mac 2022 ini.

iv. Transformasi Parlimen yang merangkumi dua (2) perkara penting iaitu :

a) Rang Undang-Undang Perkhidmatan Parlimen 2022

- a. Perbincangan telah diadakan dikalangan pihak Parlimen, Jabatan Peguam Negara bersama Jabatan Perkhidmatan Awam dan Kementerian Kewangan.
- b. Seterusnya satu pembentangan telah diadakan bersama Yang Di-Pertua Dewan Negara dan Yang Di-Pertua Dewan Rakyat berkaitan penetapan dasar bagi RUU ini.
- c. Satu Nota Jemaah Menteri telah disediakan oleh Parlimen Malaysia bagi pemakluman kepada Jemaah Menteri pada bulan Mac 2022.
- d. RUU Perkhidmatan Parlimen 2022 ini akan dibentangkan di sesi Parlimen bulan Julai 2022 ini.

b) Cadangan pindaan kepada Akta Majlis Parlimen (Keistimewaan dan Kuasa) 1952 [Akta 347]

- a. Satu Nota Jemaah Menteri telah disediakan oleh Parlimen Malaysia bagi pemakluman kepada Jemaah Menteri pada bulan Mac 2022.
- b. Cadangan pindaan kepada Akta Majlis Parlimen (Keistimewaan dan Kuasa) 1952 [Akta 347] ini akan dibentangkan di sesi Parlimen bulan Julai 2022 ini.

Untuk makluman, Yang Berhormat ini merupakan pencapaian yang telah berjaya dilaksanakan berkaitan perkara-perkara di bawah Memorandum Persefahaman Transformasi dan Kestabilan Politik.
Sekian, terima kasih

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATO' DR. MOHD KHAIRUDDIN BIN AMAN RAZALI
[KUALA NERUS]**

TARIKH : 1 MAC 2022 (SELASA)

SOALAN

DATO' DR. MOHD KHAIRUDDIN BIN AMAN RAZALI [KUALA NERUS] minta **PERDANA MENTERI** menyatakan usaha-usaha yang dilakukan oleh Kerajaan untuk memberi pendidikan politik Islam kepada pengundi baru berusia 18 tahun.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, Suruhanjaya Pilihan Raya Malaysia (SPR) melalui Akademi Pilihan Raya (APR) telah menjalinkan kerjasama strategik dengan beberapa kementerian untuk melaksanakan **Program Pendidikan Pengundi (*Voter Education* – VE)** yang bertujuan untuk memberi kefahaman terhadap proses pilihan raya yang dijalankan di Malaysia dan **mempersiap siaga golongan belia** agar menjadi warganegara yang bertanggungjawab dengan melibatkan diri dalam pilihan raya.

2. Antara kementerian yang terlibat adalah Kementerian Belia dan Sukan, Kementerian Pengajian Tinggi, Kementerian Pendidikan Malaysia, Kementerian Kesihatan Malaysia, Kementerian Sumber Manusia, Kementerian Pembangunan Luar Bandar, Kementerian Komunikasi dan Multimedia Malaysia dan lain-lain agensi serta badan-badan bukan kerajaan yang mempunyai kaitan dengan belia.

3. Selain itu, bagi menyebar luas penyampaian maklumat pilihan raya kepada golongan belia, APR telah melaksanakan **Program APR Associate Trainer** atau lebih dikenali dengan nama **AAT**. Melalui program AAT ini, APR dapat melatih lebih ramai penceramah dan jurulatih yang mampu untuk bersama-sama dengan APR menyampaikan maklumat tentang proses pilihan raya di Malaysia kepada pelajar sekolah dan golongan belia dalam institusi pendidikan di seluruh negara. Setakat ini, seramai **273 peserta telah mengikuti latihan intensif** oleh APR dan seterusnya **dilantik sebagai AAT**.

4. APR juga mengambil inisiatif perkongsian secara maya dalam media sosial bagi memberikan penerangan yang lebih mudah dan ringkas mengenai proses pilihan raya melalui platform Facebook, Youtube, Instagram, Twitter dan Tiktok yang pada ketika ini merupakan *trend* belia dan anak muda.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATUK HAJI AHMAD JAZLAN BIN
YAAKUB [MACHANG]**

TARIKH : 01 MAC 2022 (SELASA)

SOALAN

DATUK HAJI AHMAD JAZLAN BIN YAAKUB [MACHANG] minta **PERDANA MENTERI** menyatakan adakah Kerajaan bercadang untuk menggantikan jawatan Ketua Pesuruhjaya Suruhanjaya Pencegahan Rasuah Malaysia yang telah terpalit dengan kontroversi pemilikan saham dengan individu baru memandangkan jawatan tersebut merupakan jawatan utama yang tidak sepatutnya terpalit dengan sebarang jenis isu salah laku.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, isu saham yang di pertikaikan oleh banyak pihak daripada parti pembangkang sebenarnya telahpun selesai. Selain daripada itu, isu ini juga telah diputuskan dan tiada kes oleh inkuiri pihak Suruhanjaya Sekuriti Malaysia (SC). Malahan, Ketua Pesuruhjaya Suruhanjaya Pencegahan Rasuah Malaysia (KPSPRM) telah pun melalui beberapa Jawatankuasa iaitu:

- i. Jawatankuasa Panel Penasihat SPRM (LPPR),
- ii. Jawatankuasa Mencegah Rasuah Parlimen (JKMR) dan
- iii. Jawatankuasa Aduan.

2. Menerusi satu kenyataan SC pada 18 Januari 2022, suruhanjaya itu yang selesai menjalankan siasatan menjelaskan bahawa telah menyelesaikan siasatan berdasarkan bukti yang dikumpul dan SC tidak dapat memastikan secara muktamad jika terdapat pelanggaran di bawah Seksyen 25(4) Akta Perindustrian Sekuriti (Depositori Pusat) (SICDA) telah berlaku.

3. Oleh yg demikian tiada keperluan lagi isu pemilikan saham oleh KPSPRM ini dipertikaikan. Pihak Polis Diraja Malaysia (PDRM) juga mendapati tiada isu yang perlu disiasat kerana ia bidang kuasa SC. KPSPRM juga telah mengambil tindakan undang-undang terhadap pihak yang memfitnah beliau dan kes sedang dalam peringkat mahkamah dan sebarang ulasan kes ini juga akan menimbulkan *sub judice*.

4. Oleh yang demikian, semua pihak perlu menerima keputusan SC yang menjelaskan tidak ada kes terhadap KPSPRM berhubung akaun dagangan miliknya.

5. Justeru, keputusan SC berdasarkan hasil siasatannya perlu menjadi panduan dan tiada keperluan terhadap tindakan menggantikan KPSPRM buat masa ini .

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' HAJI MAHFUZ BIN HAJI OMAR
[POKOK SENA]**

TARIKH : 01 MAC 2022 (SELASA)

SOALAN:

minta **PERDANA MENTERI** menyatakan apakah langkah dan bantuan Kerajaan mengatasi masalah kehidupan kurang lebih 800,000 pekerja sektor awam Gred 19 ke bawah yang skim gaji mereka masih di bawah paras garis kemiskinan (PGK).

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI (TUGAS-TUGAS KHAS)**

Tuan Yang di-Pertua,

1. Gaji dalam Perkhidmatan Awam ditetapkan berasaskan konsep gaji untuk menyara keperluan asas seperti **makanan, pakaian dan tempat tinggal**. Penjawat Awam juga menerima elaun yang terdiri daripada **imbuhan tetap dan lain-lain elaun** yang menyumbang kepada jumlah pendapatan bulanan seseorang Penjawat Awam.

2. Buat masa ini, jumlah Kumpulan Pelaksana (Gred 11 hingga Gred 40) adalah sebanyak 692,309 orang dan bukannya 800,000 orang (tidak

termasuk ATM dan PDRM) seperti mana rekod HRMIS setakat 10 Januari 2022.

3. Jumlah pendapatan terendah bagi pegawai Perkhidmatan Awam Gred 11 yang baru dilantik dengan kelayakan masuk Penilaian Menengah Rendah (PMR) adalah berjumlah RM1,795.00 manakala jumlah pendapatan terendah untuk pegawai Gred 19 yang baru dilantik dengan kelayakan masuk Sijil Pelajaran Malaysia (SPM) adalah berjumlah RM1,967.00.

(Jumlah pendapatan terendah ini adalah merangkumi gaji pokok beserta Bayaran Insentif Sara Hidup (BISH), Imbuhan Tetap Khidmat Awam (ITKA) dan Imbuhan Tetap Perumahan (ITP)).

4. Merujuk kepada isu pendapatan tersebut yang lebih rendah daripada paras Pendapatan Garis Kemiskinan (PGK) RM2,208.00, perlu diingatkan bahawa **PGK adalah berasaskan pendapatan isi rumah manakala saraan Penjawat Awam adalah bersifat individu.**

5. Penjawat Awam Kumpulan Pelaksana juga layak dibayar Elaun Lebih Masa sekiranya melaksanakan tugas di luar waktu kerja biasa dan menikmati pelbagai kemudahan seperti pakaian, perubatan, cuti, pinjaman perumahan dan lain-lain kemudahan yang membantu dalam menangani kos sara hidup.

6. Jumlah pendapatan ini bukanlah satu amaun yang statik dan Penjawat Awam akan menerima kenaikan gaji tahunan (KGT) apabila genap setiap tahun perkhidmatan tertakluk kepada prestasi pegawai.

7. Kerajaan juga telah melaksanakan beberapa inisiatif sebagai usaha **meringankan bebanan kos sara hidup** seperti:

- a) Pada tahun 2019 Kerajaan telah mengumumkan kenaikan kadar BISH sebanyak RM50.00 sebulan bagi Kumpulan Pelaksana; dan
- b) Pemberian Bantuan Khas Kewangan sebanyak RM700.00 secara *one-off* untuk Penjawat Awam Gred 56 dan ke bawah pada tahun 2022.

8. Kerajaan telah bersetuju sistem saraan Perkhidmatan Awam dikaji bagi menggantikan Sistem Saraan Malaysia (SSM) menerusi Kajian Pembaharuan Perkhidmatan Awam yang melibatkan:

- a) Penambahbaikan ke atas struktur gaji Perkhidmatan Awam dengan mengambil kira faktor-faktor berkaitan antaranya paras Pendapatan Garis Kemiskinan (PGK) 2019, kenaikan kos sara hidup serta dasar-dasar Kerajaan yang berkaitan; dan
- b) Meneliti semula syarat-syarat dan kadar pemberian kesemua 143 elaun sedia ada yang diterima Penjawat Awam Persekutuan termasuklah elaun-elaun yang diberi berasaskan kriteria sara hidup.

9. Dalam hal ini, kewajaran bagi menaikkan gaji serta kadar elaun-elaun tertentu akan mengambil kira keseluruhan amaun emolumen yang diterima Penjawat Awam dan kedudukan ekonomi negara.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' HAJI CHE ABDULLAH BIN MAT
NAWI (TUMPAT)**

TARIKH : 01 MAC 2022 (SELASA)

SOALAN

DATO' HAJI CHE ABDULLAH BIN MAT NAWI [TUMPAT] minta **MENTERI KANAN KERJA RAYA** menyatakan perkembangan terkini pembinaan LPT3 sejauh 150km yang bermula dari Gemuroh, Terengganu ke Tumpat, Kelantan.

JAWAPAN

Tuan Yang Di-Pertua,

Untuk makluman Ahli Yang Berhormat, Kerajaan telah meluluskan perlaksanaan Kerja Awalan bagi Lebuhraya Pantai Timur (LPT3) dengan kos RM35 juta. Skop Kerja Awalan yang terlibat adalah *Light Detection and Ranging* (LIDAR Survey), *Ground Survey*, *Soil Investigation*, *Initial Environmental and Social Impact Evaluation* (IESIE), *Utility Mapping*, *Building Information Modelling* dan *Traffic Study*.

Status semasa Kerja Awalan ini adalah di dalam fasa penyediaan Laporan Kerja Awalan termasuk penentuan jajaran jalan yang muktamad dan anggaran kos projek. Jangkaan pembentangan Laporan penuh dapatan Kerja Awalan kepada Agensi Pusat adalah seawal bulan April 2022 bertujuan untuk mendapatkan hala tuju dan seterusnya kelulusan pelaksanaan projek.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN KARUPAIYA A/L MUTUSAMI
[PADANG SERAI]**

TARIKH : 01 MAC 2022 (SELASA)

SOALAN

TUAN KARUPAIYA A/L MUTUSAMI [PADANG SERAI] minta **KEMENTERIAN PERDAGANGAN ANTARABANGSA DAN INDUSTRI** menyatakan mengenai perkembangan terkini kilang-kilang yang menukar destinasi perniagaan mereka ke negara lain berbanding Malaysia.

JAWAPAN

Tuan Yang di-Pertua,

Persekitaran ekonomi global pascaCOVID-19 yang sangat mencabar telah mengubah strategi dan model perniagaan syarikat di seluruh dunia. Pelbagai faktor penting akan diambil kira dan perlu dipertimbangkan oleh pelabur sebelum mereka mengambil keputusan untuk membuat sesuatu pelaburan termasuklah iklim pelaburan yang bukan sahaja merujuk kepada ekosistem perniagaan yang kondusif tetapi merangkumi pelbagai aspek lain.

Tidak dinafikan bahawa terdapat beberapa syarikat asing seperti Hyundai Motor Co., IBM dan Citigroup telah memindahkan operasi mereka ke luar negara. Keputusan pemindahan ini dibuat berdasarkan pertimbangan komersial yang dipengaruhi oleh beberapa faktor termasuk strategi penstrukturan dan rasionalisasi semula syarikat, saiz pasaran domestik yang luas, kos buruh yang rendah serta ketersediaan sumber mineral.

Syarikat Hyundai Motor Co. misalnya telah memindahkan ibu pejabat serantau ke Indonesia kerana syarikat tidak mempunyai kilang pengeluaran sendiri di Malaysia. Faktor utama pemilihan lokasi pelaburan ke Indonesia adalah susulan Perjanjian Perkongsian Komprehensif Ekonomi (*Comprehensive Economic Partnership Agreement - CEPA*) di antara Republik Rakyat Korea dan Indonesia yang ditandatangani pada 25 November 2019. Berdasarkan perjanjian tersebut, kenderaan bermotor Hyundai mendapat manfaat daripada penghapusan tarif pada produk keluli dan bahagian automotif yang digunakan dalam plat keluli kenderaan. Walau bagaimanapun, Hyundai masih memegang 15 peratus ekuiti dalam INOKOM dan syarikat masih melaksanakan pemasangan model Santa Fe di Malaysia. Di samping itu, Hyundai telah memilih Malaysia sebagai hab serantau bagi perkilangan model Kia untuk pasaran ASEAN dan serantau negara lain.

Bagi syarikat IBM pula, penutupan IBM Global Delivery Centre di Cyberjaya adalah hanya dalam bidang perniagaan khusus syarikat iaitu, dengan izin, *shared services / outsourcing centre* yang menyediakan perkhidmatan penyumberan luar IT dalam pengurusan dan operasi

sistem IT. Walau bagaimanapun, IBM Malaysia Sdn. Bhd. akan mengukuhkan komponen perniagaan mereka berhubung, dengan izin, *Center of Digital Excellence (CODE)* dengan menjalankan aktiviti membangunkan penyelesaian bersama rakan kongsi teknologi Malaysia (*Malaysian System Integrators and SME's*) melalui bakat tempatan yang berpangkalan di IBM Malaysia.

Pengumuman Kumpulan Citigroup untuk keluar dari pasaran perbankan pengguna (*consumer-banking*) melibatkan Taiwan, Australia, Bahrain, China, India, Indonesia, Korea Selatan, Malaysia, Thailand, Filipina, Vietnam, Poland and Rusia. Namun begitu, Ketua Pegawai Eksekutif, Citi Malaysia telah menegaskan bahawa keputusan untuk penyelarasan strategik global ini akan membolehkan Citibank Malaysia memberi lebih tumpuan kepada perbankan korporat dan pelaburan, perbankan komersial, pasaran saham (termasuk pembrokeran ekuiti) serta penyelesaian harta dan perdagangan. Terkini, MIDA telah memeterai Memorandum Persefahaman (MoU) dengan Citi Malaysia untuk memperluaskan platform kewangan dan penyediaan perkhidmatan perbankan menyeluruh kepada pelabur baharu dan pelabur asing yang sedia ada di Malaysia.

Keyakinan pelabur asing terhadap Malaysia kekal teguh hasil daripada pelbagai inisiatif yang giat dilaksanakan oleh Kerajaan untuk menggalakkan pelaburan. Hasilnya, Malaysia terus merekodkan pencapaian yang memberangsangkan dengan jumlah pelaburan yang diluluskan bagi sektor perkilangan dan perkhidmatan di bawah seliaan Lembaga Pembangunan Pelaburan Malaysia (MIDA) dalam tempoh Januari sehingga Disember 2021 bernilai RM220.8 bilion. Jumlah keseluruhan pelaburan yang diluluskan dalam setiap sektor ekonomi iaitu perkilangan, perkhidmatan dan utama bagi tempoh Januari hingga September 2021 adalah bernilai RM177.8 bilion. Ini merupakan satu peningkatan yang signifikan sebanyak 51.4% berbanding tempoh yang sama bagi tahun 2020. Pada masa yang sama, jumlah keseluruhan pelaburan langsung asing yang diluluskan telah meningkat dengan mendadak sebanyak 135.5% iaitu RM106.1 bilion berbanding RM45.1 bilion bagi tempoh yang sama pada tahun 2020.

SOALAN NO : 42

Keberkesanan usaha Kerajaan ini turut diiktiraf di peringkat antarabangsa melalui Laporan 2022 *Milken Country Institute Global Opportunity Index* (GIO), di mana Malaysia mendahului sebagai negara paling menarik di rantau ini untuk pelaburan asing berbanding dengan negara Asia Tenggara yang sedang pesat membangun.

Malaysia turut kekal menjadi destinasi pelaburan terpilih, terutamanya sektor automotif dan digital ekonomi. Sebagai contoh, pengeluar automotif gergasi seperti Porsche, Mercedes-Benz, Volkswagen dan Kia Motors telah membuat keputusan untuk menjadikan Malaysia sebagai pusat pengedaran alat ganti, kilang pemasangan dan logistik serantau. Selain itu, Kerajaan juga berjaya menarik beberapa syarikat pusat data antarabangsa yang terkemuka seperti GDS Holding, NTT dan Bridge Data Centre untuk melabur di Malaysia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' SERI HAJI IDRIS BIN JUSOH
[BESUT]**

TARIKH : 01 MAC 2022 (SELASA)

SOALAN

DATO' SERI HAJI IDRIS BIN JUSOH [BESUT] minta **KEMENTERIAN PERDAGANGAN ANTARABANGSA DAN INDUSTRI** menyatakan langkah Kementerian dalam menangani isu kenaikan harga gas yang turut terkesan akibat kenaikan harga minyak di pasaran antarabangsa, yang mana keadaan ini telah menjejaskan operasi dan kewangan para pemain industri yang bergantung kepada gas sebagai sumber tenaga.

JAWAPAN

Tuan Yang di-Pertua,

Isu kenaikan harga minyak dan gas adalah merupakan isu global yang bukan sahaja memberi kesan kepada Malaysia malah kepada seluruh dunia. Peningkatan permintaan minyak dan gas yang merupakan bahan api utama bagi sektor pembuatan dan perkhidmatan (pengangkutan) menyebabkan lonjakan kepada harga yang ditawarkan di pasaran.

Untuk makluman, penggubalan dasar berkaitan minyak dan gas adalah di bawah bidang kuasa Unit Perancang Ekonomi, Jabatan Perdana Menteri (UPE). Mengenai perkara ini, UPE telah menggubal polisi Akses Pihak Ketiga (*Third Party Access* - TPA) yang telah dilaksanakan oleh Suruhanjaya Tenaga (ST) sejak 16 Januari 2017. Polisi ini bagi membolehkan industri mengimport dan mendapatkan gas dari 13 pembekal gas (*shipper*) yang dilesenkan oleh ST.

Objektif TPA adalah untuk mewujudkan situasi yang mana harga gas kepada pengguna akhir adalah berdasarkan kepada “*willing-buyer-willing-seller*”, dengan mengambil kira persaingan yang sihat dalam kalangan pembekal gas dan mengambil kira pertimbangan seperti berikut:

- i. Memastikan bekalan gas yang mencukupi;
- ii. Mewujudkan platform bagi persaingan yang sihat; dan
- iii. Member ruang kepada pembangunan Industri Gas Malaysia.

Sistem TPA akan membolehkan setiap pihak untuk memperoleh akses dan menggunakan kemudahan gas yang terdapat di Malaysia di atas terma dan syarat yang sama dengan pihak lain bagi penggunaan yang sama.

Pelaksanaan sistem TPA ini akan mewujudkan sistem pembekalan gas yang mapan dengan harga gas yang berdaya saing, dan seterusnya dapat menarik pelaburan baharu ke Malaysia terutamanya dalam sektor pembuatan. Ini merupakan satu langkah Kerajaan dalam usaha untuk

SOALAN NO : 43

membekalkan gas asli dengan harga yang lebih kompetitif kepada industri.

Kerajaan melalui UPE juga akan memperkenalkan Dasar Tenaga Negara 2021 – 2040 (*National Energy Policy* - NEP) yang akan menyumbang ke arah mencapai keselamatan tenaga jangka masa panjang dan berperanan sebagai agenda perancangan serta pembangunan sektor tenaga dalam usaha peralihan kepada masa depan berkarbon rendah.

NEP adalah penting kerana ia selari dengan Aspirasi Pelaburan Nasional (NIA), di mana Kerajaan akan memperkukuhkan pendekatan pelaburan berteraskan elemen Persekitaran, Sosial dan Tadbir Urus (*Environmental, Social and Governance* – ESG) sejajar dengan agenda kelestarian dan pertumbuhan hijau.

Langkah ini adalah perlu bagi memastikan penyediaan bekalan tenaga yang mencukupi, selamat dan kos efektif melalui pembangunan sumber tenaga asli yang tidak boleh diperbaharui mahupun yang boleh diperbaharui, menggunakan pilihan kos yang paling rendah dan kepelbagaian sumber bekalan dari dalam dan luar negara. Di samping memastikan Malaysia berada di atas landasan yang kukuh bukan sahaja dalam menangani isu dan cabaran sosioekonomi semasa akibat pandemik COVID-19, tetapi juga untuk mencapai pertumbuhan ekonomi jangka panjang yang mampan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN
DARIPADA : PUAN TEO NIE CHING [KULAI]
TARIKH : 01 MAC 2022 (SELASA)

SOALAN

PUAN TEO NIE CHING [KULAI] minta **PERDANA MENTERI** menyatakan hasil siasatan SPRM terhadap rakaman audio bekas Perdana Menteri, Muhyiddin Yassin yang menawarkan jawatan politik dan kedudukan dalam Syarikat Berkaitan Kerajaan (GLC) sebagai pertukaran untuk sokongan politik.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Yang Berhormat, Suruhanjaya Pencegahan Rasuah Malaysia (SPRM) telah selesai menjalankan siasatan terhadap isu yang dibangkitkan. Hasil siasatan mendapati tiada elemen kesalahan di bawah Akta Suruhanjaya Pencegahan Rasuah Malaysia 2009 (Akta 694).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TENGKU ZULPURI BIN RAJA PUJI [RAUB]

TARIKH : 1 MAC 2022 (SELASA)

SOALAN

TENGKU ZULPURI BIN RAJA PUJI [RAUB] minta **MENTERI PERUSAHAAN PERLADANGAN DAN KOMODITI** menyatakan apakah tindakan proaktif Kementerian dalam penyelesaian isu kritikan dari luar negara berhubung dengan perladangan kelapa sawit menggunakan buruh paksaan dan tidak memberi pertimbangan keperluan kehidupan asas yang cukup.

JAWAPAN

Tuan Yang Di-Pertua,

Untuk makluman Ahli Yang Berhormat, Kementerian Perusahaan Perladangan dan Komoditi (KPPK) ingin menekankan bahawa industri minyak sawit di Malaysia beroperasi di bawah piawaian yang ketat selaras dengan agenda matlamat pembangunan lestari sepertimana yang digariskan oleh Pertubuhan Bangsa-Bangsa Bersatu bagi memastikan semua orang menikmati keamanan dan kemakmuran. Dalam isu berkaitan hak asasi manusia, Kementerian ini komited dalam menjalankan usaha bagi meningkatkan kesedaran mengenai isu ini kepada semua sektor di Malaysia termasuk di sektor perladangan.

Pelaksanaan standard Pensijilan Minyak Sawit Mampan (MSPO) merupakan salah satu inisiatif utama yang telah diambil oleh pihak kerajaan untuk melindungi kesejahteraan pekerja dalam industri sawit. MSPO meliputi pensijilan mampan minyak sawit dalam landskap Malaysia, meliputi keseluruhan rantain bekalan. Ia meliputi tujuh prinsip termasuk Prinsip 4: Tanggungjawab Sosial, Kesihatan, Keselamatan dan Keadaan Pekerjaan yang mana Buruh Kanak-Kanak adalah di bawah Kriteria 5: Syarat Pekerjaan.

Selain daripada mengetatkan piawaian dan peraturan, komunikasi berterusan dengan pihak berkepentingan khususnya dalam meningkatkan kesedaran berkaitan isu hak asasi manusia juga dijalankan dari semasa ke semasa.

Kerajaan melalui KPPK, Kementerian Sumber Manusia dan Kementerian Dalam Negeri telah menjalinkan hubungan kerjasama yang erat dengan Pertubuhan Buruh Antarabangsa (ILO) dalam memerangi isu buruh paksa dan buruh kanak-kanak di sektor perladangan sawit. Melalui kerjasama ini, pelbagai program kesedaran mengenai amalan perburuhan yang baik telah dijalankan oleh pihak Kerajaan secara berterusan bagi mendidik pengusaha ladang termasuk pekebun kecil mengenai elemen buruh paksa dan buruh kanak-kanak di ladang sawit.

KPPK serta agensi di bawah Kementerian ini amat mengambil berat berhubung isu buruh paksa kerana industri sawit merupakan industri penting negara, justeru sebarang salah laku yang melibatkan buruh di ladang sawit akan memberi impak negatif ke atas industri sawit negara. Sehubungan itu, Malaysia telah menjalankan kajian menyeluruh mengenai *The Labour Situation in Palm Oil Plantation Sector in Malaysia* pada tahun 2018. Dapatan kajian telah dihantar ke *United States Department of Labour* (US DOL) dan dikeluarkan sebagai dokumen awam.

Kajian telah mengenal pasti cadangan untuk menangani isu dan masalah berkaitan situasi buruh di sektor perladangan kelapa sawit. Kajian ini mengambil kira faktor perubahan sosial, ekonomi dan teknologi yang dihadapi oleh pekerja buruh dan secara langsung memberi panduan kepada industri amnya untuk membina persekitaran kerja yang harmoni. Cadangan yang diketengahkan turut melibatkan pelaksanaan program seperti Program *Parenting Outreach* oleh Lembaga Penduduk dan Pembangunan Keluarga Negara (LPPKN) untuk pekerja ladang kelapa sawit akan berkuat kuasa bagi meningkatkan kesedaran mengenai hak kanak-kanak. Selain itu, pelaksanaan kerjasama antara kementerian seperti Kementerian Belia dan Sukan dan Kementerian Pelancongan, Kesenian dan Kebudayaan untuk menawarkan program sosial dan rekreasi kepada kanak-kanak dan remaja di ladang. Ini termasuk juga memberi pengiktirafan kepada syarikat yang menyediakan kemudahan penjagaan kepada pekerja, melaksanakan amalan buruh yang baik dan mematuhi piawaian sosial dalam pengurusan buruh untuk menggalakkan syarikat lain mengamalkan amalan serupa.

Selain itu juga, pada tahun 2021, KPPK melalui MPOB telah menganjurkan enam siri jerayawara bersama pengusaha-pengusaha di sektor perladangan seluruh Malaysia. Program ini telah mendapat maklum balas positif daripada para peserta dimana peserta mengakui bahawa program ini telah meningkatkan pengetahuan mereka terhadap indikator buruh paksa dan kanak-kanak, sekaligus membuktikan bahawa kerajaan serius dalam menangani isu ini. Program ini turut diakui dan dipuji oleh wakil daripada Jabatan Buruh Amerika Syarikat (US DOL) sebagai satu program yang baik dalam meningkatkan kesedaran berkenaan hak asasi manusia.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : YB DATO' SRI HAJAH ROHANI BINTI
HAJI ABDUL KARIM
[BATANG LUPAR]**

TARIKH : 01 MAC 2022 (SELASA)

SOALAN

Minta **PERDANA MENTERI** menyatakan bagaimanakah Kerajaan membantu dalam penyelarasan bantuan dan sokongan daripada Badan Bukan Kerajaan (NGO) serta sukarelawan semasa bencana dan situasi kritikal negara kerana dilaporkan terlalu banyak birokrasi dan syarat yang ketat dikenakan.

JAWAPAN

**DIJAWAB OLEH YB DATUK DR ABD LATIFF BIN AHMAD
MENTERI DI JABATAN PERDANA MENTERI (TUGAS TUGAS KHAS)**

Tuan Yang di-Pertua,

1. Merujuk kepada dakwaan sesetengah pihak bahawa terdapat terlalu banyak birokrasi dan syarat ketat yang dikenakan terhadap NGO dan sukarelawan yang hendak membantu sewaktu bencana, ianya adalah tidak benar sama sekali.
2. Arahan No. 20 Majlis Keselamatan Negara: Dasar dan Mekanisme Pengurusan Bencana Negara menetapkan Pusat Kawalan Operasi Bencana (PKOB) sebagai pusat penyelarasan pengurusan dan bantuan sewaktu berlaku bencana. Ia bukanlah bertujuan untuk mewujudkan birokrasi dan melambatkan bantuan mahupun menghalang mana-mana Badan Bukan Kerajaan (NGO) atau sukarelawan untuk membantu, akan tetapi ianya satu keperluan penyelarasan bagi mengelakkan isu-isu seperti pertindihan dan pembaziran bantuan yang disebabkan oleh kekurangan maklumat serta menjamin keselamatan NGO dan sukarelawan yang masuk ke zon bencana.
3. Untuk itu, PKOB bertanggungjawab mengurus dan menyelaraskan semua aspek pengurusan dan bantuan bencana termasuk bantuan daripada pihak NGO dan Sukarelawan. PKOB diuruskan oleh Jawatankuasa Pengurusan Bencana Daerah (JPBD) di kawasan-kawasan yang terlibat dengan bencana.
4. Kerajaan merakamkan penghargaan dan mengucapkan terima kasih di atas usaha-usaha bantuan daripada NGO yang telah banyak membantu mangsa-mangsa bencana terutama sewaktu tempoh pemulihan awal dan pasca bencana.
5. Jawatankuasa pengurusan bencana di peringkat daerah dan negeri disaran mengadakan hubungan baik dengan NGO tempatan bagi memudahkan proses penyelarasan bantuan sewaktu kejadian bencana. Di peringkat Jawatankuasa Pengurusan Bencana Pusat (JPBP) pula, Agensi Pengurusan Bencana Negara (NADMA) sentiasa mengadakan

hubungan dan kerjasama yang baik dengan badan-badan Organisasi Masyarakat Sivil (CSO) termasuk NGO yang terlibat dalam bantuan bencana dengan menyampaikan maklumat terkini status semasa bencana melalui platform Rakan NADMA.

6. Sewaktu kejadian banjir pada Disember 2021 yang lepas, dianggarkan lebih 26,000 ahli sukarelawan daripada 47 buah NGO yang berdaftar dengan Rakan NADMA telah terlibat dalam membantu mangsa-mangsa bencana di seluruh negara melibatkan bantuan makanan, keperluan asas, pembersihan rumah dan fasiliti awam, perhubungan kecemasan radio amatur, logistik dan lain-lain.

7. Sehubungan itu, selaras dengan arahan yang telah ditetapkan, NGO dan sukarelawan yang ingin membantu mangsa bencana perlulah menghubungi PKOB di kawasan-kawasan yang terjejas bagi memastikan pemberian bantuan kepada mangsa-mangsa yang terkesan bencana adalah terselaras, tersasar dan mengikut keperluan sebenar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

DARIPADA : TUAN R. SIVARASA [SUNGAI BULOH]

TARIKH : 01 MAC 2022 (SELASA)

SOALAN

TUAN R. SIVARASA [SUNGAI BULOH] minta **PERDANA MENTERI** menyatakan mengapa hanya seorang didakwa dalam kes kecurian USD6.94 juta dari barang kes antaranya USD12.1 juta berkenaan dengan pendakwaan Datuk Hasanah Abdul Hamid padahal kecurian besar itu daripada simpanan SPRM sendiri dan penggantian dengan wang palsu dalam peti besi dalaman SPRM mesti melibatkan lebih daripada seorang pegawai yang ada kuasa untuk membuka peti besi, memperolehi wang palsu dan ganti duit dalam peti besi.

JAWAPAN

Tuan Yang di-Pertua,

Untuk makluman Yang Berhormat, tertuduh telah dituduh pada 04.01.2022 dan disabitkan kesalahan pada 18.02.2022 dengan hukuman tiga (3) tahun penjara dan dua (2) sebatan. Fakta dan keterangan siasatan menunjukkan hanya seorang sahaja pegawai SPRM yang terlibat dan keputusan untuk menuduh telah dibuat oleh Jabatan Peguam Negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : YB DATUK SERI SHAMSUL ISKANDAR
@ YUSRE BIN MOHD AKIN
[HANG TUAH JAYA]**

TARIKH : 01 MAC 2022 (SELASA)

SOALAN

Minta **PERDANA MENTERI** menyatakan berapa kos keseluruhan untuk menguruskan bencana banjir tahun lepas dan berapa aset-aset yang telah dikerahkan secara bersepadu serta apakah perancangan Kerajaan untuk memastikan ketidakcekapan Kerajaan tidak berulang.

JAWAPAN

**DIJAWAB OLEH YB DATUK DR ABD LATIFF AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Sebagai persediaan menghadapi Monsun Timur Laut (MTL), Agensi Pengurusan Bencana Negara (NADMA) telah memperuntukkan sebanyak RM9.5 juta bagi perbelanjaan operasi bencana sepanjang tempoh MTL 2021/2022. Tujuan utama penyaluran peruntukan ini adalah untuk membantu Kerajaan Negeri selaku Jawatankuasa Pengurusan Bencana Negeri (JPBN), Sekretariat Jawatankuasa Pengurusan Bencana Negeri dan Daerah iaitu Angkatan Pertahanan Awam (APM) dan Agensi-Agensi Tindak Balas dalam melancarkan proses pengoperasian tindak balas semasa berlaku bencana serta memastikan kebajikan rakyat yang terjejas dipelihara.

2. Agihan peruntukan adalah seperti berikut:

- a) sebanyak RM100,000 kepada 7 Agensi Tindak Balas iaitu Angkatan Tentera Malaysia (ATM), Polis Diraja Malaysia (PDRM), Jabatan Bomba dan Penyelamat Malaysia (JBPM), Kementerian Kesihatan Malaysia (KKM), Jabatan Kebajikan Masyarakat (JKM), Angkatan Pertahanan Awam Malaysia (APM) dan Jabatan Sukarelawan Malaysia (RELA);
- b) sebanyak RM50,000 kepada Jawatankuasa Pengurusan Bencana Daerah (JPBD); dan
- c) sebanyak RM20,000 kepada Sekretariat JPBN di 14 buah negeri (di bawah APM Negeri).

3. Bagi bantuan-bantuan Keluarga Malaysia yang diumumkan Kerajaan, setakat 22 Februari 2022, Agensi Pengurusan Bencana Negara (NADMA) telah menyalurkan peruntukan sebanyak RM262.8 juta kepada Kerajaan Negeri dan Unit Penyelarasan Pelaksanaan (ICU) bagi

tujuan pengagihan kepada mangsa-mangsa yang layak. Proses pengagihan bantuan masih giat dijalankan dengan kerjasama erat antara NADMA, Kerajaan Negeri dan ICU. Pertambahan peruntukan akan disalurkan dari semasa ke semasa berdasarkan keperluan.

4. Sepanjang pengoperasian Monsun Timur Laut (MTL) 2021/2022, seramai 27,670 anggota daripada pelbagai agensi *responder* telah dikerahkan di seluruh negara. Bagi tujuan tindak balas terhadap kejadian banjir yang melanda, sebanyak 5,851 aset *responder* telah digerakkan. Aset-aset ini terdiri daripada bot penyelamat, jet ski, lori dan trak, pacuan empat roda, khemah sokongan dan ambulans.

5. Dalam memastikan pengurusan bencana dalam negara dapat berjalan dengan baik dan mengatasi kelemahan-kelemahan yang dikenal pasti, Jemaah Menteri pada 22 Disember 2021 telah memutuskan supaya struktur NADMA diteliti semula untuk diperkukuhkan selaras dengan peranannya sebagai peneraju pengurusan bencana negara. Keperluan untuk NADMA diwujudkan di negeri dan daerah sekali lagi diulangi oleh YAB Perdana Menteri dalam Mesyuarat Khas Penggal Keempat, Parlimen Ke-14 Dewan Rakyat pada 20 Januari 2022.

6. Seterusnya, Mesyuarat Jawatankuasa Pengurusan Bencana Pusat yang dipengerusikan oleh YAB Perdana Menteri secara dalam talian pada 3 Februari 2022 telah bersetuju dengan lapan langkah strategik (jangka masa pendek, sederhana dan panjang) penambahbaikan pengurusan bencana negara yang telah dibentangkan oleh NADMA iaitu:

- a) Pemerkasaan dasar, perundangan dan mekanisme berkaitan pengurusan bencana dan pengurangan risiko bencana (DRR);
- b) Penekanan terhadap inisiatif DRR;
- c) Penyediaan dana untuk pengurusan bencana dan DRR;
- d) Pengukuhan mekanisme koordinasi dan kompetensi *stakeholders* pengurusan bencana;
- e) Penambahbaikan sistem dan penyampaian maklumat di dalam pengurusan bencana dan DRR;
- f) Pemerkasaan dasar dan mekanisme koordinasi bantuan NGO dan sukarelawan;

- g) Peningkatan kemahiran di dalam komunikasi krisis dan komunikasi strategik; dan
 - h) Peningkatan kapasiti komuniti setempat dan tumpuan terhadap *localization* di dalam pengurusan bencana dan DRR.
7. Pewujudan repositori daftar risiko bencana negara (National Risk Register) juga akan membantu mempertingkatkan perluasan dasar DRR melalui pembuatan keputusan berdasarkan risiko dan maklumat sejarah bencana di peringkat daerah dan negeri.
8. Kementerian dan Agensi juga disarankan untuk membuat penetapan sebanyak lima peratus daripada perbelanjaan mengurus dan pembangunan bagi tujuan pengurusan bencana pada masa akan datang. Ini penting bagi persiapan perbelanjaan untuk tujuan kesiapsiagaan, tindak balas, pemulihan awal dan pasca bencana serta pencegahan dan mitigasi risiko bencana.
9. Mesyuarat JPBP juga bersetuju dengan penekanan terhadap konsep “whole of society approach” yang perlu diterjemahkan dalam dasar, pengoperasian dan latihan amal bencana dengan penglibatan bersama agensi-agensi Kerajaan, NGO, dan komuniti.
10. Pada masa yang sama, pemeraksanaan kapasiti komuniti setempat akan dipertingkatkan melalui ketua komuniti yang akan bertindak sebagai *initial responder*.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2021**

PERTANYAAN : LISAN

**DARIPADA : PUAN HAJAH NATRAH BINTI ISMAIL
[SEKIJANG]**

TARIKH : 1 MAC 2022 (SELASA)

SOALAN

PUAN HAJAH NATRAH BINTI ISMAIL [SEKIJANG] minta **PERDANA MENTERI** menyatakan jumlah dan nama kawasan FELDA di seluruh negara yang telah berjaya menyelesaikan masalah perumahan untuk generasi kedua.

JAWAPAN**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Bagi menyelesaikan masalah perumahan untuk generasi kedua, FELDA antaranya telah melaksanakan Program Perumahan Generasi Baharu FELDA (PGBF). Projek ini telah bermula pada tahun 2013 bertujuan membantu generasi baharu FELDA memiliki rumah mampu milik yang selesa di samping mengoptimumkan penggunaan tanah kosong di tanah rancangan.

2. Sehingga kini, FELDA telah membangunkan 8,244 unit rumah di 40 lokasi tanah rancangan FELDA seluruh negara. Daripada jumlah tersebut, 2,358 unit rumah PGBF berjaya disiapkan (termasuk pengeluaran Perakuan Siap dan Pematuhan atau CCC) di 11 lokasi seperti berikut:

3.

Bil	Negeri	Tapak Projek	Bina	Status Projek
1	Pahang	Padang Piol	26	Serah kunci pada 30 Sep 2019
2		Selancar 4/5	480	Serah kunci pada 25 Ogos 2020
3		Selendang 2	360	Serah kunci pada 26 Ogos 2020
4		Keratong 4	264	Serah kunci pada 4 Mei 2018
5		Sg Koyan 1b	24	Serah kunci pada 2 Mei 2018
6	Johor	Sg Sibol	360	Serah kunci pada 10 Jan 2020
7		Inas Utara	200	Serah kunci pada 21 Julai 2019
8	Kedah	Sg Tiang	80	Serah kunci pada 6 Jun 2017
9		Laka Selatan	300	Serah kunci pada 9 Ogos 2020
10	N.Sembilan	Pasoh 1	144	Serah kunci pada 21 Ogos 2020
11		Pasir Besar	120	Serah kunci pada 21 Ogos 2020
Telah Siap		2,358 Unit Kediaman PGBF Siap Dibina		

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN LIM GUAN ENG
[BAGAN]**

TARIKH : 01 MAC 2022 (SELASA)

SOALAN

Minta **PERDANA MENTERI** menyatakan sebab Jawatankuasa Khas Pengurusan Pandemik COVID-19 tidak bermesyuarat sejak 5 November 2021 dan adakah langkah yang diambil bagi menghadapi gelombang baru Omicron sah dan sahik kerana mencerminkan kekurangan komitmen dan pendekatan “whole-of-government”, termasuk keengganan menangguhkan Pilihan Raya Negeri Johor.

JAWAPAN

**DIJAWAB OLEH YB DATUK DR. ABD LATIFF BIN AHMAD,
MENTERI DI JABATAN PERDANA MENTERI (TUGAS-TUGAS KHAS)**

Tuan Yang Dipertua,

1. Jawatankuasa Khas Pengurusan Pandemik COVID-19 telah dibentuk dan sentiasa mengadakan mesyuarat secara berkala dan berterusan bagi membincangkan keperluan dasar dan strategi-strategi terbaik bagi memperkukuhkan mekanisme pengurusan pandemik melibatkan kementerian, agensi, pihak industri dan rakyat secara keseluruhannya.

2. Jawatankuasa Khas Pengurusan Pandemik COVID-19 ini dipengerusikan oleh YAB Perdana Menteri dan dihadiri oleh YB Menteri-Menteri di pihak kerajaan dan ahli parlimen pihak pembangkang.
3. Dalam hubungan ini, penyelarasan dan keseragaman masa bagi kehadiran ahli-ahli mesyuarat yang turut melibatkan tiga (3) orang ahli pembangkang menjadi sebab utama mengapa mesyuarat Jawatankuasa ini terpaksa ditangguhkan beberapa kali.
4. Penangguhan mesyuarat ini juga turut melibatkan faktor jadual dan komitmen YAB Perdana Menteri sebagai ketua kerajaan yang menuntut beliau melaksanakan siri tugas dan lawatan kerja rasmi ke luar negara bagi tujuan memperkukuhkan hubungan diplomatik dan imej Malaysia dengan negara-negara terlibat khususnya dalam tempoh penghujung tahun 2021. Sesi libat urus (engagement) YAB Perdana Menteri dengan para pemimpin negara-negara lain amat penting dalam meningkatkan jalinan kerjasama dua hala dan memastikan persefahaman bersama dapat dicapai khususnya berkaitan keputusan dan pelaksanaan dasar kedua-dua pihak meliputi aspek ekonomi, politik dan sosial.
5. Meskipun Jawatankuasa Khas Pengurusan Pandemik COVID-19 tidak bermesyuarat, keupayaan pihak pengurusan tertinggi Kerajaan melalui pelbagai Kementerian dan Agensi Kerajaan yang terlibat tidak boleh dipandang ringan.
6. Pendekatan 'whole-of-government' jentera-jentera kerajaan melalui penglibatan semua kementerian dan agensi sentiasa menjadi penggerak utama dalam usaha menjayakan pengurusan COVID-19. Ini dibuktikan dengan kejayaan langkah-langkah dan strategi-strategi yang diambil dari semasa ke semasa seperti pelaksanaan Program Imunisasi COVID-19 Kebangsaan (PICK), Program Imunisasi COVID-19 Kebangsaan Kanak-Kanak (PICKids), Pakej-pakej Bantuan dan Rangsangan Ekonomi untuk memastikan kehidupan rakyat terpelihara dan memulih semula ekonomi dan pelaksanaan Pelan Pemulihan Negara atau PPN sebagai strategi peralihan keluar secara berfasa daripada krisis COVID-19.
7. Selain itu, pendekatan 'Whole-of-Nation' turut dilaksanakan dengan menggerakkan kerjasama di peringkat sektor swasta,

pertubuhan bukan kerajaan (NGO) dan rakyat selaras dengan nilai kebersamaan yang terangkum di dalam konsep dan falsafah Keluarga Malaysia dalam menangani pandemik COVID-19 yang mencabar ini.

8. Pelaksanaan Pilihan Raya Negeri (PRN) Johor pada 12 Mac 2022 adalah selaras dengan keperluan perundangan di bawah Fasal (2) Perkara 23 Bahagian Kedua, Undang-Undang Negeri Johor, Undang-Undang Tubuh Kerajaan 1895 melainkan proklamasi darurat diisytiharkan. Sebagai sebuah Negeri yang berdaulat dan mempunyai Undang-undang Tubuhnya yang tersendiri, adalah tidak wajar pihak Kerajaan Persekutuan melakukan campur tangan di dalam pembubaran Dewan Undangan Negeri Johor yang telah mendapat perkenan DYMM Sultan. Keputusan Baginda Sultan dalam memperkenankan pembubaran DUN harus dihormati dan tidak dipertikai oleh mana-mana pihak sebagai satu alat dan mainan politik. Suruhanjaya Pilihanraya (SPR) juga sebagai sebuah badan bebas, telah bertindak mengikut lunas-lunas Perlembagaan dan kedaulatan undang-undang yang kita junjung untuk melaksanakan proses ke arah Pilihanraya DUN Negeri Johor.

9. Pihak Kerajaan dalam hal ini, melalui Mesyuarat Kumpulan Kerja Teknikal Pengurusan Pandemik telah mengemukakan pandangan dan nasihat kepada pihak SPR dalam merangka Prosedur Operasi Standard (SOP) PRN DUN Johor. Kementerian Kesihatan Malaysia juga telah menyatakan persetujuan ke atas pelaksanaan PRN Johor setelah mengambil kira penyediaan Prosedur Operasi Standard (SOP) yang menggariskan tatacara pencegahan yang ketat dan teratur serta tahap vaksinasi COVID-19 yang tinggi di negeri Johor. Justeru, penularan jangkitan COVID-19 khususnya varian Omicron diyakini mampu dicegah semasa PRN Johor dilaksanakan melalui kerjasama dan pematuhan SOP sepenuhnya oleh semua pihak yang terlibat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : LISAN

DARIPADA : TUAN TAN KOK WAI [CHERAS]

TARIKH : 01 MAC 2022 (SELASA)

SOALAN

minta **PERDANA MENTERI** menyatakan sama ada negara kita mempertimbangkan untuk meningkatkan usia persaraan memandangkan kadar penuaan populasi negara yang semakin meningkat.

JAWAPAN:

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan yang Dipertua,

1. Kerajaan tiada perancangan untuk meningkatkan umur persaraan perkhidmatan awam pada masa sekarang. Walau bagaimanapun, Kerajaan bersedia menjalankan kajian terperinci cadangan untuk meminda umur persaraan perkhidmatan awam dari semasa ke semasa sekiranya terdapat keperluan

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATO' JOHARI BIN ABDUL
[SUNGAI PETANI]**

TARIKH : 1 MAC 2022 (SELASA)

SOALAN

DATO' JOHARI BIN ABDUL [SUNGAI PETANI] minta **PERDANA MENTERI** menyatakan remaja berumur 18 tahun akan mengundi dalam Pilihan Raya Umum ke 15 nanti. Sejauh mana maklumat berhubung syarat-syarat dan peraturan serta mekanisme yang membolehkan mereka mengundi dan di mana mereka akan mengundi telah didedahkan kepada masyarakat.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Yang Berhormat, Suruhanjaya Pilihan Raya Malaysia (SPR) telah **mewartakan Daftar Pemilih Tambahan Bulan Disember Tahun 2021 pada 14 Januari 2022** iaitu daftar pemilih tambahan pertama diwartakan selepas umur pengundi 18 tahun dan pendaftaran pemilih secara automatik dikuatkuasakan pada 15 Disember 2021. Seterusnya, SPR juga telah **mewartakan Daftar Pemilih Induk Tahun 2021 pada 17 Januari 2022**.

2. Daftar pemilih yang telah diwartakan adalah terbuka untuk disemak melalui beberapa kaedah semakan yang disediakan oleh SPR secara dalam talian seperti berikut:

- (a) Portal rami SPR di pautan <https://www.spr.gov.my>;
- (b) Aplikasi dalan talian di pautan <https://mysprsemak.spr.gov.my> atau <https://myspr.spr.gov.my>
- (c) Aplikasi mudah alih MySPR Semak; dan
- (d) Portal rasmi Pejabat-Pejabat Pilihan Raya Negeri di pautan <http://ppn.spr.gov.my>; dan

3. Di samping itu, semakan maklumat pendaftaran pemilih ini juga boleh dibuat dengan menghubungi Hotline SPR di talian 03-8892 7018.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : TUAN SYED SADDIQ BIN SYED ABDUL
RAHMAN [MUAR]**

TARIKH : 1 MAC 2022 (SELASA)

SOALAN

TUAN SYED SADDIQ BIN SYED ABDUL RAHMAN [MUAR] minta **MENTERI ALAM SEKITAR DAN AIR** menyatakan sama ada Kementerian akan menggubal dan melaksanakan satu Akta Perubahan Iklim (Climate Change Act). Apa status akta ini pada masa kini, dan tindakan-tindakan lain Kerajaan yang telah dilakukan untuk mencapai objektif-objektif seperti yang telah dibentangkan dalam Rancangan Malaysia Ke-12 pada tahun 2021.

JAWAPAN

Tan Sri Yang Di-Pertua,

1. Untuk makluman Yang Berhormat, pelaksanaan tindakan dan inisiatif berkaitan mitigasi dan adaptasi bagi menangani isu perubahan iklim bukan sahaja perlu disokong dengan ketetapan dasar tetapi juga peruntukan undang-undang. Ini adalah penting bagi memastikan dasar dan inisiatif berkaitan perubahan iklim diselaraskan secara bersepadu di peringkat kebangsaan, hasil dipantau dengan rapi, data dan maklumat dilaporkan secara lengkap dan sistematik serta kerangka institusi yang mantap bagi menjamin keberkesanan pelaksanaan.
2. Kementerian Alam Sekitar dan Air (KASA) sedang menggubal Akta Perubahan Iklim Negara secara berfasa. KASA telah menyiapkan kerangka undang-undang perubahan iklim pada Disember 2021 selaras dengan Aspirasi Keluarga Malaysia. Kerangka undang-undang tersebut mengandungi intipati asas fungsi dan peranan kerangka yang meliputi aspek tadbir urus perubahan iklim negara, mitigasi perubahan iklim, adaptasi perubahan iklim, data dan maklumat mengenai perubahan iklim, pembiayaan perubahan iklim, mekanisme pematuhan, serta pendidikan dan kesedaran awam mengenai perubahan iklim.
3. Fasa seterusnya adalah proses penggubalan Akta Perubahan Iklim negara berdasarkan kerangka undang-undang yang telah dibangunkan pada tahun 2021. Pembangunan Akta Perubahan Iklim ini adalah menggunakan peruntukan Rancangan Malaysia Kedua Belas (RMK-12) dan dijangka akan mengambil masa selama 3 tahun sehingga tahun 2025. Pelbagai proses akan dilaksanakan seperti pembangunan dan perincian kandungan akta, konsultasi bersama pemegang taruh di pelbagai peringkat, proses penilaian impak dan pembentangan rang undang-undang di Parlimen dalam tempoh tersebut. Dari aspek keseluruhan fungsi dan bidang kuasa akta tersebut, akta ini akan melengkapi fungsi dan bidang kuasa berkaitan perubahan iklim yang tidak dipunyai oleh akta-akta lain.

4. Seperti Yang Berhormat sedia maklum, salah satu tema utama dalam RMK-12 adalah Melonjakkan Kemampanan. Beberapa strategi seperti pembangunan rendah karbon, peralihan kepada ekonomi kitaran dan pembangunan berdaya tahan terhadap perubahan iklim. Bagi menyokong objektif dan tema yang digariskan dalam RMK-12, antara langkah yang sedang dilaksanakan oleh KASA adalah seperti berikut:

- i. Pertama: Menyemak semula Dasar Perubahan Iklim Negara (2009) yang dijangka dimuktamadkan pada 2022;
- ii. Kedua: Membangunkan Strategi Jangka Masa Panjang Pembangunan Rendah Karbon (*Long Term - Low Emission Development Strategies* - LT-LEDS) bagi menyokong ketetapan dasar bagi mencapai aspirasi pelepasan sifar bersih GHG menjelang 2050 negara;
- iii. Ketiga: Menubuhkan Pusat Gas Rumah Kaca (GHG) Kebangsaan bagi memenuhi obligasi pelaporan perubahan iklim antarabangsa;
- iv. Keempat: Membangunkan platform perdagangan karbon peringkat domestik dengan kerjasama Kementerian Kewangan dan BURSA Malaysia bagi menyokong usaha pengurangan pelepasan GHG negara; dan
- v. Kelima: Membangunkan Pelan Adaptasi Kebangsaan menggunakan dana antarabangsa bagi merangka strategi jangka masa panjang adaptasi perubahan iklim negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : DATO' WIRA HAJI AMIRUDDIN BIN HAJI
HAMZAH [KUBANG PASU]**

TARIKH : 1 MAC 2022 (SELASA)

SOALAN

DATO' WIRA HAJI AMIRUDDIN BIN HAJI HAMZAH [KUBANG PASU] minta **MENTERI ALAM SEKITAR DAN AIR** menyatakan butiran terperinci pelaksanaan Projek Tebatan Banjir Sg Bata (dari Changlun ke Jitra) dalam RMKe-12, kos terlibat dan jangkaan kerja fizikal akan dimulakan.

JAWAPAN

Tan Sri Yang Di-Pertua,

1. Projek Rancangan Tebatan Banjir Sungai Temin/Bata akan dipohon di dalam Rolling Plan Ketiga (RP3), RMKe-12 dan pelaksanaannya adalah bergantung kepada kelulusan pihak EPU kelak. Projek ini merangkumi kerja-kerja tebatan banjir bagi Sungai Temin/Bata untuk mengurangkan banjir meliputi bandar Jitra, Hosba, Changloon, dan sepanjang jajaran sungai berkenaan. Anggaran kos yang akan terlibat adalah sebanyak RM100 juta dan projek ini dijangka akan ditender pada pertengahan tahun 2024.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : YB TUAN GOBIND SINGH DEO (PUCHONG)

TARIKH : 01 MAC 2022 (SELASA)

SOALAN

TUAN GOBIND SINGH DEO [PUCHONG] minta **MENTERI KANAN KERJA RAYA** menyatakan status kenaikan harga tol yang ditangguhkan pada tahun 2021 dan apakah kenaikan harga bakal dilaksanakan pada tahun 2022.

JAWAPAN

Tuan Yang Di-Pertua,

Untuk makluman Ahli Yang Berhormat, Kerajaan telah melaksanakan penangguhan kenaikan kadar tol bagi 3 lebuh raya yang dijadualkan mendapat kenaikan pada 1 Januari 2021 dan meneruskan penangguhan kenaikan tol bagi 26 lebuh raya yang lain.

Dimaklumkan juga, berdasarkan kepada perjanjian konsesi yang ditandatangani, sekiranya Kerajaan melaksanakan kadar tol yang lebih rendah dari kadar yang dipersetujui atau melaksanakan pemansuhan kutipan tol, Kerajaan perlu membayar pampasan kepada syarikat konsesi.

Untuk makluman Ahli Yang Berhormat juga, Kerajaan telah memutuskan untuk menstrukturkan semula kadar tol yang akan dirunding secara bersama syarikat konsesi lebuh raya dan perlu dimuktamadkan sebelum tahun 2023. Sepanjang tempoh rundingan, kadar tol yang telah diwartakan adalah dikekalkan dan penangguhan kenaikan kadar tol akan diteruskan bagi tahun 2022.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN KARUPAIYA A/L MUTUSAMI
(PADANG SERAI)**

TARIKH : 1 MAC 2022 (SELASA)

SOALAN

TUAN KARUPAIYA A/L MUTUSAMI (PADANG SERAI) meminta **MENTERI KANAN PERTAHANAN** menyatakan mengenai elaun RM500 Pingat Jasa Malaysia. Adakah pemberian elaun ini masih diteruskan oleh Kerajaan.

JAWAPAN

Tuan Yang di-Pertua,

Sejajar dengan Pelan Strategik MINDEF (2021-2025) di bawah Teras Tranformasi Kesejahteraan Veteran ATM iaitu Strategi Pengiktirafan Jasa Pejuang Negara, Kementerian Pertahanan akan terus berusaha untuk merealisasikan pemberian elaun ini kepada semua penerima yang layak. Namun demikian, ianya bergantung kepada kemampuan kewangan Negara dalam memenuhi keperluan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN OSCAR LING CHAI YEW
(SIBU)**

TARIKH : 1 MAC 2022 (SELASA)

SOALAN

TUAN OSCAR LING CHAI YEW (SIBU) minta **MENTERI LUAR NEGERI** menyatakan mengapa Abdul Hadi Awang sebagai Duta Khas Perdana Menteri ke Timur Tengah bertemu dengan kumpulan Taliban dan adakah pertemuan itu mendapat kelulusan oleh Kabinet. Jelaskan pendirian Kerajaan tentang pertemuan itu.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Sibu di atas pertanyaan yang dikemukakan.

Tuan Yang di-Pertua,

2. Izinkan saya menjawab pertanyaan Yang Berhormat Sibu bersekali dengan pertanyaan yang dikemukakan oleh Yang Berhormat Lembah Pantai, Yang Berhormat Bukit Gelugor, Yang Berhormat Bangi, Yang Berhormat Bagan, Yang Berhormat Kepong dan Yang Berhormat Lumut masing-masing bertarikh 16 dan 22 Mac 2022 kerana pertanyaan-pertanyaan tersebut menyentuh isu yang sama.

3. Secara keseluruhannya, ada tiga isu utama yang dibangkitkan oleh Ahli-ahli Yang Berhormat iaitu:

- i. Pendirian Malaysia terhadap Afghanistan;
- ii. Bentuk hubungan dan isu pengiktirafan Kerajaan Afghanistan; dan
- iii. Usaha Malaysia dalam pembinaan semula Afghanistan.

PENDIRIAN MALAYSIA SERTA TAHAP HUBUNGAN MALAYSIA DENGAN AFGHANISTAN

4. Saya telah menghadiri Mesyuarat Luar Biasa Pertubuhan Kerjasama Islam (OIC) di peringkat Menteri-Menteri Luar Negeri bagi membincangkan situasi di Afghanistan di Islamabad, Pakistan pada 19 Disember 2021.

5. Semasa mesyuarat tersebut, saya telah mengetengahkan pendirian Malaysia, antaranya pembinaan negara dan bantuan kemanusiaan kepada Afghanistan mestilah diterajui oleh Afghanistan, dimiliki oleh Afghanistan dan dikawal oleh Afghanistan.

6. Saya telah menyeru masyarakat antarabangsa supaya mengelakkan keruntuhan ekonomi Afghanistan secara menyeluruh. Dalam hal ini OIC harus bertindak untuk menangani dan menyelesaikan isu pembekuan lebih USD9 bilion rizab antarabangsa Afghanistan. Rizab tersebut adalah milik rakyat Afghanistan.

7. Malaysia telah menggesa OIC untuk merapatkan jurang pemberian bantuan kemanusiaan antarabangsa terhadap Afghanistan. Malaysia melihat ada merit dalam memperkasakan Pejabat OIC di Kabul untuk mengukuhkan usaha kemanusiaan antarabangsa di Afghanistan.

ISU PENGIKTIRAFAN KERAJAAN AFGHANISTAN

8. Untuk makluman, Kerajaan Malaysia telah memulakan libat urus secara tidak formal (*informal engagement*) dengan pemegang taruh di Afghanistan seperti mana dilakukan oleh sebahagian negara lain.

9. Libat urus ini tidak bermakna Malaysia mengiktiraf kerajaan sementara Afghanistan pimpinan Taliban. Usaha-usaha libat urus ini adalah penting bagi memastikan Afghanistan tidak mengalami keruntuhan dari segi sosio-ekonomi dan kemanusiaan.

10. Dalam hal ini, lawatan kerja, Utusan Khas YAB Perdana Menteri ke Timur Tengah adalah bertujuan untuk mengukuhkan lagi peranan Malaysia dalam mencari jalan penyelesaian terbaik terhadap isu Afghanistan, khususnya melibatkan situasi kemanusiaan dan ekonomi yang semakin meruncing. Lawatan kerja beliau dari 31 Januari hingga 4 Februari 2022 telah dipersetujui YAB Perdana Menteri pada 28 Januari 2022.

11. Sebagai Utusan Khas Perdana Menteri ke Timur Tengah, beliau selain memastikan kepentingan strategik Malaysia dengan negara-negara di Timur Tengah terus terpelihara, beliau juga berperanan dalam mengukuhkan lagi hubungan dengan beberapa negara lain termasuk Afghanistan.

USAHA MALAYSIA UNTUK MEMBINA DAN MEMBANGUN SEMULA AFGHANISTAN, TERMASUK BANTUAN YANG INGIN DIBERI

12. Dalam usaha membantu untuk membina dan membangun semula Afghanistan, Malaysia akan terus memainkan peranan dengan cara tersendiri. Sejak pengunduran Amerika Syarikat dan sekutunya, Pertubuhan Bukan Kerajaan (NGO) Malaysia sudah berada di Kabul dan di beberapa wilayah lain di Afghanistan.

13. Kementerian Luar Negeri, melalui beberapa perwakilan diplomatik di luar negara, telah menjadi pemudah cara kepada NGO-NGO Malaysia untuk melaksanakan misi bantuan kemanusiaan di Afghanistan. Malaysia sedia bekerjasama dengan masyarakat antarabangsa untuk pembangunan semula Afghanistan apabila situasi dan keadaan di Afghanistan mengizinkan.

14. Pada masa sama, Malaysia menggalakkan sektor swasta negara untuk meninjau peluang pelaburan dan perdagangan di Afghanistan. Terdapat banyak potensi pelaburan dan perdagangan di Afghanistan seperti infrastruktur, perlombongan, pertanian, telekomunikasi dan perbankan Islam. Selain itu, Kerajaan kekal komited untuk menyediakan program pembinaan kapasiti teknikal melalui Program Kerjasama Teknikal Malaysia. Melalui program ini, Malaysia akan membantu meningkatkan pembangunan modal insan yang amat diperlukan Afghanistan untuk usaha-usaha pembangunan semula negara.

Tuan Yang di-Pertua,

15. Berdasarkan perkembangan di Afghanistan setelah enam bulan berada di bawah kepimpinan Taliban, Malaysia akan terus memantau perkembangan negara tersebut. Pada masa yang sama, Kementerian Luar Negeri sentiasa bersedia menjadi pemudah cara kepada syarikat swasta mahupun pertubuhan bukan kerajaan (NGO) Malaysia dalam usaha mereka menghulurkan bantuan-bantuan kemanusiaan kepada rakyat Afghanistan yang memerlukan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATUK SERI PANGLIMA MADIUS TANGAU
[TUARAN]**

TARIKH : 1 MAC 2022 (SELASA)

SOALAN

DATUK SERI PANGLIMA MADIUS TANGAU [TUARAN] minta **PERDANA MENTERI** menyatakan bilakah Kerajaan akan meminda Pasal 122AB (1) Perlembagaan Persekutuan iaitu untuk mengembalikan kuasa Tuan Yang di-Pertua Negeri Sabah dan Sarawak dalam pelantikan Judicial Commissioner.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, isu yang menyentuh Badan Kehakiman melibatkan perkara yang terkandung dalam Perjanjian Malaysia 1963 sedang diteliti oleh Jawatankuasa Teknikal yang dipengerusikan oleh Peguam Negara. Jawatankuasa ini berfungsi meneliti isu-isu di bawah tanggungjawab Jawatankuasa Kerja Rakan Sekutu, Majlis Khas Perjanjian Malaysia (MKMA63). Penelitian oleh Jawatankuasa Teknikal ini juga menyentuh peruntukan Fasal 1 Perkara 122AB Perlembagaan Persekutuan berhubung pelantikan Pesuruhjaya Kehakiman. Terdapat beberapa cadangan berhubung perkara ini. Namun ia masih belum dimuktamadkan memandangkan perkara tersebut masih perlu dibincangkan dengan lebih lanjut bersama Kerajaan Negeri Sabah dan Sarawak.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN NIK NAZMI BIN NIK AHMAD
(SETIAWANGSA)**

TARIKH : 1 MAC 2022 (SELASA)

SOALAN

TUAN NIK NAZMI BIN NIK AHMAD (SETIAWANGSA) meminta **MENTERI KANAN PERTAHANAN** menyatakan apakah status perolehan pesawat tempur ringan (*Light Combat Aircraft*) untuk Tentera Udara Diraja Malaysia.

JAWAPAN

Tuan Yang di-Pertua,

Status terkini perolehan pesawat tempur ringan atau dikenali sebagai *Fighter Lead In Trainer - Light Combat Aircraft* (FLIT-LCA) adalah dalam proses menyiapkan kertas kerja bagi dibawa ke Lembaga Perolehan Kementerian Pertahanan. Tender Terbuka Antarabangsa bagi perolehan ini telah ditutup pada 6 Oktober 2021 dan proses penilaian tender juga telah selesai dilaksanakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

DARIPADA : DATUK LIEW CHIN JIN @ CHRISTINA LIEW [TAWAU]

TARIKH : 1 MAC 2022 (SELASA)

SOALAN

DATUK LIEW CHIN JIN @ CHRISTINA LIEW [TAWAU] minta **MENTERI ALAM SEKITAR DAN AIR** menyatakan pada penghujung tahun 2018, Kementerian telah memperuntukkan sebanyak RM300 juta untuk dua pakej Projek-Projek Mitigasi Banjir di kawasan Tawau. Apakah status semasa dan kemajuan projek-projek berkenaan, apakah yang terlibat dalam kedua-dua pakej itu.

JAWAPAN

Tan Sri Yang Di-Pertua,

1. KASA melalui Jabatan Pengairan dan Saliran (JPS) telah mengenalpasti penyelesaian jangka panjang bagi menyelesaikan masalah banjir di kawasan Tawau yang melibatkan kos keseluruhan berjumlah RM300 juta bermula dari RMKe-11.

2. Di bawah RMKe-11, dalam projek RTB Sg Tawau dengan kos projek berjumlah RM50 juta, JPS sedang melaksanakan dua projek fizikal berikut:

- (i) Pakej 3 iaitu kerja-kerja menaiktaraf Jambatan Apas; dan
- (ii) Pakej 4 iaitu pembesaran muara dari *outlet* Sungai Rakis hingga ke muara Sungai Tawau.

Status kemajuan semasa bagi Pakej 3 dan 4 adalah 27% berbanding sasaran 6.5%.

3. Manakala cadangan projek baharu iaitu RTB Sg Tawau fasa 1B dengan kos projek RM124 juta akan dimohon di bawah RP3 RMKe-12 yang melibatkan 2 pakej iaitu:

- (i) **Pakej 1** iaitu kerja naktaraf Sungai Tawau dari Sg. Tanjung *Outlet* hingga ke Jambatan Apas; dan
- (ii) **Pakej 2** iaitu kerja naiktaraf Sungai Tawau dari Jambatan Apas hingga ke *outlet* Sg. Rakis.

4. Manakala baki kos projek melibatkan jajaran lencongan banjir Sungai Tawau di Kampung Pasir Putih, Tawau akan dipohon dalam RMKe-13 bagi perancangan *total solution* isu banjir di Daerah Tawau.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : DATUK WIRA HAJI MOHD. ANUAR MOHD.
TAHIR [TEMERLOH]**

TARIKH : 1 MAC 2022 (SELASA)

SOALAN

DATUK WIRA HAJI MOHD. ANUAR MOHD. TAHIR [TEMERLOH]
minta MENTERI ALAM SEKITAR DAN AIR menyatakan apakah
tindakan segera tahun ini dalam mewujudkan lebih banyak projek tebatan
banjir bagi persediaan musim tengkujuh hujung tahun ini.

JAWAPAN

Tan Sri Yang Di-Pertua,

1. KASA sentiasa mengambil langkah proaktif dalam melaksanakan mitigasi jangka pendek dan sederhana untuk mengurangkan risiko banjir.
2. Bagi mitigasi jangka pendek, Projek Pemuliharaan Sungai untuk Mengurangkan Risiko Banjir mengikut Negeri di bawah butiran 15200 di bawah *Rolling Plan* Kedua (RP2) RMKe-12 telah diluluskan. Melalui butiran ini, skop kerja yang terlibat di bawah projek ini adalah:

Kerja-kerja pengaluran sungai

- i. Kerja-kerja menstabilkan tebing sungai;
 - ii. Menaiktaraf aset tak alih tebatan banjir; dan
 - iii. Menaiktaraf saluran dan struktur berkaitan bagi meningkatkan kualiti air sungai
3. Selain itu, KASA melalui agensi-agensi terlibat juga telah melaksanakan beberapa tindakan segera bagi menebat kesan banjir seperti berikut:
 - i. memastikan kesiapsiagaan infrastruktur tebatan banjir (pam pintu air dan genset) supaya dapat berfungsi pada tahap optimum ketika banjir berlaku;
 - ii. menyelenggara, mendalamkan dan membersihkan saluran, sungai serta kolam takungan banjir bagi meningkatkan kapasiti aliran dan takungan air larian permukaan;
 - iii. mempertingkatkan program penyelidikan dan pembangunan (R&D) berkaitan perubahan iklim khususnya dalam aspek adaptasi dan pengurangan risiko bencana (*Climate Change Adaptation* (CCA) - *Disaster Risk Reduction* (DRR));
 - iv. mewujudkan Peraturan Tetap Operasi (PTO/ *Standard Operating Procedure* - *SOP*) bagi maklumat taburan hujan dan aras air serta mewujudkan flood evacuation map. PTO ini dapat membantu orang awam mengambil tindakan yang sewajarnya ketika berlakunya kejadian banjir;

- v. memberikan amaran awal kepada penduduk tentang fenomena air pasang besar;
 - vi. menaik taraf 100 buah stesen pencerapan cuaca permukaan automatik sedia ada yang telah usang sejak 2006 kepada peralatan baharu bagi mengeluarkan ramalan dan amaran cuaca dalam masa nyata (realtime) dan boleh percaya (reliable);
 - vii. meningkatkan keupayaan dan pembangunan aplikasi mobil myCuaca menggunakan Technology Cloud Services untuk penyampaian maklumat kritikal yang efisien dan berkesan kepada orang awam; dan
 - viii. meningkatkan penglibatan pakar ramalan cuaca numerikal sedia ada bersama pakar-pakar tersohor daripada European Centre for Medium-Range Weather Forecasts (ECMWF), National Centers for Environmental Prediction (NCEP), National Center for Atmospheric Research (NCAR), United Kingdom Meteorological Office (UKMO) dan Japan Meteorological Agency (JMA) dalam bidang meteorologi rantau tropika menerusi latihan sangkut, seminar dan seumpamanya;
4. KASA juga telah mengambil langkah jangka sederhana bagi menebat kesan banjir seperti berikut:
- i. memperkasa tadbir urus adaptasi perubahan iklim sektor air melalui pembangunan Akta Adaptasi Sektor Air sebagai strategi jangka panjang dengan mengambil kira keperluan peningkatan tahap perlindungan infrastruktur saliran dan pantai negara. Di bawah akta ini, KASA akan mencadangkan penubuhan sebuah tabung khas/kumpulan wang amanah untuk peningkatan kapasiti adaptif sektor air dan kawasan pesisir melalui pembangunan dan penyelenggaraan infrastruktur yang mengambil kira faktor perubahan iklim;
 - ii. penggunaan pendekatan *nature-based solution* seperti pembinaan denai sungai sebagai platform penglibatan masyarakat dalam aktiviti perlindungan, pembersihan dan pemuliharaan sungai;

- iii. meningkatkan kesedaran awam dengan pelaksanaan Public Outreach Programme (POP) dan program kesedaran alam sekitar melalui pendekatan *communication, education and public awareness (CEPA)* seperti latihan menghadapi banjir, atau *flood drills*, dengan izin. Pendekatan ini akan dilaksanakan di peringkat sekolah dan masyarakat melalui rukun tetangga untuk meningkatkan kesedaran rakyat menghadapi amaran banjir dan langkah yang perlu diambil jika berdepan ancaman ini; dan
- iv. memperkasa pelaksanaan pendekatan Pengurusan Lembangan Sungai Bersepadu (IRBM) dalam pengurusan lembangan sungai melalui empat (4) objektif utama iaitu:
 - a) memastikan air mencukupi;
 - b) memastikan air bersih;
 - c) mengurangkan risiko banjir; dan
 - d) melestarikan alam sekitar.

Melalui pembangunan pelan IRBM, cadangan perancangan dan pembangunan sumber air di dalam sesebuah lembangan mestilah dijadikan rujukan mandatori oleh pihak Kerajaan Negeri dan semua pihak berkepentingan. Dalam merancang pembangunan, kesan terhadap kelestarian alam sekitar perlu diberikan perhatian terutamanya sumber air yang sangat diperlukan oleh negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB DATUK WIRA DR. MOHD. HATTA MD.
RAMLI (LUMUT)**

TARIKH : 01 MAC 2022 (SELASA)

SOALAN

DATUK WIRA DR. MOHD. HATTA MD. RAMLI [LUMUT] minta **MENTERI KANAN KERJA RAYA** menyatakan peratusan siap Lebuhraya Pantai Barat (WCE) dan tarikh jangkaan siap sepenuhnya.

JAWAPAN

Tuan Yang Di-Pertua,

Untuk makluman Ahli Yang Berhormat, jajaran Lebuhraya Persisiran Pantai Barat (WCE) ini merentasi dua (2) buah negeri iaitu Negeri Selangor dan Negeri Perak sejauh 316 km di bina di sepanjang persisiran pantai barat untuk kemudahan penduduk setempat dan juga pengguna lebuhraya ke utara. Panjang jajaran Lebuhraya WCE yang dilaksanakan secara penswastaaan oleh *West Coast Expressway Sdn. Bhd.* (WCESB) adalah sepanjang 233 km manakala jajaran sepanjang 81.5km untuk menaiktaraf jalan sedia ada (FR5) dilaksanakan menggunakan peruntukan Kerajaan melalui Jabatan Kerja Raya.

Untuk makluman Ahli Yang Berhormat, berkenaan jajaran yang menggunakan peruntukan Kerajaan melalui Jabatan Kerja Raya melibatkan tiga (3) buah jajaran projek iaitu satu jajaran telah disiapkan pada 2018 manakala dua jajaran lagi sedang dalam pembinaan. Jajaran projek yang dimaksudkan adalah seperti berikut:

- i. Projek Menaiktaraf Jalan Persekutuan FR5 Dari Sabak Bernam Ke Hutan Melintang sepanjang 5km diluluskan dengan kos projek sebanyak RM166 juta telah siap pembinaannya pada 25.6.2018;
- ii. Kerja-kerja Menaiktaraf Jalan Persekutuan FT005 (Teluk Intan Ke Kg.Lekir) Perak Darul Ridzuan sepanjang 31.5km diluluskan dengan kos projek sebanyak RM706.55 juta. Projek ini dijangka akan siap pada 20.6.2022 dengan kemajuan fizikal semasa di tapak ialah 91.21% dan;
- iii. Projek Menaiktaraf Jalan Persekutuan FR5 Dari Tanjong Karang Ke Sabak Bernam, Selangor sepanjang 45km diluluskan dengan kos projek sebanyak RM807.7 juta. Projek ini dijangka akan siap pada 26.3.2022 dengan kemajuan fizikal semasa di tapak ialah 99.77%.

Manakala berkenaan dengan jajaran yang dilaksanakan secara penswastaan, pembukaan WCE secara berperingkat telah bermula pada tahun 2019 melibatkan Seksyen 5 di Selangor (dari Persimpangan Bandar Bukit Raja ke Persimpangan Kapar) serta Seksyen 8, 9 dan 10 di Negeri Perak (dari Persimpangan Hutan Melintang ke Persimpangan Teluk Intan dan dari Persimpangan Kampung Lekir ke Persimpangan Beruas). Kemajuan keseluruhan projek yang berakhir 25 Januari 2022 adalah 77.79%. Kesemua Seksyen WCE di bawah penswastaan ini dijadualkan siap sepenuhnya pada tahun 2025 di mana penyiapan terakhir adalah melibatkan jajaran Seksyen 7 di Persimpangan Tanjong Karang, Selangor. Pada masa kini, kerja-kerja pembinaan sedang dijalankan di bahagian jajaran yang belum dibuka melibatkan kerja tanah, pembinaan struktur dan jambatan, perparitan, cerun, turapan, kerja mekanikal dan elektrik, perabot jalan, bangunan dan lain-lain.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN MA'MUN BIN SULAIMAN
[KALABAKAN]**

TARIKH : 1 MAC 2022 (SELASA)

SOALAN

Minta **PERDANA MENTERI** menyatakan tarikh yang dijangka sesuai untuk membuka pintu kemasukan antarabangsa negara untuk menerima pelancong-pelancong asing yang telah menerima suntikan vaksin lengkap dan disahkan bebas jangkitan COVID-19 datang berkunjung ke destinasi-destinasi menarik dalam negara demi memulihkan industri pelancongan dan hospitaliti negara yang terjejas teruk akibat pandemik COVID-19.

JAWAPAN:

**DIJAWAB OLEH YB DATUK DR. ABD LATIFF BIN AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang Dipertua,

1. Cadangan bagi pembukaan sempadan negara secara sepenuhnya perlu dibuat secara berhati-hati berdasarkan penilaian risiko semasa jangkitan COVID-19 dalam negara oleh pihak Kementerian Kesihatan Malaysia (KKM) dan mengambil kira maklumat situasi COVID-19 dari negara yang berisiko dan mempunyai pergerakan keluar masuk pengembara terutamanya yang melibatkan Prosedur Operasi Standard (SOP) tanpa keperluan kuarantin.

2. Kerajaan amat peka dengan suara pihak industri dan pengusaha IKS yang terlibat di dalam sektor pelancongan memandangkan dengan pembukaan semula sepenuhnya sempadan negara akan memulihkan industri pelancongan dan hospitaliti negara yang terjejas akibat pandemik COVID-19.
3. Antara inisiatif yang diambil oleh Kerajaan adalah seperti berikut: -
 - a. Membenarkan kemasukan warganegara dan warga asing seperti pelajar, diplomat, golongan profesional serta pelabur asing sejak Jun 2020 tertakluk kepada Prosedur Operasi Standard (SOP) dan syarat – syarat yang telah ditetapkan termasuklah keperluan menjalani kuarantin wajib di pusat – pusat kuarantin yang disediakan termasuk di hotel – hotel yang ditetapkan;
 - b. Membenarkan kemasukan pengembara dan bukan warganegara yang telah menerima vaksinasi lengkap untuk menjalani kuarantin wajib di rumah atau tempat kediaman tertakluk kepada SOP kuarantin wajib yang terkini;
 - c. Memperkenalkan projek rintis protokol *Test and Release* (T&R) dengan syarat perjalanan atau intinerari yang ketat dan terhad bagi lawatan rasmi kepada kumpulan pengembara yang telah dikenalpasti; dan
 - d. Mengadakan kerjasama dengan beberapa negara-negara jiran seperti Singapura, Thailand dan Brunei mengenai pembukaan skim *Vaccinated Travel Lane* (VTL) melalui perjalanan udara dan darat.
4. Penularan varian Omicron di seluruh negara pada masa ini menyebabkan Kerajaan perlu menangguhkan pembukaan sempadan negara dan dijangka ianya akan mula dipertimbangkan bermula suku kedua Tahun 2022. Bagi mendokong aspirasi Keluarga Malaysia, di sini, pihak Kerajaan ingin memaklumkan bahawa suara pihak industri sentiasa didengari dan ingin memaklumkan bahawa segala ketetapan pembukaan sempadan ini adalah bersifat dinamik yang mana boleh berubah dari semasa ke semasa sekiranya didapati kes COVID-19 di negara luar meningkat demi menjamin memulihkan ekonomi negara dan keselamatan serta kesihatan Keluarga Malaysia jua.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : DATO' SERI UTAMA HAJI MUKHRIZ BIN TUN
DR. MAHATHIR [JERLUN]**

TARIKH : 1 MAC 2022 (SELASA)

SOALAN

DATO' SERI UTAMA HAJI MUKHRIZ BIN TUN DR. MAHATHIR [JERLUN] minta **MENTERI ALAM SEKITAR DAN AIR** menyatakan adakah Kerajaan Persekutuan memandang serius masalah pemanasan global dan kesannya kepada negara. Sebagai contoh seperti yang dilaporkan oleh Jabatan Perangkaan Malaysia, jumlah kerugian akibat daripada banjir pada tahun 2021 adalah RM6.1 bilion. Tidakkah wajar diangkat masalah perubahan iklim sebagai krisis nasional yang perlu diletak di bawah kelolaan Jabatan Perdana Menteri.

JAWAPAN

Tan Sri Yang Di-Pertua,

1. Kerajaan sentiasa memandang serius fenomena pemanasan global dan impak perubahan iklim terhadap negara. Dewan telah dimaklumkan bahawa fenomena pemanasan global telah menyumbang kepada peningkatan suhu purata global kepada 1.1 darjah celcius (°C) berbanding era pra-perindustrian.
2. Unjuran perubahan iklim mendapati bahawa negara akan mengalami peningkatan suhu permukaan di antara 1.9°Celsius (°C) hingga 2.1°C pada penghujung abad ini. Dengan peningkatan suhu ini, purata taburan hujan akan turut meningkat sebanyak 14% hingga 25% manakala paras laut dijangka turut meningkat sehingga 0.73 meter dalam tempoh yang sama. Perkara ini akan menyebabkan negara akan mengalami peningkatan bencana seperti banjir dan kemarau serta kejadian cuaca ekstrem. Bagi setiap pemanasan sebanyak 0.5°C suhu global, ia akan menyebabkan peningkatan yang ketara dalam kekerapan dan intensiti taburan hujan. Dalam senario pemanasan global sebanyak 1.5°C, saintis telah mengunjurkan bahawa kejadian cuaca ekstrem seperti hujan lebat dan banjir akan meningkat dan lebih kerap di kebanyakan wilayah di Afrika dan Asia (keyakinan tinggi), Amerika Utara (keyakinan sederhana hingga tinggi), dan Eropah (keyakinan sederhana).
3. Dalam Keputusan Persidangan Negara Anggota yang Ke-26 pada November 2021 di Glasgow, negara anggota Kerangka Konvensyen Persidangan Negara-negara Bersatu untuk Perubahan Iklim telah mengiktiraf bahawa impak perubahan iklim merupakan isu sejagat yang memberi kesan kepada manusia dan terdapat kaitan di antara krisis global dengan faktor-faktor seperti perubahan iklim dan kehilangan biodiversiti. Namun krisis global ini perlu diberikan konteks di peringkat kebangsaan.
4. Strategi Kerajaan ialah menggunakan konsep keseluruhan negara atau '*whole of nation*' dalam Rancangan Malaysia Kedua Belas menggembelng pembabitn dan kerjasama Kementerian dan Agensi berkaitan bagi menangani impak perubahan iklim.

5. Strategi dan pelaksanaan dasar memerlukan kerjasama di semua peringkat. Untuk tujuan itu, Kerajaan telah menubuhkan Majlis Tindakan Perubahan Iklim atau MyCAC. Majlis ini merupakan platform tertinggi untuk menetapkan hala tuju serta membincangkan hal-hal berkaitan dasar dan tindakan perubahan iklim, memacu pertumbuhan ekonomi hijau, memangkin teknologi hijau dan pertumbuhan rendah karbon di peringkat Kerajaan Persekutuan dan Kerajaan Negeri dan dipengerusikan oleh YAB Perdana Menteri. Mesyuarat yang pertama telah diadakan pada 13 April 2021 dan telah dihadiri oleh Menteri-menteri Persekutuan, Menteri Besar dan Ketua Menteri serta wakil Ketua Setiausaha Negara.

6. Antara keputusan penting yang telah diputuskan oleh MyCAC adalah seperti berikut:

- a. pengukuhan peranan KASA sebagai focal point negara kepada *United Nations Framework Convention on Climate Change* (UNFCCC);
- b. pembangunan dasar dan garis panduan berkaitan mekanisme pasaran karbon di Malaysia;
- c. meluluskan Pelan Mobiliti Rendah Karbon dan Pelan Tindakan Bandar Rendah Karbon,;
- d. meluluskan pendirian negara ke Persidangan ke-26 Negara Parti kepada UNFCCC di Glasgow, Scotland;
- e. pembangunan platform tunggal di bawah Skim Perdagangan Karbon peringkat Domestik (*Domestic Emissions Trading Scheme* – DETS);
- f. cadangan penubuhan Pusat Gas Rumah Kaca Negara; dan
- g. aspirasi negara berkaitan pelepasan bersih sifar gas rumah kaca (*greenhouse gas* – GHG) dan pembangunan *Long-Term Emissions Development Strategy* (LT-LEDS).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : YB TUAN AHMAD BIN HASSAN
[PAPAR]**

TARIKH : 01 MAC 2022 (SELASA)

SOALAN

Minta **PERDANA MENTERI** menyatakan penambahbaikan pengurusan dan SOP bencana di setiap peringkat bagi memastikan bantuan dan sumbangan dapat disalurkan sesegera yang mungkin kepada mangsa-mangsa yang terlibat.

JAWAPAN

**DIJAWAB OLEH YB DATUK DR ABD LATIFF AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Sejak penubuhan Agensi Pengurusan Bencana Negara (NADMA) pada 2015, Dasar dan Mekanisme Pengurusan Bencana di Malaysia adalah tertakluk kepada Arahan Majlis Keselamatan Negara (MKN) No. 20. Dokumen ini telah menggariskan dasar pengurusan serta perintah dan kawalan ketika pengendalian bencana.
2. Arahan MKN No. 20 ini pula disokong dengan Perintah Tetap Operasi (PTO) bagi setiap jenis kejadian bencana sama ada banjir, tanah runtuh, tsunami dan sebagainya. Dokumen-dokumen ini dengan jelas menggariskan peranan serta tatacara pengendalian bencana yang perlu

dipatuhi sama ada di peringkat jawatankuasa pengurusan bencana dan setiap agensi *responder* dalam fasa-fasa kejadian bencana sama ada sebelum, semasa atau selepas. Dokumen PTO ini telah diguna pakai dan dibaca bersama sejak Arahan MKN No. 20 dibangunkan dan berjaya membantu negara dalam pengendalian pelbagai jenis kejadian bencana.

3. Selain itu, Agensi Kerajaan yang terlibat dalam pengurusan bencana juga hendaklah menyedia, mengemaskini dan menggunakan PTO di peringkat agensi masing-masing dalam mengendalikan sesuatu bencana. PTO tersebut hendaklah tertakluk dan selaras dengan Arahan MKN No. 20.

4. Dengan mengambil kira kejadian dan kesan bencana yang semakin dinamik akibat daripada perubahan iklim yang ketara, NADMA akan menilai semula PTO-PTO kejadian bencana dan menambahbaik kandungannya berdasarkan dapatan di lapangan dan pandangan agensi-agensi berkaitan agar tindak balas bencana dapat ditambahbaik.

5. Selain itu, bagi meningkatkan kefahaman setiap pihak yang terlibat dalam pengurusan bencana, latihan dan simulasi akan dipergiat ke segenap peringkat agar semua pihak dapat memperkukuhkan lagi kesiapsiagaan dan memastikan peranan mereka dapat dilaksanakan dengan lebih cekap ketika kejadian bencana selaras dengan Arahan MKN No. 20 dan PTO berkaitan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN LIM GUAN ENG (BAGAN)

TARIKH : 1 MAC 2022 (SELASA)

SOALAN

TUAN LIM GUAN ENG (BAGAN) minta **MENTERI LUAR NEGERI** menyatakan impak perjanjian keselamatan Australia-United Kingdom-United States (AUKUS) terhadap dasar luar negara Malaysia dan kedudukan ASEAN sebagai *Zone of Peace Freedom and Neutrality* (ZOPFAN), khususnya dalam aspek perbelanjaan ke atas kelengkapan tentera Amerika Syarikat, Australia dan United Kingdom dalam rantau ini.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Bagan atas pertanyaan yang dikemukakan berhubung kerjasama keselamatan tiga penjurong antara Australia, United Kingdom dan Amerika Syarikat, yang dikenali sebagai AUKUS.

2. Seperti yang dimaklumkan sebelum ini, pendirian Kerajaan mengenai penubuhan AUKUS adalah jelas dan konsisten, berdasarkan kepada kenyataan oleh YAB Perdana Menteri pada 18 September 2021 berhubung isu ini, dan kenyataan-kenyataan oleh YB Menteri Kanan Pertahanan dan saya selaku Menteri Luar Negeri masing-masing pada 19 September 2021. Melalui pelbagai platform, kita berpandangan bahawa penubuhan AUKUS boleh mengakibatkan berlakunya peningkatan persaingan senjata di rantau ini dan berpotensi memprovokasi kuasa-kuasa besar dunia untuk bertindak lebih agresif di rantau ini, terutamanya di Laut Cina Selatan.

3. Kerjasama AUKUS secara amnya tidak mengubah dasar luar negeri Malaysia. Malaysia akan sentiasa berpegang teguh kepada dasar luar negeri yang bebas, berprinsip dan pragmatik serta bertunjangkan nilai-nilai keamanan, kemanusiaan, keadilan dan kesaksamaan bagi menjaga kedaulatan negara.

Tuan Yang di-Pertua,

4. Kerajaan turut menyeru semua pihak yang berkenaan untuk mengukuhkan kerjasama yang lebih aktif dalam mempromosikan dan mempertahankan rantau ini sebagai rantau yang aman, stabil serta berkembang dan makmur, sebagaimana yang digariskan di bawah *ASEAN Outlook on Indo-Pacific*. Sebagai sebuah negara ASEAN, Malaysia terus memegang prinsip untuk mengekalkan ASEAN sebagai Zon Aman, Bebas dan Berkecuali (ZOPFAN). Dalam hal ini, Kerajaan menegaskan kepentingan menghormati dan mematuhi pendirian dan pendekatan sedia ada negara kita berhubung operasi kapal selam berkuasa nuklear dalam perairan negara. Ini termasuk peraturan-peraturan Konvensyen Pertubuhan Bangsa-Bangsa

Bersatu berkaitan Undang-Undang Laut 1982 (UNCLOS) dan Perjanjian Zon Bebas Senjata Nuklear Asia Tenggara (*Southeast Asia Nuclear Weapons Free Zone - SEANWFZ*) (*shoun-fez*).

5. Malaysia dan Negara-negara Anggota ASEAN kekal komited dalam menegakkan prinsip-prinsip yang terkandung di dalam dokumen-dokumen penting ASEAN, antara lain, seperti Piagam ASEAN, Titi SEANWFZ, ZOPFAN serta Titi Persahabatan dan Kerjasama di Asia Tenggara (TAC). Malaysia juga akan terus mendokong prinsip Kepaksian ASEAN, atau dengan izin, *ASEAN Centrality*, dan menyuarakan pendirian Malaysia secara konsisten dalam kalangan Negara-negara Anggota dan Rakan-rakan Luar ASEAN bagi memastikan rantau ini kekal berkecuali, aman, stabil dan selamat.

Tuan Yang di-Pertua,

6. Dari aspek perbelanjaan ketenteraan pula, ketiga-tiga negara tersebut juga merupakan antara yang tertinggi di dunia. Bagi tahun 2022, US telah memperuntukkan sebanyak USD 777.7 bilion untuk sektor pertahanan, manakala UK dan Australia masing-masingnya memperuntukkan sebanyak USD62.7 bilion dan USD34.8 bilion. Walau bagaimanapun, perbelanjaan tersebut bukan tertumpu kepada AUKUS semata-mata, tetapi ia merupakan sebahagian daripada kos pelaksanaan strategi keselamatan yang telah diperuntukkan oleh kerajaan masing-masing.

7. Dalam hal ini, dengan mengambil kira dasar luar negeri Malaysia dan kerjasama pertahanan AUKUS, Kerajaan akan terus memfokuskan kepada peningkatan hubungan dengan semua, terutama rakan-rakan strategik Malaysia termasuk US, UK dan Australia sama ada di peringkat dua hala, serantau mahupun antarabangsa. Dalam masa yang sama, Kerajaan akan memantau perkembangan AUKUS dari semasa ke semasa bagi memastikan ianya tidak mengancam keselamatan dan kedaulatan negara dan rantau ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : PUAN MARIA CHIN BINTI ABDULLAH
[PETALING JAYA]**

TARIKH : 1 MAC 2022 (SELASA)

SOALAN

PUAN MARIA CHIN BINTI ABDULLAH [PETALING JAYA] minta **MENTERI ALAM SEKITAR DAN AIR** menyatakan pendirian Kementerian terhadap cukai pelepasan karbon dioksida (CO₂) oleh pihak industri.

JAWAPAN

Tan Sri Yang Di-Pertua,

1. Untuk makluman Yang Berhormat, di dalam Bab 8 kepada dokumen rancangan Malaysia Ke-12 (RMK-12) yang bertajuk Mempercepat Pertumbuhan Hijau untuk Kemampanan dan Daya Tahan telah menjelaskan mengenai perancangan Kerajaan untuk melaksanakan pelbagai jenis instrumen ekonomi atau mekanisme '*carbon pricing*' bagi menyokong pelaksanaan tindakan bagi menangani perubahan iklim.
2. Antara mekanisme '*carbon pricing*' yang dikenal pasti berpotensi untuk menyokong agenda pertumbuhan hijau negara adalah seperti cukai karbon, perdagangan karbon domestik melalui kaedah '*cap and trade*', pembiayaan kepada perkhidmatan ekosistem, meningkatkan rasionalisasi subsidi bahan api dan levi kepada penjualan bahan api fosil.
3. Walaupun telah digariskan di dalam dokumen RMK-12, cukai karbon masih memerlukan ketetapan dasar untuk melaksanakannya. Sekiranya cukai karbon dilaksanakan oleh Kerajaan pada masa hadapan, ianya akan diterajui oleh kementerian yang mempunyai bidang kuasa dan fungsi berkaitan percukaian seperti Kementerian Kewangan.
4. Pelaksanaan instrumen ekonomi seperti cukai karbon perlu dibangunkan, dibincangkan dan diperhalusi dengan sewajarnya oleh Kerajaan dengan penglibatan inklusif pemegang taruh berkaitan. Ini adalah penting bagi membolehkan pelaksanaan instrumen ekonomi tersebut memberi manfaat kepada pembangunan sosioekonomi negara. Pada masa ini, Kerajaan melalui Kementerian Kewangan dengan kerjasama Kementerian Alam Sekitar dan Air dan pemegang taruh lain sedang terlibat di dalam fasa awal kajian kebolehlaksanaan cukai karbon dan instrumen ekonomi lain di bawah program *Partnership for Market Implementation* (PMI) di bawah *The World Bank Group*. Kajian tersebut akan menilai potensi pelaksanaan cukai karbon dan instrumen ekonomi lain di Malaysia serta mencadangkan hala tuju untuk ketetapan dasar oleh Kerajaan. Kajian ini dibiayai oleh pihak *The World Bank Group* dan akan dilaksanakan sepanjang tahun 2022. Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

DARIPADA : TUAN CHAN FOONG HIN [KOTA KINABALU]

TARIKH : 1 MAC 2022 (SELASA)

SOALAN

TUAN CHAN FOONG HIN [KOTA KINABALU] minta **MENTERI ALAM SEKITAR DAN AIR** menyatakan penyediaan RUU untuk mengawal perdagangan kredit karbon di Malaysia. Adakah Kerajaan Persekutuan bersetuju dengan pernyataan Timbalan Ketua Menteri Sabah, Datuk Seri Panglima Jeffrey Kitingan bahawa "Sabah perlu bertindak segera sebelum hilang kuasa terhadap perdagangan kredit karbon".

JAWAPAN

Tan Sri Yang Di-Pertua,

1. Untuk makluman Ahli Yang Berhormat, antara keputusan utama persidangan UNFCCC COP-26 proses rundingan perubahan iklim di persidangan Negara Ahli Ke-26 di Glasgow, Scotland pada hujung tahun 2021 adalah mengenai prinsip asas bagi pelaksanaan mekanisme pasaran karbon. Antara keputusan utama yang dicapai adalah keperluan wajib untuk membuat pelarasan berpadanan (*corresponding adjustment*) bagi mengelakkan pengiraan berganda (*double counting*) bagi semua transaksi kredit karbon yang melibatkan negara. Dalam masa yang sama, keputusan rundingan juga menyatakan bahawa semua transaksi kredit karbon yang melibatkan pemindahan antarabangsa (*international transfer*) perlu mendapatkan kebenaran *national authority* melalui kerangka institusi yang dibentuk. Selain itu juga, keputusan rundingan turut menyatakan mengenai keperluan untuk membangunkan had

transaksi dan mekanisme kawal selia (*safeguards and limits*) bagi transaksi kredit karbon antarabangsa. Ini adalah penting bagi memastikan transaksi kredit karbon antarabangsa adalah telus, tidak dilaksanakan sewenang-wenangnya, serta mengambil kira kepentingan pemegang taruh berkaitan.

2. Berdasarkan keputusan rundingan UNFCCC tersebut, adalah jelas peranan penting Kementerian Alam Sekitar dan Air selaku '*national authority*' berkaitan mekanisme pasaran karbon negara. Bagi tujuan ini, KASA bertanggungjawab untuk memberikan kebenaran (*authorize*) semua transaksi antarabangsa kredit karbon dan melaksanakan pelarasan berpadanan bagi menjamin ketelusan pelaksanaan. Dalam masa yang sama, KASA juga bertanggungjawab untuk membangunkan infrastruktur asas bagi memantau dan menjejaki transaksi kredit karbon negara, dan menyediakan laporan penglibatan negara di dalam mekanisme pasaran karbon. Laporan penglibatan negara di dalam mekanisme pasaran karbon ini juga akan melalui proses penilaian oleh pasukan pakar (*expert review*) yang dilantik oleh UNFCCC. Seperti mana yang diputuskan oleh Jemaah Menteri baru-baru ini, pada masa ini KASA sedang membangunkan Pusat GHG Kebangsaan yang akan turut mengandungi fungsi khusus berkaitan pemantauan dan pelaporan mekanisme pasaran karbon negara.

3. Sehubungan itu, KASA berpendirian bahawa sebarang usaha dan penglibatan dalam mekanisme pasaran karbon perlulah dirujuk dan dilaporkan kepada KASA selaku '*national authority*' yang diiktiraf oleh UNFCCC. Perkara ini adalah penting kerana penglibatan negara di dalam mekanisme pasaran karbon antarabangsa berpotensi untuk menjejaskan pencapaian NDC dan aspirasi jangka masa panjang pelepasan sifar bersih negara. Dalam masa yang sama, KASA berpandangan penglibatan kerajaan Persekutuan bagi sebarang penglibatan di dalam mekanisme pasaran karbon adalah penting bagi menjamin kepentingan negara dan pemegang taruh berkaitan serta mengelakkan pihak dalam negara seperti Kerajaan Negeri menerima pelaburan yang berat sebelah dan tidak setimpal dengan usaha yang dicurahkan.

4. Untuk makluman ahli Yang Berhormat, Kerajaan Persekutuan tidak dimaklumkan, dirujuk, dan dilibatkan oleh Kerajaan Negeri Sabah dalam proses rundingan bagi perjanjian NCA tersebut. Sehubungan itu, KASA tidak dapat memberikan penjelasan terperinci mengenai kandungan perjanjian tersebut. Maklumat yang diterima oleh Kementerian Alam Sekitar dan Air hanyalah melalui kenyataan media dan kenyataan bertulis dari wakil Kerajaan Negeri Sabah yang dilaporkan di media massa. Sekiranya perjanjian NCA tersebut mempunyai aspek transaksi kredit karbon antarabangsa, maka ianya akan memberi impak secara langsung kepada pencapaian NDC dan aspirasi pelepasan GHG sifar bersih negara. Kementerian Alam Sekitar dan Air juga sentiasa mengalu-alukan Kerajaan Negeri Sabah untuk merujuk dan melibatkan Kerajaan Persekutuan dan pemegang taruh lain di dalam perbincangan berkaitan perjanjian NCA dan mekanisme pasaran karbon pada masa akan datang.

5. Selaras dengan keputusan Jemaah Menteri, KASA telah membangunkan panduan pasaran karbon secara sukarela (Voluntary Carbon Market – VCM) sebagai panduan umum kepada mana-mana entiti di dalam negara seperti pihak swasta dan Kerajaan Negeri yang ingin terlibat dengan pasaran VCM antarabangsa. Jemaah Menteri juga telah bersetuju dengan cadangan KASA untuk membangunkan platform tunggal perdagangan karbon di peringkat domestik dengan kerjasama Kementerian Kewangan dan BURSA Malaysia. Entiti berkaitan dalam negara seperti pihak swasta dan Kerajaan Negeri boleh memanfaatkan platform ini kelak bagi melaksanakan urus niaga kredit karbon di peringkat domestik yang secara langsung akan menggalakkan peralihan industri kepada aktiviti rendah karbon dan menarik pelaburan hijau. Platform tersebut sedang berada di dalam fasa pembangunan oleh pihak BURSA Malaysia dan dijangka siap pada hujung tahun 2022. Dalam masa yang sama, KASA juga sedang membangunkan dasar pasaran karbon negara yang selari dengan keputusan persidangan UNFCCC COP-26 Glasgow yang lalu. Dasar ini secara umumnya memperincikan ketetapan dasar dan prinsip asas bagi penglibatan di dalam mekanisme pasaran karbon. KASA akan melaksanakan libat urus bersama pemegang taruh dalam jangka masa terdekat bagi menjelaskan mengenai pembangunan dasar pasaran karbon negara ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI DR. MUJAHID BIN YUSOF
[PARIT BUNTAR]**

TARIKH : 1 MAC 2022 (SELASA)

SOALAN

Minta **PERDANA MENTERI** menyatakan perkembangan Akta Profesion Guaman Syarie 2019 yang telah diwartakan.

JAWAPAN

**YB SENATOR DATUK HAJI IDRIS BIN HAJI AHMAD
MENTERI DI JABATAN PERDANA MENTERI (HAL EHWAL ISLAM)**

Tuan Yang di-Pertua,

1. Akta Profesion Guaman Syarie 2019 [*Akta 814*] telah diwartakan pada 29 November 2019 dan belum dikuatkuasakan. Bagi tujuan menguatkuasakan Akta tersebut, sepuluh (10) Kaedah-Kaedah perlu digubal di bawah Akta tersebut. Kaedah-Kaedah tersebut adalah seperti yang berikut:

- (a) Kaedah-Kaedah Profesion Guaman Syarie (Wilayah-Wilayah Persekutuan) (Tatacara Mesyuarat Agung Badan Peguam Syarie);
- (b) Kaedah-Kaedah Profesion Guaman Syarie (Wilayah-Wilayah Persekutuan) (Akaun Peguam Syarie);

- (c) Kaedah-Kaedah Profesion Guaman Syarie (Wilayah-Wilayah Persekutuan) (Laporan Akauntan);
- (d) Kaedah-Kaedah Profesion Guaman Syarie (Wilayah-Wilayah Persekutuan) (Amalan dan Etika Peguam Syarie);
- (e) Kaedah-Kaedah Profesion Guaman Syarie (Wilayah-Wilayah Persekutuan) (Kelayakan Bagi Penerimaan Masuk Sebagai Peguam Syarie);
- (f) Kaedah-Kaedah Profesion Guaman Syarie (Wilayah-Wilayah Persekutuan) (Publisiti);
- (g) Kaedah-Kaedah Profesion Guaman Syarie (Wilayah-Wilayah Persekutuan) (Prosiding Tatatertib);
- (h) Kaedah-Kaedah Profesion Guaman Syarie (Wilayah-Wilayah Persekutuan) (Prosiding Tatatertib) (Rayuan);
- (i) Kaedah-Kaedah Profesion Guaman Syarie (Wilayah-Wilayah Persekutuan) (Tanggung Rugi Profesional); dan
- (j) Kaedah-Kaedah Profesion Guaman Syarie (Wilayah-Wilayah Persekutuan) (Penjalanan Pemilihan Anggota Majlis Peguam Syarie).

2. Sehingga hari ini, enam (6) draf Kaedah-Kaedah telah dikemukakan kepada Bahagian Gubalan, Jabatan Peguam Negara untuk semakan dan kelulusan seperti berikut:

- (a) Kaedah-Kaedah Profesion Guaman Syarie (Wilayah-Wilayah Persekutuan) (Tatacara Mesyuarat Agung Badan Peguam Syarie);

- (b) Kaedah-Kaedah Profesion Guaman Syarie (Wilayah-Wilayah Persekutuan) (Akaun Peguam Syarie);
- (c) Kaedah-Kaedah Profesion Guaman Syarie (Wilayah-Wilayah Persekutuan) (Laporan Akauntan);
- (d) Kaedah-Kaedah Profesion Guaman Syarie (Wilayah-Wilayah Persekutuan) (Amalan dan Etika Peguam Syarie);
- (e) Kaedah-Kaedah Profesion Guaman Syarie (Wilayah-Wilayah Persekutuan) (Kelayakan Bagi Penerimaan Masuk Sebagai Peguam Syarie); dan
- (f) Kaedah-Kaedah Profesion Guaman Syarie (Wilayah-Wilayah Persekutuan) (Publisiti).

3. Bagi tujuan menguatkuasakan Akta 814, pada 27 Januari 2022, satu kertas cadangan telah dibentangkan dalam Mesyuarat Majlis Agama Islam Wilayah Persekutuan (MAIWP) dan MAIWP telah memberi kelulusan untuk menguatkuasakan Akta 814 tersebut dalam masa terdekat. Perbincangan akan diadakan dengan pihak yang berkaitan untuk menetapkan tarikh kuatkuasa Akta 814 bagi memastikan pihak-pihak yang terlibat bersedia apabila Akta tersebut dikuatkuasa kelak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATIN PADUKA DR. TAN YEE KEW
[WANGSA MAJU]**

TARIKH : 01 MAC 2022 (SELASA)

SOALAN

DATIN PADUKA DR. TAN YEE KEW [WANGSA MAJU] minta **KEMENTERIAN PERDAGANGAN ANTARABANGSA DAN INDUSTRI** menyatakan unjuran sektor eksport negara pada tahun ini dan langkah-langkah yang telah diambil bagi menggalakkan industri baru dalam sektor eksport negara.

JAWAPAN

Tuan Yang di-Pertua,

Saya ingin memulakan dengan memberikan jawapan kepada soalan mengenai unjuran eksport negara seperti berikut:

A. Unjuran Eksport Negara bagi 2022

Secara ringkasnya prestasi perdagangan Malaysia pada tahun 2022 dijangka akan mengekalkan trend peningkatan dengan mencatatkan pertumbuhan sederhana berikutan pemulihan pasaran dan pembukaan sektor ekonomi dan sosial yang terkawal.

Situasi ketidaktentuan ekonomi akibat kemunculan varian baharu COVID-19 dan gangguan rantai bekalan global berkemungkinan akan terus menjejaskan prestasi perdagangan. Namun begitu, permintaan berterusan bagi barangan semikonduktor yang

didorong oleh kemajuan teknologi global serta barangan berasaskan komoditi dijangka akan terus menyokong perdagangan negara pada tahun 2022.

Tinjauan Ekonomi 2022 yang diterbitkan oleh Kementerian Kewangan mengunjurkan eksport akan berkembang sebanyak 1.5% di mana:

- Eksport barangan perkilangan dijangka bertambah sebanyak 1.5%, disokong oleh permintaan yang lebih kukuh untuk barangan elektrik & elektronik (E&E) dan barangan bukan E&E. Inisiatif pendigitalan yang berterusan dan penggunaan teknologi yang terkini akan terus mendorong permintaan bagi semikonduktor, terutamanya litar bersepadu elektronik dan peralatan pemprosesan (*integrated circuits & processors*), justeru mempercepatkan pertumbuhan barangan E&E sebanyak 2.4%;
- Eksport keluaran pertanian dianggarkan meningkat sebanyak 1.2%, disokong oleh permintaan bagi minyak sawit dan produk pertanian berasaskan minyak sawit serta getah asli; dan
- Eksport hasil galian diunjurkan berkembang sebanyak 1.4%, disumbangkan oleh permintaan yang lebih tinggi daripada pasaran utama untuk petroleum mentah dan gas cecair asli (LNG).

Bagi memperkukuh keupayaan eksport syarikat tempatan di pasaran antarabangsa, bagi tahun ini MITI melalui MATRADE telah merancang sejumlah 286 program pembangunan pengeksport dan promosi eksport. Selain itu, bagi meningkatkan prestasi eksport dan akses pasaran syarikat, 54 program promosi eksport yang terdiri daripada Pameran Perdagangan Ikonik, Misi Akselerasi Eksport dan Program Penyumberan Antarabangsa bersempena program perdagangan antarabangsa terkemuka juga akan dianjurkan MATRADE.

B. Menggalakkan Industri Baharu Dalam Sektor Eksport Negara

Pewujudan industri baharu adalah penting bagi menjana ekonomi negara ke tahap yang lebih tinggi dan relevan mengikut perkembangan semasa. Bagi menggalakkan industri baharu dalam sektor eksport negara, Kementerian Perdagangan Antarabangsa dan Industri (MITI) dan

agensi, telah mengambil dan sedang merancang beberapa inisiatif seperti berikut:

MITI menerusi Perbadanan Pembangunan Perdagangan Luar Malaysia (MATRADE) telah membangunkan RTPN yang merupakan pelan komprehensif bagi tempoh lima tahun untuk mengukuhkan kedudukan Malaysia di arena antarabangsa. Pelan ini bertujuan untuk memacu ekosistem perdagangan yang lebih cekap melalui pengukuhan fasilitasi perdagangan, logistik, pematuhan piawaian, akses pasaran, kemampanan perniagaan, pendigitalan, pelaburan serta penjenamaan. Salah satu daripada inisiatif di bawah RTPN adalah menggalakkan pelaburan dalam industri baharu yang akan meningkatkan eksport negara. Pelaksanaan RTPN ini melibatkan penggemblengan tenaga daripada pelbagai Kementerian, Agensi, Kerajaan Negeri dan semua pihak berkepentingan serta pihak swasta yang terlibat dalam ekosistem perniagaan.

Kementerian juga telah merencanakan agenda pelaburan negara baharu dengan pengenalan Dasar Pelaburan Baharu Negara Berteraskan Aspirasi Pelaburan Nasional (*National Investment Aspirations (NIA)*). Dasar ini merupakan pendekatan yang mensasarkan pelaburan berkualiti tinggi berintensifkan modal dan teknologi dengan berteraskan elemen-elemen Alam Sekitar, Sosial dan Tadbir Urus (*Environmental, Social and Governance (ESG)*). Pembaharuan kepada agenda pelaburan ini melibatkan lima teras utama iaitu, meningkatkan *economic complexity*, mewujudkan pekerjaan bernilai tinggi, memperluaskan rangkaian domestik, membangunkan kluster baharu dan sedia ada, serta mempertingkatkan keterangkuman.

Bagi menggalakkan syarikat dalam sektor pembuatan khususnya Perusahaan Kecil dan Sederhana (PKS) untuk mengadaptasi automasi dan pendigitalan agar lebih produktif dan berdaya tahan seterusnya merangsang pertumbuhan industri baharu, beberapa inisiatif dilaksanakan melalui Dasar Negara Mengenai Industri 4.0 atau Industry4WRD. Antaranya, program *Readiness Assessment (RA)* di bawah Perbadanan Produktiviti Malaysia (MPC) dan Industry4WRD *Intervention Fund* (Dana Intervensi) di bawah MIDA untuk membantu syarikat dalam transformasi ke arah Industri 4.0 yang merangkumi aspek

SOALAN NO : 71

mengenal pasti tahap pendigitalan dan pelaksanaan transformasi digital serta membolehkan *total solutions provider* (SP) milik tempatan mengembangkan pasaran di dalam dan luar negara.

Untuk tujuan ini, MITI sedang membangunkan Pelan Induk Perindustrian Baharu (*New Industrial Masterplan* - NIMP) 2030, berlandaskan Aspirasi Pelaburan Nasional yang menumpukan kepada sektor ekonomi yang mampu memberi sumbangan terbesar kepada negara. Pembangunan Pelan ini berada dalam fasa akhir dan dijangka dimuktamadkan pada Mac 2022. NIMP memberi penekanan kepada industri baharu seperti industri pembuatan termaju, perkhidmatan berasaskan teknologi Industri 4.0 serta ekonomi hijau.

Strategi dan pelan tindakan telah digubal berteraskan lima objektif berikut:

- i. Peralihan kepada sektor pembuatan termaju (*advanced manufacturing*) dan sektor perkhidmatan moden yang menghasilkan produk yang sofistikated dan inovatif;
- ii. Rantaian bekalan yang dinamik dan berdaya tahan dengan mengutamakan *self-sufficiency* dalam industri yang dikenalpasti;
- iii. Keupayaan modal insan yang bertaraf dunia dengan kapasiti inovasi yang tinggi;
- iv. Integrasi industri ke dalam rantaian nilai global; dan
- v. Ekosistem yang kondusif bagi menarik pelaburan yang berkualiti dan strategik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : TUAN WONG KAH WOH [IPOH TIMUR]

TARIKH : 1 MAC 2022 (SELASA)

SOALAN

TUAN WONG KAH WOH [IPOH TIMUR] minta **PERDANA MENTERI** menyatakan apakah usaha Kerajaan untuk melindungi *whistleblower* untuk memastikan tindakan terhadap *whistleblower* Lalitha Kunaratnam oleh Tan Sri Azam Baki dan pihak penguatkuasa tidak akan berulang.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, perlindungan kepada pemberi maklumat telah pun diperuntukkan di bawah Akta Perlindungan Pemberi Maklumat 2010 [Akta 711]. Akta ini telah digubal bertujuan untuk memerangi rasuah dan salah laku lain dengan menggalakkan dan memudahkan pemberi maklumat membuat pendedahan kelakuan tidak wajar, melindungi orang yang membuat pendedahan daripada tindakan yang memudaratkan dan memastikan supaya pendedahan tersebut disiasat dan diuruskan dengan sewajarnya.

Bagi mendapatkan perlindungan di bawah Akta 711, *whistleblower* atau pemberi maklumat hendaklah memenuhi syarat berikut :

Pertama, seseorang pemberi maklumat mestilah melapor agensi penguat kuasa yang berkaitan mengenai salah laku tersebut. “Agensi penguatkuasa” adalah merujuk kepada agensi yang ditubuhkan oleh Kerajaan Persekutuan atau Negeri yang diberi kuasa penyiasaan dan penguatkuasaan di bawah undang-undang bertulis; dan

Kedua, maklumat yang didedahkan kepada agensi penguatkuasa tidak boleh didedahkan kepada pihak lain melalui apa cara sekalipun bagi mengelakkan identiti pemberi maklumat diketahui oleh pihak lain dan perlindungan dapat diberikan kepada pemberi maklumat tersebut.

Dalam hal ini, perlindungan yang diberikan oleh agensi penguatkuasa di bawah Akta ini boleh dibatalkan menurut peruntukan seksyen 11 Akta berkenaan. Ia merangkumi tindakan pemberi maklumat yang mendedahkan maklumat sulit yang merupakan suatu kesalahan di bawah seksyen 8 Akta tersebut.

Oleh itu, pendekatan menerusi hebahan menerusi media massa dan platform lain akan digiatkan supaya pemberi maklumat hanya **membuat pendedahan kelakuan tidak wajar tersebut kepada agensi penguatkuasa** dan tidak mendedahkannya agar pemberi maklumat dapat dilindungi menurut undang-undang yang berkuatkuasa.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATUK MOHD. AZIS BIN JAMMAN
[SEPANGGAR]**

TARIKH : 1 MAC 2022 (SELASA)

SOALAN

DATUK MOHD. AZIS BIN JAMMAN [SEPANGGAR] minta **PERDANA MENTERI** menyatakan adakah Suruhanjaya Pilihan Raya (SPR) akan mempertimbangkan untuk menguatkuasakan larangan membawa telefon bimbit oleh pengundi semasa berada di dalam bilik mengundi sebagai sebahagian daripada penambahbaikan sistem pilihan raya yang sedang dijalankan ketika ini.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

Untuk makluman Ahli Yang Berhormat, SPR tidak bercadang untuk menguatkuasakan larangan membawa telefon bimbit oleh pengundi semasa mereka berada di saluran mengundi.

Membawa telefon bimbit bukan merupakan satu kesalahan dan tidak termaktub dalam Akta Kesalahan Pilihan Raya 1954 (Akta 5). Namun tidak boleh digunakan semasa berada di dalam saluran mengundi.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS**

PERTANYAAN : JAWAB LISAN

DARIPADA : PUAN TEO NIE CHING [KULAI]

TARIKH : 01 MAC 2022 (SELASA)

SOALAN

Puan Teo Nie Ching [Kulai] minta **PERDANA MENTERI** menyatakan hasil siasatan SPRM terhadap bekas pengerusi Prasarana Berhad dan Ahli Parlimen Pasir Salak, Datuk Seri Tajuddin Abdul Rahman dan Ahli Parlimen Kuala Langat, Dr Xavier Jayakumar.

JAWAPAN

Tuan Yang di-Pertua,

Untuk makluman Yang Berhormat, Suruhanjaya Pencegahan Rasuah Malaysia (SPRM) telah selesai menjalankan siasatan terhadap Ahli Parlimen Pasir Salak. Hasil siasatan mendapati tiada keterangan melibatkan salah guna kuasa dan rasuah yang berlaku.

Manakala bagi isu Ahli Parlimen Kuala Langat pula, siasatan bagi kes tersebut masih lagi berjalan. SPRM tidak dapat mendedahkan butiran siasatan tersebut.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : YB TUAN WONG HON WAI
[BUKIT BENDERA]**

TARIKH : 01 MAC 2022 (SELASA)

SOALAN :

Minta **PERDANA MENTERI** menyatakan :-

- (a) statistik dari segi kelulusan penolakan sedang diproses untuk bantuan khas kematian COVID-19 di bawah NADMA dan jumlah yang telah disalurkan; dan
- (b) apakah SOP dari segi tempoh hari untuk pembayaran selepas penerimaan permohonan dan berapa kes yang menghadapi kelewatan pembayaran dan berapa peratus penggunaan dana bantuan tersebut berbanding peruntukan Kerajaan dalam bajet.

JAWAPAN

**DIJAWAB OLEH YB DATUK DR ABD LATIFF AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Setakat 18 Februari 2022, Agensi Pengurusan Bencana Negara (NADMA) telah menerima sebanyak 38,431 permohonan Bantuan Khas Pengurusan Kematian COVID-19 NADMA. Daripada jumlah ini sebanyak 17,867 permohonan yang layak dan lengkap telah diluluskan dan bayaran sebanyak RM89.335 juta, manakala 279 permohonan telah ditolak kerana tidak memenuhi syarat-syarat yang telah ditetapkan. Baki sebanyak 20,285 permohonan masih diproses yang turut meliputi permohonan dengan dokumentasi tidak lengkap yang memerlukan tindakan susulan.
2. Kesemua permohonan yang telah diluluskan akan dibayar dalam tempoh masa 30 hari dari tarikh lulus. Semakan status permohonan boleh dibuat di portal <https://bkccovid19.nadma.gov.my/v2/> Terdapat 1,230 permohonan lulus (6.88%) menghadapi kelewatan bayaran akibat penutupan akaun kerajaan pada bulan Disember 2021. Kesemua permohonan ini telah diselesaikan. Bantuan-bantuan COVID-19 adalah dibayar dari Tabung COVID-19 NADMA (TCN) yang menerima sumbangan dari orang ramai yang semakin berkurangan. Sehingga 15 Februari 2022, sumbangan kerajaan kepada TCN adalah sebanyak 50.07% dan peratusan sumbangan kerajaan akan terus meningkat bergantung kepada jumlah permohonan yang telah diluluskan.

Sekian, terima kasih.

**PEMBERITAHU PERTANYAAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

DARIPADA : TUAN FONG KUI LUN [BUKIT BINTANG]

TARIKH : 01 MAC 2022 (SELASA)

SOALAN

minta **PERDANA MENTERI** menyatakan sejauh mana usaha untuk mempromosi Keluarga Malaysia berjaya membangkitkan kesedaran rakyat seluruhnya untuk mengutamakan perpaduan dan kebersamaan dalam semua aspek kehidupan bagi melonjakkan matlamat negara bangsa Malaysia baharu.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Usaha mempromosi Keluarga Malaysia sedang dipergiatkan dan diperhebatkan melalui pelbagai platform komunikasi dan media massa serta media sosial seperti Facebook, Instagram, Twitter dan laman sesawang semua Kementerian dan Agensi.

2. Selepas kejayaan penganjuran Sambutan 100 Hari Aspirasi Keluarga Malaysia di KLCC pada 9 hingga 12 Disember 2021 lalu yang

mendapat sambutan menggalakkan daripada rakyat, Program Jelajah Aspirasi Keluarga Malaysia dengan konsep yang sama akan dilaksanakan di 14 lokasi di seluruh negara pada tahun 2022. Program Jelajah Aspirasi Keluarga Malaysia ini akan bermula di Negeri Johor pada 3 – 5 Mac 2022 yang mana penutupnya akan diadakan di Putrajaya pada akhir Tahun 2022. Inisiatif ini merupakan antara langkah kerajaan untuk menyebarkan nilai-nilai Keluarga Malaysia di seluruh Negara bagi mencapai objektifnya iaitu bagi mendengar dan memenuhi keperluan rakyat demi kesejahteraan Keluarga Malaysia, membawa perkhidmatan untuk rakyat ke peringkat negeri (akar umbi) secara terancang, berfokus dan sentiasa mengutamakan keselamatan kesihatan rakyat dan agar semua lapisan rakyat dapat memahami dan menghayati aspirasi Perdana Menteri.

3. Konsep Keluarga Malaysia itu sendiri perlu bermula dalam keluarga di mana ianya mampu menyedarkan masyarakat menerusi nilai Kebersamaan, Keterangkuman dan Kesyukuran. Konsep Keluarga Malaysia menekankan pendekatan untuk berkongsi semangat kebersamaan, mengambil berat terhadap satu sama lain sebagai anggota keluarga disamping berikhtiar dengan bersungguh-sungguh untuk menjaga keutuhan negara yang berpegang kepada nilai-nilai kekeluargaan agar masyarakat saling melengkapi.

4. Justeru, bagi membentuk Keluarga Malaysia, ianya memerlukan usaha berterusan dari semua pihak sama ada kerajaan, swasta, badan bukan kerajaan serta individu untuk membantu dalam memupuk, mengukuh, dan memelihara perpaduan dan kebersamaan dalam kalangan rakyat Malaysia.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK IGNATIUS DARELL LEIKING
[PENAMPANG]**

TARIKH : 01 MAC 2022 (SELASA)

SOALAN:

minta **PERDANA MENTERI** menyatakan rasional pemberian kebenaran kepada guru-guru KEMAS untuk terlibat dalam politik dan adakah ia terpakai kepada semua guru-guru dan juga Penjawat Awam lain agar tiada dwistandard selaras dengan Perlembagaan Persekutuan yang menjamin hak berpersatuan dan kebebasan bersuara kepada semua rakyat Malaysia.

JAWAPAN

**DIJAWAB OLEH YB DATUK DR ABD LATIFF AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang di-Pertua,

1. Untuk makluman Ahli Yang Berhormat, rasional kebenaran untuk mana-mana individu di Malaysia termasuk pegawai KEMAS terlibat dalam politik adalah berdasarkan prinsip demokrasi, di mana semua pihak berhak diberi peluang untuk terlibat dalam aktiviti politik termasuklah penjawat awam. Kebenaran itu pada dasarnya adalah munasabah selagi mana penglibatan itu bersifat profesional, mengambil kira pengalaman penjawat awam yang bertindak sebagai pendokong dan pelaksana dasar, penggerak inisiatif serta program yang digariskan kerajaan demi pembangunan negara dan kesejahteraan rakyat.

2. Kerajaan bersedia untuk membenarkan penjawat awam terbabit dalam aktiviti politik melalui pengumuman yang dilakukan oleh Perdana Menteri, Datuk Seri Ismail Sabri Yaakob. Pekeliling bagi kebenaran berkenaan sedang diperincikan meliputi kumpulan penjawat awam, gred dan prosedur yang perlu diikuti bagi mengelak percanggahan kepentingan. Buat sementara ini, guru dan kakitangan Jabatan Kemajuan Masyarakat (KEMAS) dibenarkan untuk berpolitik mengikut garis panduan yang sedia ada.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK HAJI HASANUDDIN BIN MOHD YUNUS
(HULU LANGAT)**

TARIKH : 1 MAC 2020 (SELASA)

SOALAN

DATUK HAJI HASANUDDIN BIN MOHD YUNUS (HULU LANGAT) minta **MENTERI LUAR NEGERI** menyatakan adakah Kementerian ada had/peraturan tertentu untuk pengambilan pekerja asing di kedutaan kita, dan apakah usaha Kementerian untuk mempertingkatkan lagi kawalan keselamatan bangunan kedutaan di negara-negara berisiko.

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Hulu Langat atas pertanyaan yang dikemukakan.

Tuan Yang di-Pertua,

2. Untuk makluman Yang Berhormat, selain daripada *Home Based Staff* (HBS) yang ditugaskan dari Malaysia ke perwakilan Malaysia di luar negara, kakitangan lain yang bekerja di Kedutaan adalah digelar Kakitangan Ambilan Tempatan (KAT) dan bukannya pekerja asing. “Kakitangan Ambilan Tempatan” bermaksud warganegara negara penempatan, warganegara asing berstatus pemastautin tetap atau warganegara Malaysia yang dilantik untuk berkhidmat dengan mana-mana Perwakilan atau Pejabat Wakil Agensi Kerajaan di luar negeri.

3. Pelantikan pekerja di Perwakilan dan Pejabat Wakil Agensi Kerajaan Malaysia di luar negeri adalah berdasarkan waran perjawatan yang diluluskan oleh Kerajaan dan ianya terbuka kepada mana-mana warganegara (kecuali warganegara Israel) asalkan mereka mempunyai status yang sah di negara penempatan untuk membolehkan mereka diambil bekerja oleh Perwakilan atau Pejabat Wakil Agensi Kerajaan Malaysia mengikut undang-undang buruh tempatan.

4. Kementerian Luar Negeri tidak mengenakan sebarang had/peraturan tertentu mengikut warganegara dalam urusan pelantikan KAT kerana calon bagi jawatan KAT boleh dilantik dari kalangan mana-mana warganegara asalkan mereka memenuhi syarat-syarat pelantikan yang ditetapkan dan berdasarkan waran perjawatan yang diluluskan oleh kerajaan.

Tuan Yang di-Pertua,

5. Berhubung pertanyaan YB Hulu Langat mengenai usaha Kementerian untuk mempertingkatkan lagi kawalan keselamatan bangunan kedutaan di negara-negara berisiko, Kementerian ini mengambil maklum dan sentiasa peka terhadap sebarang ancaman keselamatan daripada luar ke atas bangunan kedutaan kita di luar negara.

6. Sehubungan itu, Kementerian Luar Negeri pada tahun ini telah mendapat peruntukkan berjumlah RM3 juta yang bertujuan antara lainnya untuk menaiktaraf sistem keselamatan pejabat-pejabat perwakilan Malaysia di luar negeri seperti sistem kamera litar tertutup (CCTV), sistem kad akses dan sistem pendaftaran pelawat. Projek ini adalah sebahagian daripada usaha Kementerian ini untuk memastikan keselamatan bangunan kedutaan kita di luar negara adalah terpelihara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN NOOR AMIN BIN AHMAD (KANGAR)

TARIKH : 1 MAC 2022 (SELASA)

SOALAN

TUAN NOOR AMIN BIN AHMAD [KANGAR] minta **PERDANA MENTERI** menyatakan langkah-langkah (road map) yang sedang diambil untuk membolehkan Akta Perkhidmatan Parlimen dilaksanakan. Apakah cabaran dan kesan kos untuk melaksanakannya.

JAWAPAN

Tuan Yang di-Pertua,

Untuk makluman Yang Berhormat, Kerajaan sedang menjalankan kajian terperinci mengenai Akta Perkhidmatan Parlimen yang ingin diperkenalkan semula setelah dimansuhkan melalui Akta Pindaan Perlembagaan pada tahun 1992.

Melalui pengenalan semula Akta Perkhidmatan Parlimen yang baharu, autonomi institusi Parlimen akan melibatkan konsep pemisahan kuasa yang meliputi:

1. Pentadbiran Parlimen yang bebas daripada pengaruh Eksekutif;
2. Pelantikan kakitangan termasuk pelantikan Setiausaha yang berasingan daripada Perkhidmatan Awam; dan
3. Mewujudkan kebebasan urusan kewangan dan pentadbiran dalaman.

Antara cabaran untuk melaksanakan akta ini adalah termasuk:

1. Pindaan kepada Undang-undang sedia ada - sebagai contoh Perlembagaan Persekutuan, Akta Prosedur Kewangan, Arahan Perbendaharaan dan Pekeliling Perkhidmatan;
2. Perubahan kepada Pihak Berkuasa Melantik (PBM) dan Ketua Perkhidmatan jika Perkhidmatan Parlimen adalah Perkhidmatan Awam yang berasingan;
3. Mewujudkan Peraturan-Peraturan Perkhidmatan Parlimen yang baharu bagi maksud syarat-syarat perkhidmatan, tatatertib dan lain-lain; dan
4. Isu semak dan imbang termasuk penyeliaan ke atas Suruhanjaya Perkhidmatan Parlimen yang akan ditubuhkan.

Perkara-perkara berbangkit tersebut sedang diperhalusi melalui sesi libat urus yang sedang berjalan di antara Parlimen Malaysia, Jabatan Perdana Menteri, Jabatan Perkhidmatan Awam, Kementerian Kewangan dan Jabatan Peguam Negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

DARIPADA : TUAN PANG HOK LIONG [LABIS]

TARIKH : 1 MAC 2022 (SELASA)

SOALAN

PERDANA MENTERI menyatakan apakah jaminan akan diberikan supaya Ahli Parlimen tidak akan disiasat oleh pihak polis atas isu-isu atau perkara-perkara yang dibawa atau didebatkan oleh Ahli Parlimen di dalam Dewan.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Fasal (2) Perkara 63 Perlembagaan Persekutuan jelas memperuntukkan bahawa tiada seorang Ahli Parlimen boleh dikenakan apa-apa prosiding di mahkamah berkenaan dengan apa yang dicakap atau apa-apa undi yang dibuat olehnya di Parlimen atau mana-mana jawatankuasa. Namun, Fasal (4) Perkara 63 Perlembagaan Persekutuan memperuntukkan bahawa Fasal (2) Perkara 63 Perlembagaan Persekutuan adalah tidak terpakai kepada mana-mana Ahli Parlimen yang telah dikenakan prosiding di mahkamah atas kesalahan di bawah undang-undang yang diluluskan oleh Parlimen di bawah Fasal (4) Perkara 10 Perlembagaan Persekutuan atau Akta Hasutan 1948 [Akta 15].

2. Seajar dengan Fasal (2) Perkara 63, seksyen 7 *Houses of Parliament (Privileges and Powers) Act 1952 [Act 347]* memperuntukkan bahawa tidak ada mana-mana Ahli Parlimen boleh dikenakan apa-apa prosiding jenayah, ditangkap, dipenjarakan, atau dikenakan pembayaran pampasan atas sebab apa-apa perkara yang dibawa susulan daripada petisyen, rang undang-undang, resolusi, usul atau yang dicakap di hadapan Dewan Rakyat atau Dewan Negara atau mana-mana jawatankuasa yang dilantik oleh Dewan Rakyat atau Dewan Negara.

3. Seksyen 3 Akta 347 juga memperuntukkan bahawa kebebasan untuk bercakap dan berbahas atau prosiding hendaklah ada dalam Parlimen dan kebebasan tersebut tidak boleh dipersoalkan atau dicabar di mana-mana mahkamah atau tribunal di luar daripada Parlimen.

4. Oleh itu, Fasal (2) Perkara 63 dan seksyen-seksyen tersebut merupakan jaminan yang jelas bahawa Ahli Parlimen tidak akan disiasat atas isu-isu atau perkara-perkara yang dibawa atau dibahaskan oleh Ahli Parlimen di dalam Parlimen. Walau bagaimanapun, kekebalan daripada prosiding mahkamah tersebut masih tertakluk kepada Fasal (4) Perkara 63 iaitu—

- a. undang-undang yang diluluskan oleh Parlimen yang melarang dipersoalkan apa-apa perkara, hak, taraf, kedudukan, keistimewaan, kedaulatan atau prerogatif yang ditetapkan atau dilindungi oleh peruntukan Bahagian III, Perkara 152, 153 atau 181 Perlembagaan Persekutuan melainkan yang berhubungan dengan pelaksanaannya; atau
- b. Akta Hasutan 1948 [*Akta 15*].

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN CHONG CHIENG JEN [STAMPIN]

TARIKH : 1 MAC 2022 (SELASA)

SOALAN

TUAN CHONG CHIENG JEN [STAMPIN] minta **PERDANA MENTERI** menyatakan apakah kesan kepada Sabah dan Sarawak dari segi ekonomi dan sosial akibat pemindahan ibu negara Indonesia ke Kalimantan dan apakah rancangan yang akan dilaksanakan atau peruntukan yang akan disalurkan untuk Sabah dan Sarawak dimanfaatkan daripada pemindahan tersebut.

JAWAPAN

**DIJAWAB OLEH YB DATO' SRI MUSTAPA BIN MOHAMED
MENTERI DI JABATAN PERDANA MENTERI (EKONOMI)**

Tuan Yang di-Pertua,

1. Pembangunan kawasan sempadan di Sabah dan Sarawak telah pun diberi perhatian dalam Bab 7 Rancangan Malaysia Kedua Belas (RMKe-12), iaitu Memperkukuh Pembangunan Sosioekonomi di Sabah dan Sarawak. Beberapa inisiatif yang dikenalpasti adalah seperti Ketersambungan Infrastruktur untuk Menggalakkan Hubungan Ekonomi yang Lebih Kukuh dengan Kalimantan dan Mempertingkatkan Keselamatan Sempadan dan Maritim.
2. Di bawah *Rolling Plan* 2 Tahun 2022, negeri Sabah telah diluluskan peruntukan pembangunan asas (DE Asas) sebanyak hampir RM5.17

bilion bagi pelaksanaan sejumlah 1,048 projek di bawah pelbagai Kementerian. Manakala bagi Sarawak, telah diluluskan DE Asas sebanyak RM4.44 bilion bagi pelaksanaan sejumlah 889 projek di bawah pelbagai kementerian. Antara projek berkaitan perancangan dan pembangunan kawasan sempadan yang diluluskan adalah:

- i) Kajian Pembangunan Ekonomi di Sempadan Sabah oleh pihak SEDIA, dengan kos RM10 juta (peruntukan RP2 2022 sebanyak RM1 juta). Kajian ini akan mengambil tempoh masa selama 24 bulan dan dijadualkan bermula pada Jun 2022 sehingga Jun 2024;
- ii) Projek Pembinaan Pos Simanggaris, Kalabakan dengan kos projek RM2 juta (peruntukan RP2 2022 sebanyak RM500 ribu);
- iii) Projek Naiktaraf Kompleks ICQS Tebedu, Serian, Sarawak dengan kos projek RM100 juta (peruntukan RP2 2022 sebanyak RM500 ribu); dan
- iv) Projek Jalan dari Sempadan Ba'kelalan/Kompleks CIQ Menghala ke Lawas dengan kos projek sebanyak RM80 juta.

3. Berhubung aspek keselamatan kawasan sempadan, Kerajaan akan terus meneliti keperluan pembinaan pos kawalan dan pusat sekuriti (*security check point*) di sepanjang Kalimantan Borneo dari semasa ke semasa selaras dengan perancangan Kementerian Dalam Negeri dan Kerajaan Negeri. Dalam usaha meningkatkan ketersambungan jalan di kawasan sempadan, Kerajaan melalui Kementerian Kerja Raya turut melaksanakan Kajian Semula Pelan Pembangunan Rangkaian Jalan Raya 2040 (HNDP 2040) bagi negeri Sabah, Sarawak dan Wilayah Persekutuan Labuan (kos kajian sebanyak RM7 juta).

4. Untuk makluman Tuan Yang di-Pertua, Kerajaan Malaysia dan Kerajaan Indonesia sentiasa membincangkan perkara melibatkan kerjasama dua hala dan pelbagai hala berkenaan pembangunan wilayah sempadan negara dalam pelbagai platform, antaranya termasuklah Kawasan Pertumbuhan ASEAN Timur Brunei Darussalam-Indonesia-

Malaysia-Filipina (BIMP-EAGA). Di dalam platform BIMP-EAGA ini, pelbagai perkara dibincangkan khususnya untuk meningkatkan kesalinghubungan (*connectivity*) antara wilayah dan juga mengurangkan jurang kemiskinan antara penduduk wilayah BIMP-EAGA.

5. Di samping itu, Kerajaan melalui Bahagian Hal Ehwal Sabah dan Sarawak, Jabatan Perdana Menteri telah membentuk sebuah Pasukan Petugas Khas (*Taskforce*) Mengenai Pembangunan Di Kawasan Sempadan Malaysia dan Indonesia (Sabah-Sarawak-Kalimantan). *Taskforce* ini merupakan jawatankuasa yang ditubuhkan di bawah Jawatankuasa Kerja Sosio-Ekonomi (JKSE) yang bertujuan untuk meneliti perkara-perkara berkaitan pembangunan di kawasan sempadan tersebut. Antara hala tuju *Taskforce* ini adalah merancang dan menyelaraskan penyediaan Pelan Tindakan Pembangunan di Sempadan Malaysia dan Indonesia (Sabah-Sarawak-Kalimantan) dan memantau pelaksanaan.

6. Kerajaan yakin bahawa usaha-usaha yang dilaksanakan bagi pembangunan kawasan sempadan di Sabah dan Sarawak ini akan menyumbang kepada peningkatan sosioekonomi dan kesejahteraan penduduk di negeri Sabah dan Sarawak.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

**DARIPADA : DATO' WIRA HAJI AMIRUDDIN BIN HAJI
HAMZAH [KUBANG PASU]**

TARIKH : 1 MAC 2022 (SELASA)

SOALAN

DATO' WIRA HAJI AMIRUDDIN BIN HAJI HAMZAH [KUBANG PASU] minta **MENTERI ALAM SEKITAR DAN AIR** menyatakan apakah langkah segera dan jangka sederhana bagi menebat kesan banjir kepada kawasan-kawasan yang terok dilanda banjir baru-baru ini seperti Taman Sri Muda dan kawasan-kawasan rendah yang lain.

JAWAPAN

Tan Sri Yang Di-Pertua,

1. KASA melalui agensi-agensi terlibat telah melaksanakan beberapa tindakan segera bagi menebat kesan banjir seperti berikut:

- i. memastikan kesiapsiagaan infrastruktur tebatan banjir (pam pintu air dan genset) supaya dapat berfungsi pada tahap optimum ketika banjir berlaku;
- ii. menyelenggara, mendalamkan dan membersihkan saluran, sungai serta kolam takungan banjir bagi meningkatkan kapasiti aliran dan takungan air larian permukaan;
- iii. mempertingkatkan program penyelidikan dan pembangunan (R&D) berkaitan perubahan iklim khususnya dalam aspek adaptasi dan pengurangan risiko bencana (*Climate Change Adaptation (CCA) -Disaster Risk Reduction (DRR)*);

2. KASA juga telah mengambil langkah jangka sederhana bagi menebat kesan banjir seperti berikut:

- i. memperkasa tadbir urus adaptasi perubahan iklim sektor air melalui pembangunan Akta Adaptasi Sektor Air sebagai strategi jangka panjang dengan mengambil kira keperluan peningkatan tahap perlindungan infrastruktur saluran dan pantai negara. Di bawah akta ini, KASA akan mencadangkan penubuhan sebuah tabung khas/kumpulan wang amanah untuk peningkatan kapasiti adaptif sektor air dan kawasan pesisir melalui pembangunan dan penyelenggaraan infrastruktur yang mengambil kira faktor perubahan iklim;
- ii. penggunaan pendekatan *nature-based solution* seperti pembinaan denai sungai sebagai platform penglibatan masyarakat dalam aktiviti perlindungan, pembersihan dan pemuliharaan sungai;

- iii. meningkatkan kesedaran awam dengan pelaksanaan Public Outreach Programme (POP) dan program kesedaran alam sekitar melalui pendekatan *communication, education and public awareness (CEPA)* seperti latihan menghadapi banjir, atau *flood drills*, dengan izin. Pendekatan ini akan dilaksanakan di peringkat sekolah dan masyarakat melalui rukun tetangga untuk meningkatkan kesedaran rakyat menghadapi amaran banjir dan langkah yang perlu diambil jika berdepan ancaman ini; dan
- iv. memperkasa pelaksanaan pendekatan Pengurusan Lembangan Sungai Bersepadu (IRBM) dalam pengurusan lembangan sungai melalui empat (4) objektif utama iaitu:
 - a) memastikan air mencukupi;
 - b) memastikan air bersih;
 - c) mengurangkan risiko banjir; dan
 - d) melestarikan alam sekitar.

Melalui pembangunan pelan IRBM, cadangan perancangan dan pembangunan sumber air di dalam sesebuah lembangan mestilah dijadikan rujukan mandatori oleh pihak Kerajaan Negeri dan semua pihak berkepentingan. Dalam merancang pembangunan, kesan terhadap kelestarian alam sekitar perlu diberikan perhatian terutamanya sumber air yang sangat diperlukan oleh negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

DARIPADA : TUAN WONG CHEN (SUBANG)

TARIKH : 1 MAC 2022 (SELASA)

SOALAN

TUAN WONG CHEN [SUBANG] minta **PERDANA MENTERI** menyatakan kesepakatan untuk segera membentangkan pindaan kepada Peraturan Tetap Mesyuarat bagi membolehkan suatu jadual mingguan tetap untuk Rang Undang-undang Persendirian supaya rang undang-undang ini boleh dibentangkan lebih awal daripada urusan Kerajaan seperti yang diamalkan di Parlimen United Kingdom.

JAWAPAN

Tuan Yang di-Pertua,

Parlimen Malaysia mengambil maklum dengan cadangan pindaan kepada Peraturan Mesyuarat bagi membolehkan suatu jadual mingguan tetap untuk Rang Undang-undang Persendirian yang dikemukakan oleh Ahli Yang Berhormat.

Untuk makluman Ahli Yang Berhormat, apa-apa cadangan perlu dibawa ke Jawatankuasa Dewan dan Jawatankuasa Peraturan Mesyuarat untuk diperhalusi bagi dipertimbangkan.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : TUAN LARRY SOON @ LARRY SNG WEI
SHIEN (JULAU)**

TARIKH : 1 MAC 2022 (SELASA)

SOALAN

TUAN LARRY SOON @ LARRY SNG WEI SHIEN (JULAU) minta **MENTERI LUAR NEGERI** menyatakan senarai negara-negara yang akan Malaysia bekerjasama secara berperingkat dalam masa terdekat ini bagi meluaskan lagi hubungan dua hala antara Malaysia dan negara luar di bawah kerjasama Laluan Perjalanan Vaksinasi (VTL).

JAWAPAN

Tuan Yang di-Pertua,

Saya mengucapkan terima kasih kepada Yang Berhormat Julau atas pertanyaan yang dikemukakan.

Tuan Yang di-Pertua,

2. Untuk makluman Yang Berhormat, Kerajaan Malaysia sedang mengadakan rundingan dengan dua belas (12) buah negara bagi cadangan pelaksanaan kerjasama Laluan Perjalanan Vaksinasi (VTL). Pemilihan negara-negara tersebut adalah berdasarkan kepada status hubungan diplomatik dan keperluan pergerakan rentas sempadan.

3. Dalam hal ini, untuk rantau ASEAN, Kerajaan Malaysia kini sedang berunding dengan Brunei, Indonesia, Singapura, Vietnam dan Thailand. Manakala itu, negara-negara lain pula adalah Australia, China, India, Jepun, New Zealand, Republik Korea dan United Kingdom.

4. Untuk makluman Yang Berhormat, terdapat tiga (3) fasa di dalam rundingan VTL ini iaitu Fasa Rundingan Awal, Fasa Rundingan Komprehensif dan Fasa Pelaksanaan.
5. Untuk Fasa Pelaksanaan, hanya Singapura yang telah berada di Fasa tersebut. VTL-Udara dan VTL-Darat telah mula dilaksanakan pada 29 November 2021. Penangguhan VTL sebelum ini berikutan penularan varian Omicron telah disambung semula bermula pada 21 Januari 2022 dengan kuota penjualan tiket yang dikurangkan kepada separuh daripada kuota asal.
6. Sementara itu, tiga (3) buah negara berada di Fasa Rundingan Komprehensif iaitu Brunei, Indonesia dan Republik Korea. Rundingan antara Malaysia dengan negara-negara tersebut masih berjalan.
7. Di Fasa Rundingan Awal, terdapat lapan (8) buah negara yang bersetuju untuk pelaksanaan VTL iaitu Australia, China, India, Jepun, New Zealand, United Kingdom, Vietnam dan Thailand.
8. Secara kesimpulannya, kecuali aturan yang telah dilaksanakan dengan Singapura, perkembangan rundingan mengenai pembukaan sempadan dengan negara-negara lain yang telah dikenalpasti adalah agak perlahan, susulan penularan varian Omicron. Walaupun negara masing-masing mengambil pendekatan berhati-hati, rundingan mengenai pembukaan sempadan negara secara bersasar dan berperingkat ini masih lagi berjalan.
9. Kementerian Luar Negeri dalam hal ini akan terus bekerjasama dengan semua Kementerian dan Agensi dalam memastikan penyelarasan dan rundingan VTL dapat dilaksanakan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB TUAN R. SIVARASA
[SUNGAI BULOH]**

TARIKH : 1 MAC 2022 (RABU)

SOALAN :

Minta **PERDANA MENTERI** menyatakan bila Datuk Hasanah Abdul Hamid akan didakwa semula atas pertuduhan melakukan kesalahan CBT (criminal breach of trust) melibatkan dana Kerajaan RM50 juta sebab ini adalah jaminan yang diberi kepada Mahkamah Tinggi pada 12 April 2021 apabila kes beliau ditarik balik oleh Pendakwa Raya dan Hakim Mahkamah Tinggi YA Datuk Ahmad Shahril Mohd Salleh memberi perintah DNAA (Discharge Not Amounting to Acquittal) dalam kes ini.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Pada 12.04.2021, Mahkamah Tinggi telah melepaskan tanpa membebaskan (DNAA) Datuk Hasanah Abdul Hamid daripada pertuduhan melakukan pecah amanah wang berjumlah AS\$12.1 juta selaras dengan peruntukan di bawah seksyen 254(1) Kanun Tatacara Jenayah.
2. Kertas siasatan telah dikembalikan kepada pihak Suruhanjaya Pencegahan Rasuah Malaysia (SPRM) untuk siasatan lanjut.
3. Walau bagaimanapun, sehingga kini hasil siasatan belum dikemukakan semula kepada AGC untuk keputusan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : JAWAB LISAN

DARIPADA : PUAN YEO BEE YIN [BAKRI]

TARIKH : 1 MAC 2022 (SELASA)

SOALAN

PUAN YEO BEE YIN [BAKRI] minta **MENTERI ALAM SEKITAR DAN AIR** menyatakan impak Nature Conservation Agreement (NCA) Sabah yang melibatkan karbon kredit kepada net carbon emission Malaysia.

JAWAPAN

Tan Sri Yang Di-Pertua,

1. Untuk makluman Yang Berhormat, Kerajaan Persekutuan tidak dimaklumkan, dirujuk, dan dilibatkan oleh Kerajaan Negeri Sabah dalam proses rundingan bagi perjanjian NCA tersebut. Sehubungan itu, KASA tidak dapat memberikan penjelasan terperinci mengenai kandungan perjanjian tersebut. Maklumat yang diterima oleh Kementerian Alam Sekitar dan Air hanyalah melalui kenyataan media dan kenyataan bertulis dari wakil Kerajaan Negeri Sabah yang dilaporkan di media massa. Sekiranya perjanjian NCA tersebut mempunyai aspek transaksi kredit karbon antarabangsa, maka ianya akan memberi impak secara langsung kepada pencapaian NDC dan aspirasi pelepasan GHG sifar bersih negara. KASA juga sentiasa mengalu-alukan Kerajaan Negeri Sabah untuk merujuk dan melibatkan Kerajaan Persekutuan dan pemegang taruh lain di dalam perbincangan berkaitan perjanjian NCA dan mekanisme pasaran karbon pada masa akan datang.

2. Selaras dengan keputusan Jemaah Menteri, KASA telah membangunkan panduan pasaran karbon secara sukarela (Voluntary Carbon Market – VCM) sebagai panduan umum kepada mana-mana entiti di dalam negara seperti pihak swasta dan Kerajaan Negeri yang ingin terlibat dengan pasaran VCM antarabangsa. Jemaah Menteri juga telah bersetuju dengan cadangan KASA untuk membangunkan platform tunggal perdagangan karbon di peringkat domestik dengan kerjasama Kementerian Kewangan dan BURSA Malaysia.

Entiti berkaitan dalam negara seperti pihak swasta dan Kerajaan Negeri boleh memanfaatkan platform ini kelak bagi melaksanakan urusan niaga kredit karbon di peringkat domestik yang secara langsung akan menggalakkan peralihan industri kepada aktiviti rendah karbon dan menarik pelaburan hijau. Platform tersebut sedang berada di dalam fasa pembangunan oleh pihak BURSA Malaysia dan dijangka siap pada hujung tahun 2022. Dalam masa yang sama, KASA juga sedang membangunkan dasar pasaran karbon negara yang selari dengan keputusan persidangan UNFCCC COP-26 Glasgow yang lalu. Dasar ini secara umumnya memperincikan ketetapan dasar dan prinsip asas bagi penglibatan di dalam mekanisme pasaran karbon. KASA akan melaksanakan libat urus bersama pemegang taruh dalam jangka masa terdekat bagi menjelaskan mengenai pembangunan dasar pasaran karbon negara ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA,
PARLIMEN KEEMPAT BELAS 2022**

PERTANYAAN : LISAN

**DARIPADA : DATUK SERI MOHD REDZUAN YUSOF
[ALOR GAJAH]**

TARIKH : 01 MAC 2022 (SELASA)

SOALAN

DATUK SERI MOHD REDZUAN YUSOF [ALOR GAJAH] MINTA KEMENTERIAN PERDAGANGAN ANTARABANGSA DAN INDUSTRI menyatakan adakah kerajaan akan mewujudkan Dasar Sistem Eko dan Insentif bagi memberi galakan penggunaan kenderaan zero carbon dan air mobility memandangkan banyak negara-negara telah bergiat aktif di dalam mempromosikan penggunaan kenderaan-kenderaan dengan ciri-ciri tersebut.

JAWAPAN

Tuan Yang Dipertua,

Dasar Automotif Nasional (NAP) 2020 telah menekankan penerapan elemen teknologi baharu yang lebih mesra alam untuk menangani masalah pencemaran sejajar dengan komitmen Malaysia terhadap Konvensyen Kerangka Kerja Pertubuhan Bangsa-Bangsa Bersatu mengenai Perubahan Iklim (UNFCCC) untuk mengurangkan pelepasan karbon sebanyak 45 peratus menjelang 2030.

Sejak tahun 2014 dan diteruskan di bawah NAP 2020, Kerajaan menggalakkan aktiviti pemasangan kenderaan cekap tenaga (*Energy Efficient Vehicle* - EEV) termasuk kenderaan elektrik (*Electric Vehicle* - EV) bagi meningkatkan daya saing kenderaan buatan tempatan dan memenuhi spesifikasi teknologi hijau yang memelihara alam sekitar.

Inisiatif ini melibatkan tawaran insentif bagi aktiviti pemasangan atau pengeluaran tempatan kenderaan EEV termasuk EV dan pembuatan komponen kritikal berkaitan, bagi menggalakkan pelaburan serta merencanakan pembangunan ekosistem EV. Insentif yang diberikan merangkumi pengecualian cukai langsung dan tidak langsung bagi memangkinkan *supply side* iaitu pengeluar kenderaan EV. Antara insentif sedia ada yang ditawarkan termasuklah Pengecualian Cukai Pendapatan melalui Galakan Taraf Perintis atau Elaun Cukai Pelaburan bagi pemasangan kenderaan EV, komponen EV dan aktiviti perkhidmatan teknologi hijau (*green services*).

Di bawah Belanjawan 2022, satu pakej insentif telah ditawarkan bagi meningkatkan permintaan ke atas EV yang secara langsung dapat menggalakkan pelaburan bukan sahaja bagi pengeluaran kenderaan dan komponen tetapi sokongan infrastruktur EV, iaitu:

- i. Pengecualian duti import, duti eksais dan cukai jualan sepenuhnya ke atas EV yang dipasang secara tempatan atau *Completely Knocked-Down* untuk tempoh 4 tahun sehingga 2025;
- ii. Pengecualian duti import dan duti eksais sepenuhnya ke atas pengimportan EV jenis *Completely Build Up* (CBU) untuk tempoh 2 tahun sehingga 2023;
- iii. Pengecualian cukai jalan sepenuhnya bagi kenderaan EV; dan
- iv. Pelepasan cukai pendapatan individu sehingga RM2,500 bagi kos pemasangan, sewaan, pembelian termasuk sewa-beli peralatan atau yuran langganan kemudahan pengecasan EV.

Selain itu, badan kerajaan dan agensi berkepentingan seperti MITI dan agensinya yang berkaitan, Kementerian Alam Sekitar dan Air (KASA), Kementerian Pengangkutan (MOT), Kementerian Sains, Teknologi dan Inovasi (MOSTI), Jabatan Pengangkutan Jalan (JPJ), Jabatan Alam Sekitar (JAS) dan *Malaysian Green Technology Corporation* (MGTC) terlibat secara bersama dalam memberikan input berkaitan EV bagi melengkapi dasar semasa kerajaan seperti dokumen Dasar Pengangkutan Negara dan *Low Carbon Mobility Blueprint* (LCMB) yang memberi fokus kepada strategi pembangunan ekosistem EV yang menyeluruh merangkumi kenderaan, teknologi berkaitan EV, infrastruktur

pengecasan EV termasuklah meluaskan penggunaan dan pelaburan dalam ekosistem EV.

Sehubungan itu, kerajaan pada masa ini tidak bercadang untuk mewujudkan satu lagi Dasar Sistem Eko bagi menangani isu pelepasan karbon serta penetapan strategi dan hala tuju yang lain kerana dasar ini telah diambil kira dalam dasar semasa Kerajaan seperti yang telah dinyatakan.

Berkenaan *Air mobility*, ianya merupakan salah satu sektor pengangkutan baharu yang masih diterokai oleh pihak yang berkepentingan. Di bawah Pelan Induk Industri Aeroangkasa Malaysia 2030, sektor ini dikategorikan dalam sub-sektor Integrasi Sistem yang melibatkan aktiviti reka bentuk, pembangunan dan integrasi sistem. Sistem *air mobility* memerlukan sokongan padu dari segi kelulusan rekabentuk, pengujian makmal & lapangan, persijilan, pengoperasian dan keselamatan oleh pihak berkuasa terutamanya Pihak Berkuasa Penerbangan Awam Malaysia (CAAM). Selain itu sokongan infrastruktur dan ekosistem juga penting dalam menjamin kejayaan pembangunan sesebuah sistem *air mobility*.

Sungguhpun begitu, tumpuan sedang diberikan dalam membangunkan ekosistem perkhidmatan Dron dan *Unmanned Aerial Vehicle* (UAV). Infrastruktur dan ekosistem teknologi Dron dan UAV dilihat dapat menjadi asas yang kukuh dalam membangunkan sistem *air mobility* termasuklah dari segi kelulusan pengoperasian. Kerajaan turut menggalakkan kerjasama teknikal dijalinkan antara pemain industri tempatan dengan rakan teknologi strategik dalam mempercepatkan pembangunan kepakaran tempatan di dalam teknologi Dron dan UAV yang turut merangkumi *air mobility*.

Sekian, terima kasih.

**PEMBERITAHUAN PERTANYAAN JAWAB LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

**DARIPADA : DATIN PADUKA DR. TAN YEE KEW
(WANGSA MAJU)**

TARIKH : 01 MAC 2022 (SELASA)

SOALAN

DATIN PADUKA DR. TAN YEE KEW (WANGSA MAJU) minta **MENTERI WILAYAH PERSEKUTUAN** menyatakan berapa jumlah rumah PPR atau Perumahan Awam (PA) yang tersedia untuk permohonan khusus di Wilayah Persekutuan dan lokasi projek-projek tersebut, berapa bilangan permohonan dalam senarai '*waiting list*' untuk rumah PPR.

JAWAPAN

Tuan Yang di-Pertua,

Untuk makluman, sehingga Februari 2022, bilangan rumah yang tersedia untuk permohonan khusus adalah sebanyak 77 unit melibatkan 18 buah Projek Perumahan Rakyat (PPR)/ Perumahan Awam (PA) di sekitar Wilayah Persekutuan Kuala Lumpur. Jumlah yang masih dalam proses setakat ini adalah sebanyak 7,556 daripada keseluruhan 10,769 permohonan.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : YB PUAN MARIA CHIN BINTI ABDULLAH
(PETALING JAYA)**

TARIKH : 01 MAC 2022 (SELASA)

SOALAN

PUAN MARIA CHIN BINTI ABDULLAH [PETALING JAYA] minta **MENTERI KANAN KERJA RAYA** menyatakan adakah pihak berkuasa lebuhraya Malaysia telah memberi kelulusan kepada PJD Link (M) Sdn. Bhd. untuk menjalankan kerja ukur awal bagi membina lebuhraya PJD Link dan adakah Kementerian akan menyokong projek seumpama itu, memandangkan bantahan yang meluas daripada penduduk Petaling Jaya.

JAWAPAN

Tuan Yang Di-Pertua,

Untuk makluman Ahli Yang Berhormat, cadangan penswastaan projek Lebuhraya *Petaling Jaya Dispersal Elevated Highway* (PJD Link) diluluskan oleh Kerajaan pada 12 November 2021 oleh Jemaah Menteri melalui kaedah Bina-Kendali-Pindah (BOT) tertakluk kepada rundingan lanjut mengenai cadangan teknikal dan kewangan projek. Kerajaan Negeri Selangor melalui mesyuarat Majlis Tindakan Ekonomi Negeri Selangor (MTES) juga telah memberikan kelulusan dasar pada 3 September 2020 yang lalu. Walaupun kelulusan telah diberikan oleh Kerajaan, pihak konsesi PJD Link masih perlu memenuhi syarat-syarat duluan (*conditions precedent* - CP) yang ditetapkan dalam tempoh 12 bulan dengan opsiyen tambahan selama 3 bulan sebelum perjanjian konsesi berkuatkuasa sepenuhnya.

Terdapat beberapa penambahbaikan telah dicadangkan bagi mengambilkira isu-isu yang dihadapi sebelum itu. Jajaran Jalan Semangat ke *PJ New Town* telah disesuaikan mengambil kira bantahan tersebut. Di samping itu, bagi menghasilkan kesan positif kepada penduduk Petaling Jaya, beberapa persimpangan bertingkat juga telah ditambah kepada 11 berbanding 7 persimpangan bertingkat asal. Laporan awal *Social Impact Assessment* (SIA) menunjukkan 75.8% responden bersetuju dengan pelaksanaan projek Lebuhraya *PJD Link* di mana ia adalah lebih daripada mencukupi untuk kadar penerimaan awam terhadap sesebuah cadangan projek untuk diteruskan.

Di peringkat Kerajaan Negeri Selangor pula, projek Lebuhraya *PJD Link* ini perlu dilaksanakan secara permohonan rundingan di bawah Seksyen 20A, Akta Perancangan Bandar dan Desa 1976 [Akta 172] melalui Mesyuarat Jawatankuasa Teknikal Perancang Negeri. Antara kajian dan analisa terperinci yang akan diambilkira di semasa kelulusan Pihak Berkuasa Negeri adalah Kajian Impak Alam Sekitar (EIA), Kajian Impak

Sosial (SIA) dan Kajian Impak Trafik (TIA) yang meliputi perkara-perkara seperti keadaan tapak, saliran semula jadi, akses dan lalulintas, kualiti alam sekitar, sosio ekonomi setempat, justifikasi pemilihan jajaran, alternatif jajaran, lokasi kemudahan, impak gunatanah, pematuhan *zoning* serta pembangunan komited di mana akan melibatkan sesi libat urus awam (*public engagement*) bersama agensi dan komuniti setempat yang terlibat dengan cadangan jajaran lebuh raya.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : DATO' SERI DR. WAN AZIZAH WAN
ISMAIL [PANDAN]**

TARIKH : 01 MAC 2022 (SELASA)

SOALAN

Minta **PERDANA MENTERI** menyatakan bilakah Akta atau Rang Undang-undang Keselamatan Siber dapat dibentangkan di Parlimen supaya negara dapat bertindak untuk mempertahankan, memelihara serta melancarkan serangan balas (Defence, Protect and Attack) terhadap serangan anasir-anasir yang mengancam keselamatan negara, institusi dan masyarakat..

JAWAPAN

**DI JAWAB OLEH YB DATUK DR. ABD LATIFF BIN AHMAD,
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang Dipertua,

1. Pembentangan RUU Keselamatan Siber kepada Parlimen dijangka akan dibuat pada suku pertama tahun 2023.
2. Majlis Keselamatan Negara (MKN) melalui Agensi Keselamatan Siber Negara (NACSA) telah diluluskan peruntukan dalam Rancangan Malaysia Ke-12 bagi melaksanakan Kajian Penggubalan Rang Undang-Undang (RUU) Keselamatan Siber. Kajian ini dilaksanakan dalam memastikan satu undang-undang keselamatan siber yang menyeluruh dan komprehensif dihasilkan bagi melengkapi undang-undang sedia ada, khususnya dalam melindungi Infrastruktur Maklumat Kritikal Negara (*Critical National Information Infrastructure* (CNII)). Kajian ini dilaksanakan dengan melibatkan pelbagai pemegang taruh (stakeholders) termasuk agensi kerajaan, swasta, masyarakat sivil dan akademik.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : PUAN HAJAH FUZIAH BINTI SALLEH
[KUANTAN]**

TARIKH : 01 MAC 2022 (SELASA)

SOALAN

PUAN HAJAH FUZIAH BINTI SALLEH [KUANTAN] minta **PERDANA MENTERI** menyatakan apakah perancangan oleh pihak Kementerian secara sistemik dan perubahan undang-undang untuk memastikan kuota minimum 30% penglibatan wanita di dalam Parlimen dapat dilaksanakan menjelang pilihan raya umum akan datang.

JAWAPAN

**YB DATO SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

1. Untuk makluman Ahli Yang Berhormat, Kerajaan sentiasa peka terhadap penglibatan wanita dalam apa jua platform di peringkat Kementerian dan Jabatan. Kerajaan juga sentiasa komited dan menyokong segala usaha untuk meningkatkan kepimpinan wanita dalam pelbagai bidang termasuk melalui penggubalan dan penguatkuasaan undang-undang.
2. Namun begitu, parti-parti politik di Malaysia juga perlu menggalas tanggungjawab untuk memainkan peranan penting yang lebih signifikan untuk melatih, memperkasa dan memberi peluang kepada ahli-ahli politik wanita agar mereka juga dapat menyumbang sebagai pembela nasib rakyat dan penggerak pada pembangunan negara.
3. Dalam hal ini, Kerajaan sangat mengalu-alukan apa jua cadangan dan perbincangan ke arah untuk menyokong, meningkatkan kepimpinan wanita dalam mana-mana peringkat. Kerajaan di peringkat Kementerian atau Jabatan Persekutuan bersedia mengadakan perbincangan dengan mana-mana pihak untuk memastikan supaya hasrat untuk kita meningkatkan lagi peranan wanita terutama kedudukan wanita di sudut peringkat pembukaan dasar ini dapat dilaksanakan.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS**

PERTANYAAN : LISAN

**DARIPADA : PUAN ISNARAISSAH MUNIRAH MAJILIS
[KOTA BELUD]**

TARIKH : 1 MAC 2022 (SELASA)

SOALAN

PUAN ISNARAISSAH MUNIRAH MAJILIS [KOTA BELUD] minta
PERDANA MENTERI menyatakan :-

- (a) adakah semua undang-undang dan peraturan berkaitan dengan hak untuk mengundi kepada mereka yang berumur 18 tahun telah selesai dipinda/ditambah atau dimansuhkan; dan
- (b) pelan dan program meningkatkan kesedaran seperti penganjuran dialog, wacana, hebahan di media sosial kepada golongan ini oleh SPR.

JAWAPAN

**YB DATO' SRI DR. HAJI WAN JUNAIDI BIN TUANKU JAAFAR,
MENTERI DI JABATAN PERDANA MENTERI
(PARLIMEN DAN UNDANG-UNDANG)**

Tuan Yang di-Pertua,

(a) Undang-Undang Berkaitan Pengundi 18 Tahun dan Pendaftaran Automatik

1. Semua pindaan berkaitan dengan had umur kelayakan pengundi 18 tahun dan pendaftaran pemilih **telah dipinda** dan dikuat kuasakan pada 15 Disember 2021 yang lalu. Punca kuasa yang merealisasikan perkara ini adalah melalui perkenan Yang di-Pertuan Agong melalui warta penetapan tarikh permulaan kuat kuasa Akta Perlembagaan (Pindaan) 2019 [P.U.(B) 615].

2. Disamping itu, terdapat 2 perundangan subsidairi berkaitan pilihan raya yakni Peraturan-Peraturan Pilihan Raya (Pendaftaran Pemilih)(Pindaan) 2021 dan Peraturan-Peraturan Pilihan Raya (Penjalanan Pilihan Raya)(Pindaan) 2021 telah dikuat kuasakan pada 15 Disember 2021 dan diwartakan masing-masing melalui P.U.(A) 433 dan P.U.(A) 434.

(b) Hebahan Kepada Pengundi 18 Tahun dan Pendaftaran Automatik

3. Untuk makluman Ahli Yang Berhormat, Suruhanjaya Pilihan Raya Malaysia (SPR) melalui Akademi Pilihan Raya (APR) telah melaksanakan **Program Pendidikan Pengundi (*Voter Education* - VE)** bagi mendekati warganegara khususnya warga belia dan masih diteruskan sehingga kini. Program ini bertujuan untuk memberi **kefahaman terhadap proses pilihan raya yang dijalankan di Malaysia** di samping menjawab isu-isu yang sering dibangkitkan semasa pilihan raya. Dengan kesedaran dan kefahaman tentang proses demokrasi dan pilihan raya, maka diharapkan mereka akan menunaikan tanggungjawab untuk keluar mengundi semasa pilihan raya.

4. Sejak pandemik Covid-19 melanda negara ini dan Perintah Kawalan Pergerakan (PKP) yang diumumkan oleh Kerajaan, APR telah memperkenalkan **Program Pendidikan Pengundi Secara Maya (*Virtual Voter Education – VVE*)** sebagai alternatif dalam melaksanakan Program Pendidikan Pengundi yang dilaksanakan secara bersemuka sebelum pandemik Covid-19 berlaku.
5. APR telah melaksanakan Program Pendidikan Pengundi bersama beberapa institusi pengajian tinggi secara bersemuka dengan mematuhi ketetapan Prosedur Operasi Standard (*Standard Operating Procedures – SOP*) melibatkan **penyertaan seramai 2,740 orang pelajar**. Manakala bagi Program Pendidikan Pengundi Secara Maya pula adalah sebanyak **152 program dengan 50,858 jumlah tontonan**.
6. Selain itu, APR mengambil inisiatif perkongsian secara maya dalam media sosial melalui platform Facebook, Youtube, Instagram, Twitter dan Tiktok yang pada ketika ini merupakan trend belia dan anak muda. Inisiatif ini diambil bagi menggalakkan pengundi 18 tahun keluar mengundi pada pilihan raya umum nanti.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT PERTAMA, PENGGAL KELIMA
PARLIMEN KEEMPAT BELAS 2022**

PERTANYAAN : LISAN

DARIPADA : TUAN PANG HOK LIONG [LABIS]

TARIKH : 1 MAC 2022 (SELASA)

SOALAN :

Minta **PERDANA MENTERI** menyatakan secara terperinci nama menteri-menteri, negara yang mereka pergi bercuti dan jumlah yang telah dibelanjakan bagi tahun 2020 dan 2021.

JAWAPAN

**DIJAWAB OLEH YB DATUK DR. ABD LATIFF BIN AHMAD
MENTERI DI JABATAN PERDANA MENTERI
(TUGAS-TUGAS KHAS)**

Tuan Yang Di Pertua,

1. Untuk makluman Yang Berhormat, Akta Ahli Parlimen (Saraan) 1980 (Akta 237) mengenai Ketentuan Elaun dan Keistimewaan Bagi Menteri Persekutuan menetapkan kemudahan Cuti Seberang Laut kepada Anggota Pentadbiran sekali dalam satu (1) tahun, setelah perkhidmatan genap satu (1) tahun.
2. Semua Anggota Pentadbiran telah diberi pilihan untuk membuat tuntutan wang tunai yang senilai dengan jumlah harga tambang kapal terbang kelas satu dan kelas ekonomi bagi tiga (3) orang anak yang masih dalam tanggungan, dikira tidak melebihi tambang untuk perjalanan pergi balik diantara Kuala Lumpur – Tokyo pada tahun 2020 dan Kuala Lumpur – London pada tahun 2021.
3. Kemudahan cuti Anggota Pentadbiran merupakan kelaziman dalam mana-mana Kerajaan dan berdasarkan pematuhan akta ataupun pekeliling sedia ada. Namun begitu, Anggota Pentadbiran tidak layak menggunakan kemudahan Cuti Seberang Laut sekiranya kemudahan Cuti Dalam Negeri Bagi Menggantikan Cuti Seberang Laut telah diambil.
4. Secara keseluruhannya, untuk tempoh 2 tahun iaitu tahun 2020 dan 2021, jumlah tuntutan Anggota Pentadbiran adalah sebanyak RM5,774,303.00. Sebagai tambahan, untuk tahun 2018 dan 2019, jumlah tuntutan Anggota Pentadbiran adalah sebanyak RM4,239,076.00.

Sekian, terima kasih.